

BIBLIOTÈCO DE L'ESCOLO DERAS PIRENÈOS

Louis PUJOL

---

**COUNTES** de las **AGALS**

Prefaço de Julo Ponsolle  
Images de René Lagorre e Alice Laurent

*Parla de Nourjat (Arièjo)*

**Louis PUJOL**

**Countes de la Agals**

**Niort**

**1967**

## PREFACO

Sant Andréu le 15 de decembre 1966

Le miu amic,

Iè b'ès plat balent!  
Aro, aro!  
Besi que t'i fas a de bou.

Aprèts Fialutos e Fiutarols, le tiu prumiè lhibre en lengo nostro que nos encantec l'an passat, Les Countes de las Agals soun uno victorio de mès à la glorio de la mountanho. As boulgut dicha, pels joubis que benen e pels que bendran, le testimoni bertadiè de so qu'èron laz gents del tiu poulit bilatje abans que la grerre de 14 e las misèros que n'surtiguen n'ac bengon endoulenti tout.

E te n'ès taloment pla tirat qu'as escriut per touto l'Arièjo, tapla belhèu per tout le mound, ja qu'empertout es so de mèmo.

Que sio Miclos ou Sencounac, Berdu, Caichats ou Cazonobo, empertout i abios un Rabot, un Galantou, un Birobèten; pertout fasion focs de Sen Jan, tustets, ressoupets e carnabalados e la festo la pu presado, dôrmi la boto ande musico, quouro dansabon sus la plasso, fec, pertout, la festo del porc.

N'uro jes tout rosos e flous, pr'aco....

Ja s'ac bal que las tios gents èron pos trop estafinhousis.

Se parlabo pos d'abé pa trop souen; grand gau de poude fè milhas e pla poulit d'abe matchado.

E pertout atal a bèl talh: sio dins la bal de Biddessos ou per la Barguilhèro enlha, fins als tucols de la Gascounho, cado bilatje abio sso sio, ne calio pos sourti un ande n'i bouta'n autre: mancabo toutjoun calcarres.

Pertout, enso de las besinos, las cousinièros s'anabon fè dicha causottos que ious fasion frèito e que i ous tournaron noun' sè quouro s'endebendro, mentre que pels camps ou pels prats, dins le bosc ou sus la courtaso, les omes al trebalh se tournabon le temps tout 'n s'ajudan les unis e's autris per s'ac bira coumo poudion e s'amcapabon tout'n patin.

Mès aquelh temps n'avio de bou ta pla: Sabèm pla prou qu'es malurous d'abe toutjoun besounh dels autris, mès, aqueles ajudos de cado joun e cado cop de cado'stouno, aqueles courbados per lheba pareds, garbeja ou carreja lenho, èron un semen e bounur.

Tout aco fasio coumo'n liam qu'assoulidabo l'amistat; un floc d'oustals nous n'fsion qu'un; tout le besiat èro 'no familho, bièlhis e joubis frairejabon e s'aimabon tout 'n s'ajudan.

Obé! Ero la bido simplò. Per ta malaisido que fes, i abio pos tant de mal de cap qu'al joun de bèi e quand on abio pla susat, p'els sibis besis qu'on arremountabo, on abio le cor pu lhaugè e tout cantabo dins la bido.

..... E qu'un plasé de s'en tourna, a quatre ou cinq, toutis amasso, quand on abio pourtat secours a calcus que n'abio besounh!!!...

Tu, qu'as coneguet aquelh temps nou'n as fèit un pla poulit lhibre que n'fara calcula mès d'un.

Se cou?

Demo!! Ja t'ac bau dire...

Tchin ba que, dumpèi cinquant' nas, la mountanho nostro se bouido?

Dins les bilatjes; digus pus. Las gents s'en soun anadis lenh, ounjant se ganho'n floc d'argent, ounjant la bido 's pus aisido.

Alabets nou ia jes fineso. L'argent es ounjant le trebalh es pla pagat e, dintros aro, es pos se que debès las bilos qu'els emplouiat e que's oubriès se soun sapudis manteni ande se fè paga milhou e qu'an las fabos de boun coïre.

Atal qu'es, Fantou: Souloument, a forço de s'en i ana, dins las bilos e las usinos, s'i empousounon la santat, an mainat jes eichaganidis e cal que tournen al país alenda l'aire sanitos que s'es refrescat sus las picos ounjant la nèu que s'empieloto se deregalo pos jamès.

E siran aquelhis d'atchi que rebiscouleran l'Arèjo??....

Tio!! Quand Bourtoumiu de Sourjat, qu'es passat Chej de sendicat, se boutara p'el pel de s'abisa qu'i fan manja, debès Paris, car doulento qu'a goust a remèdis e que pensara que, pr'achin'amount, per tosos e jassos

enlha, la jerbo demoro las gouvelhos e que nou i mancaro que pastous e ramats; quand les Députats mountanhols mautaran toutis les Ministres ande que l'pastou de Tristanho sio pu pla pagat qu'un Moussu, beiras que troubaran gardians que se bouldran pos pus fè jandarmos, sa suffic que ganharan mès.

Nou caldro qu'argent....Ja n'in maco... Be n'trobon, per so que so que nou cal...

La mountanho es toutjoun atchi. Cado tardou, mès que jamès, s'en pouiro beire debalha, coumo'n riou que tumo las rocos, delubres de bestia poulit nourit se qu'ande regalècio. Les bilatjes tournaron biure, aqueste cop and' aisedenso ja qu'aro i a'n floc de machinos per fè trebalh a bèl plasé.

E, t'i bouldro jouga's esclops, tchi t'a dit que las tibos gents nou s'abesaran, touti-soulis, que d'aro 'n enlha, n'i a prou atal e que cal pos pus demoura d'ana al cèl s'on bol èsse urousis??...

E que i ous faron, bejam, anaquelhis, se se boulion fè balha driet, coumo fan les de las usinos, coumo se fa per tout le mound??....

Mediant se marchabon amasso ande Bourtoutmio de Sourjat...

L'Arièjo, la nostro mountanho, es le país de la santat, de las aigos, del poulidetch: digus n'ac dira jamès prou.

Benes d'ac fè; èsun carano!!!

Coumo la randoulo qu'alando las alos ande s'anaussa dins le bent cap al soulelh de l'eichubèrn, le tiu èime s'es aфанatal buffadis de la memorio per te tourna mena jous un cèl amistous.

Pramou que deses la bertat, fourço se recouneguiran dins tout so que benes d'escriture. Tard ou d'ouro s'abisaran qu'an le Paradis a pourtado e que nou cal que fraireja.

Cal que 's paisants e's oubriès s'entendion pla toutis amasso, noun pas siègre toutjoun cadun le lhour cami.

Sens'aco res nou se pod fè e tout demourara mièi fus e mièi didorto...

Crets m'a ièu: as jèit un grand cop!

JULO PONSOLLE

Mèstre en Gai Sabé

Delegat General de l'Escolo deras Pirenèos

Sendic de Gascounho-Biarn.

## **OMES E CAUSOS DE D'AUTRIS COPS.**

I.- L'OME MORT.

II.- L'OME PELUT.

III.- L'OME DELAS TUTOS.

Mè tout aço ta bèlh, fec, quand arribèc,  
Dijous chun cè! poulet? On nou s'en brembo brico.  
On nou pod pos sabé quand la lhuno benguèc  
Panal le Teps urous que trop lhèu s'esparrico.

PAULETTE GABARRE (VESPERADO).

## **OMES E CAUSOS DE D'AUTRIS COPS.**

I.-L'OME MORT.

Me cal fèn brabe pas à l'endarré ande me bamba del prumiè cop que begui l'Ome mort, l'Ome coumo dision las gents, la mès part del tems, seguris qu'èron que's autris coumprenion plha de qual Ome éro questiou. Aquelh joun, dibio 'be dins les sièis ans, Mamaï m'abio dichat ana garda las bacos per tout le joun, ande l'miu fraire, gaire pus grand que ieu. Be sabèts que, d'autris cops, èro l'trebalh de la mainado, l'estiu, quand las gents èron acuferadis à sega ou à battre, de sourti l'bestia. Dins cado maisou e abiodous ou tres efants al mens e las bacos qu'abion lhèit pujabon pos toutos sus la mountanho.

Tabes, quand le bestia èro deforo, ramabo sus's bousigasse e l'èrbo fasio frèito. Alabets, quand arribabo le mes d'agoust, las bacos anabon pèiche per tout le joun e les baquiès las menabon cop à Milhaus ount troubabon encaro èrbo fresco e oumbros and'amourgalha.

Debès las ouèit ouros, las bacos èron mousidos e les bedèlhs amairadis, coumo'co poudion, les unis e les autris, demoura la brespado sense trop pati.

Apèich, las bacos èron alhargados e prenion le cami de la Tèrro-Negro dins uno simboulado que retrounibado jusco darré la Roco. Les baquièrots e las baquièros, toutis fièris, la capeto sus la 'spallho, la saqueto'n bandoulièro, le bastou d'abelhanhiè cremat als digt, las seguion e arribadis sus's plhanèlhs las barrejabon e las dichan pèiche, cap al Sol del Bosc.

Mè l'Ome, me direts? E be l'Ome, n'ausigui parla pel prumiè cop per Mamaï que fasio toutos las recoumandacious al miu fraire.

— Le pèrdos pos, e! I dounaras la ma ande trabessa l'agal.

I è mes le brespalh de l'Ome dins la saqueto.

Le brespalh de l'Ome! Aco me tarabustejabo. Chi dibio èstre, aquelh Ome? Cou i calio pourta à manja?

Pel Ticol enlha, las bacos sention qu'anabon à Milhaus e rassoulhejabon pos. Le soulelh èro deja naut e la bisto poulido.

Cap à Mountagut, les camps pujabon jusco's bosques, les unis plenis de capulhs ou de garbiès, les autris en gabèlho que secabo al soulelh, d'autris encaro pus tardibis coumensabon à baira e anabon èstre lhèu prèstis à sega.

Cap à Gamèl, les parts s'estirabon entrans les bosques, toutis plhenis de bejiure berdosenc. La bedo apèich, que pujabo cap als Lhabarièls, touto vegro, espesso, picoutado ensa enlha per un roucatèlh blhanc, me dounabo crento. On n'ausio pos res que l' martèlh d'un dalhaire en retard, que se picabo l' dalh de la part de Bidalounc, la brounhido de las agals que debalharon de Farnhous, e qualche cop, pourtadis pel bent d'auta, les roucoulejadisses delas paloumbos que nisabon dins las Bartos.

Las filhos, quand nous aturabon un chic, ande dicha pèiche l'bestia, se fasion capèlhs de juns flhouridis de dansairetos e de brougo ou cantabon uno cansou;

A la prumièro bilo  
Le goujat l'abillho  
E d'or e d'argent;

Les baquiès, pus trapelhurs, fougabo als quatre pipots, al joc del coutèlh ou s'en anabon dins le bosc de Soustal Darrè, sense trop baicha. Les pus grandis abion ausit dire per Pepi que dins aquelhis bosques les darrièris lhous abion escanat gouelhos e lesangliès se rebeichinabon countro les carbounhiès.

Achi, à l'aurièro del bosc, demèst las talarinos rousaludos e la brougo flhourido, cubèrto de couscourros blunos e roujos, on troubedo les pus ossis abajous, lhusentis encarode rousal. Ramoun de Lacaso, pus grand que toutis nous autris, nous coumandabo de n'amassa, dins le plhot de la ma. Apèich, sitat sus la capeto coumo s'èro ' stat le Rei Fenhant, les recibio de la un e de l'autre ande la pus grando simplhicitat e les se manjabo.

Quand feguen al Sol del Bosc, las bacos uno à uno s'engalhèguen dins le cami que s'en ba cap à Milhaus à trabès le bosc de las Garrafoulhèros. Nous autris, per darrè, èron urousis de trouba la frescou dels matasses de fach.

Ieu, qu'èro le prumiè cop que passabo dins un bosc, me sarrabo tant que poudio del miu fraire. Aquelhos istouèros de lhous e de sangliès i èron per qualqueres. Es achi qu'ausigui tourna parla de l'Ome:

— A perpaus, se diguèc Ramoun, n-h-i a que benen bèi pel prumiè cop. Abèts pourtat le brespalh de l'Ome?

- Ieu ja l'è, se diguègui ieu. Mè ches aquelh Ome?

Alabets, aprenuguègui que, d'autres cops, un pastou que gardabo le siu escabot dins le bosc de las Garrafoulhèros, abio troubat uno gouelho perdudo que s'èro barrejado ande las sius. A uno brèicho que la cercabo, l'Ome i respoundèc que n'abio pos bist cap à fèt. Le cèl s'escuresic un chic pus tard, un dalfi

esclampetèc e, l'endouma, al bort del cami, las gents troubèguen un roc tout quilhat. Al pèd del roc, i abio encaro la capeto e l'bastou del pastou. La brèicho s'èro benjado.

Desempèich, las gents abion pres le plhec de douna'n brespalh pos, las bacos èron embreichados: trastejabon sense s'atura, prenioun la mousco, n'avion pos cap de lhèit, se demourabon bassibos ou mèmò se tumabon e s'escournabon. So que l'amanhagabo le mès, se disio Ramoun, èro le brespalh qu'un baquiè plha joube i bailhabo pel prumiè cop.

Lhèu, troubèguen l'Ome, un roc tout quilhat al bort del cami, dijous un fach. Un autre baquiè e ieu nous couitèguen de i bailha le brespalh. Las filhos i boutèguen dessus quelques abajounhièros cargados d'abajous e les goujats, elhis, i engalhèguen uno pèiro cad'un. Un talh de pa, un roc, causos pariounos. Pourbu que sio countentat.....

La brespado d'aquelh joun, quand tournèguen passa, les rocs i èron toutjoun, mè les brespalhs s'èron forobandidis. Ieu èro countent parce que res nou s'èro passat de trabès à la birado.

## II.-L'OME PELUT.

Les que se gaiton le colh de Coumo-Croso desempèich Norjat nou poden pos sabé coumo's de grèu ande i ana e coumo l'endriet es poulit.

L'an d'après, èron tournadis à Milhaus, ieu coumo baquiè aqueste cop: le miu fraire s'èro demourat à Maisou ande battre.

Quand ajèguen mes las bacos entrans las agals, que se marmuson toutjoun la mèmò istouèro jous las jumberdassos, le cressou e le mourasou, Ramoun de Lacaso nous abe fartos, la brespaso, nous calio puja à Coumo-Croso. Dins la bedo, chuno fèsto: le bestia pujado diautadoment en manjan le pel de cap, las gentianos e las briganèlhos. Nous autris, cercabon les coulendrous sucradis, les gerses ou fasion caire, dels pus nautis abets, las pus poulidos pinchos que poudion beire.

Quand feguen arribadis à Coumo-Croso, achi sabion pos mès ount douna del cap. Anats-i, un joun, s'abèts lhese. Bous arracara pos. Las bacos se boutèguen sulpic à s'affarta tant que poudion d'èrbo lhougo e tendro que creichio sus l'bort de la fount, ount rajabo aigo fresco à boulentat. Al dessus de la fount, la coumo èro plheno de rocs que sention le soufre quand on les trucabo e touto flhouredo d'aberdalhs e de pudeguiès. A ma dreito, cap als Lhabariès, les abets creichion, le tronc plha lhis, la cimo nauto, sus un lhèit d'embrum, de gulhos d'abetalhos e de pinhos.

So que nous estounabo le mès éron las moussos argentados que penjabon de las abetamjps dels pus bièlhis abets, jinos coumo pelses de fenno. Nous troubabon toutis perdudis achi dedins e nous gausabon pos demoura soulis, taloment, abion pöu de fè nas à nas ande l'encataref de l'endreit que siro bengut abeura un escabot d'esards à la fount.

Qualques unis de nous autris dision que n'abion pos pöu e que nous credion pos als countes. Ramoun les se gaitabo e i ous disio que pouiro arriba que bejèsson l'Ome pelut.

— S'i agrado, pr'achi-n-amount, mesfisats bous d'elh!

— O, gaitats le bous, se diguèc Pierrou, qu'abio auset peta' no branco, un chec pus amount, e qu'estirabo l'colh desempèich un moument.

Toutis nous rebirèguen e que biguen: un Ome, pelut del cap als pèds, que guimbado à trabès les abets e que se perdèc darrè 'no grosso souco birado pel bent.

Ja pudèts creire que degus pus nou s'anec esquerja, aquelho brespado, ande bira' balh pinhos. Nous pourtèguen las capetos arrans la fount, à descubèrt e passèguen fil del joun à durbi 's èls e à escouta le bruch de l'auta que fasio boulduda la cimo dels abets.

Pourtant, en i pensan coumo cal, me senhaboplha que les pelses de l'Ome èron de la mèmò coulou que la mouso dels abets. E le guido, le pus trapelhur après Ramoun, sentio l'ampoulho à tres mèstres lhènh. Mè, que boulèts, èron al pais des encntaires e de las brèichos, alabets.....

## III.-L'HOME DE LAS TUTOS.

Chin boulèts, aprèts, aprèts aco, que nou pensèssò pos à toutos aquellos causos estranjos que se passabon dins las bedos! Plha pus tart, e mèmo bèi encaro, è toutjoun agut l'èlh dubèrt e l'aurelho fino quand è trastejat dins les bosques.

Tems aprèts, benio d'abé quatorz' ans, m'abion embouiat sus la mountanho beire l'pastou que gardabo le ramat à las Coulhatos. M'èro lhebat de maiti e, ande l'gous, abio deja passat le Caroubet quand la lhuno se coulquèc.

Tant que fegui dins la bedo, ja trobègui le cami en estrabuncan, qualche cop, à las fourmeguièros. Mè, talhèu qu'arribègui à la Sèrro del Roc, me calguèc atura, i besio pos repus. Alabets fegui repèd dins la bedo, me coulquègui al pèd d'un abet ande me bira l'rousal demourègui le joun.

Ero'chi, tout arremicoulat, quand tout d'un pic, le gous se boutèc à repoutega, le pel erissat. Que nou l'poudio jes fè calha! Qu'abio sentit? Nou n' sè!

Le joun coumensèc à plhareja. Alabets troubègui le cami e rescoumpassègui la Sèrro. Coumo caminabo sus la cunhièro que n'èro pos encaro foundudo, de la part del Besset, abant d'arriba à la fount del Roc, que bigui?

Uno penichado touto fresco, que benio de se fè, aro mateich. On auro dit qu'un ome abio caminat sus la mas, les pèds en l'aire. Que poudio èsse, aco? Ero'chi, tout embahit, quand bigui passa quelques jourgos de la bacado del Besset, al founze de las plhetos, la coueto 'n l'aire, que s'enjujion en reguinnan. L'ase fouto, pensègui ieu, an pres la mousco abant la rajabo del soulelh. Un brau, sus un'autro plheto, se boutèc à grulha en gratan le gispet ande's pèds de debant e las becos, bramabon les bedèlhs que se benion arruca dijous le bentre de las maires.

Just à-n-aquelh moument biguit arriba cap à ieu le baquiè del Besset que me cridèc d'un tros lhènh:

— As-le bist, l'Ome de las tutos? A passat la nèit dins la tuto de la Lhèssò; Gaito l'te!

O, degourdit, nou 'n debio pos èstre; E pourtant, l'ome s'èro bouludat, abio sautat le roc ount èro quilhat, e, apèich, s'èro boutat a courre, cap al riu, cap al Pas del Sasc, lhaugè coumo'n crabit. Res nou l'aturabo, ni rocs ni moulhèros. Un'ento pus tard s'èro perdut dins les aberdalhs!

Fec le prumiè cop e le darrè que bigui courre un outs, un maiti de Julh, alabets qu'aquelho bestiasso benio de sourti de la tuto onut abio passat la nèit abant de s'enfounza dins la mountanho, cap als ramats de Lhahunardo.

## LES ESPEIRAIRES

Nourè del Moua abio dous goujats, Janou e Pol, que dibion abe dèts e ouèit ans alabets.

Aquelh an, la nèu s'èro foundudo d'ouro e, talhèu que les camps de Ribo-Lhoungo se feguen atarrenhadis la berduro nou tardèc pos à refè. Nourè abio 'n camp à la Rauna, un grand camp, ount jant abio semenat auzèrdo demèts le blhat. Léauzèrdo abio pres, dins le restoulh e se l'auta bufabo tems d'arreu ja la beiron lhèu espelhi.

Mè le camp, aprèts l'arpec, èro plhe de rocs. Le calio espeira abant que l'auzèrdo fes lhougo autroment i decharon le dalh en la coupan. A mièt- joun, quand s'ajèguen acabat l'asinat, Nourè diguèc à Janou:

— Te prendras Pol, aquesto brespado, quand sourtirets de la 'scolo e qu'aurets brespalhat. And'uno desco cad'un, boun birets à la Rauna espeira l'auzerda. N-h-in cal jes dicha cap à fèt, bous ag recoumandi. M'ag berè gaita quand aurets acabat!

La brespado, quand ajèguen brespalhat, las ombros èron deja per Bareto ' mount, Janou e Pol, uno desco cad'un sus l'cap, s'en anèguen cap à la Rauna. Per elhis èro la recreaciou que countinuabo: les debers, les se faron la nèit, aprèts soupa, à la candelo.

Coumo le camp i ous senlhèc grand quand le biguen!

Les rocs s'i toucabon, les unis redounis à maitat enterradis dins le sol, d'autris plhanhièris coumo lhausos que pesabon dons la desco. Pol e Janou abion boutat la desco pel sol, en dnefran dins le camp aprèts abe rescoumpassat le fèich d'espinnasses que barrabo l' pas e se couitabon d'amassa rocs. La desco plheno, l'arrapabon per la manilho, unde cado part e l'anabon bouida dins le caminot estreit que l'aigo abio curat, les jouns de plhèjo.

Mè qu'aquelh trebalh èro falegous! Un'ouro deja que toutis dous s'acufarabon a desterra rocs, demèst l'auzèrdo que coumensabo d'espelhi: s'i couneguio pos! Quand le cap i ous roudabo à forse del teni achat e que se reberabon cap à l'autro marje, les dous goujats s'esantabon. Jamès nou pouiron acaba. Anfins, per bèi, la vèit es achi que debalho pels Lhabarièls, s'encal ana abant que bufabo de la part de Gamèl ag abio tout

escalfurat e les ausèlhs cantabon dins les marjals. Pol e Janou, en arriban al pas de l'auzerda, se gaitèguen le pecic de camp qu'abion espeirat la brèspo e feguen estoumacadis; Qu'èro le chi qu'abion jèit arrans so que demourabo? Uno gulho dins un matas de genibres! Jamès nou s'en desfaron d'aquelhis rocs. Apèich, chi sap se las brèichos de la malo fèito nou benion pos, la nèit, esparrica rocs ensa enlha, sus's boucisses deja espeiradis. Ja se pouiro plha: me semlho que n'abio pos dichat cap dins aquelh couènh se disio Pol que s'èro sietat sus la desco touto cap berado.

E Pol s'en èro 'nat, alabets, amassa briganèlhos dins le prat de la 'Stono, à Bourcalholos. Apèich, coumo l'ausèlho abio boulat pel prat, se boutèc a cerca, dins les abelhanhiès de la mrje, le nits que dibio èstre prèst à couga.

Janou fec encaro quelques descados tout soul, mè ne fec lhèu fart. Apèich, se sietèc elh tabes sus la desco e se boutèc à escriure le siu noum sus uno lhauso plha lhiso qu'abio troubat.

Le tresième joun, las descos se demourèguen dins le roumendièral. Talhèu arribadis à Bourcalhodos, les dous espeiraires tirèguen al flhèich, cap al riu. Achi, se boutèguen al chaupica tant que pousquèguen, dins l'aigo que fa dnetèlhos blhancos quand rescoumpasso les rocs entrabessadis al mièi del riu. Pol s'emplhenabo las pochos del siu pantalounde belou de toutis's rocs redounis que troubedo dins les goulets, coumo s'èro 'stat uno fourtuno. Janou, elh pujabo sus's sauses fè caire branquets plha lhisiss ount las fèlhos espelheichion deja e se boutabo a truca ande l'margue del siu coutèlh sus la pèlh del broc tout espourgat. Lhèu, uno fialuto touto nobo, molho encaro de sèbo, fasio courre Pol, les pantalouns sougantis, que la boulio ande poude fiula, elh tabes.

Après las fialutos, fec las jiscadouros. Janou troubèc un sagut, al bort del riu, que l'auta abio deja fèit reberdi.

Le sagut cagoulhabo coumo cal, las jiscasouros feguen lhèu prèstos e lesv dous goujats se jiscadourèguen jusco que la nèit les pensèc tampa dins las bernhièros. Urousoment per elhis, la Mamai s'abisèc pos, coum' co, qu'abion les esphlots plhenis d'aigo e les pnatalouns que se poudion toursi.

Pol e Janou abion debrembat d'espeira tout à fèit. La brespado que seguic aquelho jiscadourado, le tems èro toutjoun soulide. Le coucut cantabo deja de la part de Mountagut e, dins las bernhièros, las jèlhos creichion à bisto d'èlh, d'un joun à l'autre.

Al lhoc de s'atura al camp de la Rauno, les dous goujats debalhèguen un chic pus abalh e s'en anèguen ande's pourcatiès que fasion pèiche les porcs sus l'bort del la routo bièlho. Chuno fèsto, les mibis amics! Les pourcatiès feguen un rount quand les biguen arriba e sulpic, calguèc que jouguèsson al parranquet ou à siègue per las rasos dels blhats ou de las seguels nautis deja per la sasou.

Qual es le qu'afèc l'idègo de fè un despièit à uno bièlho que s'emplhenabo le panhiè d'autrigos ande fè ciore tout'n gardan las trèjos? Nou n'sè! Toutjoun es que, Baichon, qualcus estaquèc à la camo d'uno trèjo, and'uno ficèlo, uno cassarolo traucado. La bèstio enfoulhido, birèc amount cap al bourdic, seguido per la bièlho que la pousquèc pos atura.

La fenno s'anèc plhanhe. Quand les espeiraires arribèguen à maisou, Nourè les demourabo la granhièro als digts:

— Douma birè beire se l'camp es espeirat. Aro, passats al lhèit.

L'endouma, les dous goujats abion bergounho en arriban à l'auzerda:

Mè, Papai, jamès nou l'pouiren acaba aquelh camp, se diguèc Pol, gaitats coumo's grand!

-E be, se respoundèc Nourè, ag anan beire. Boun bau merca un bouci per cado joun. Coumo 'co, ja l'acabarets.

Nourè se boutèc à planta brocs, ensa enlha, que fasion la raso de so que calio espeira cado joun. Coumo de fèt, les dous goujats se couitèguen de jè le pecic mercat e, chic à chic, les rocs s'en anèguen de l'auzerda.

Bengudis grandis, Pol e Janou se soun brembadis de l'auzerda de la Rauna. Quand un trebalh i ous senlhabo trop gros ande l'fè d'uno soulo junto, ag fasion à cops de tresses, so que i ous a toutjoun reussit.

## LE FOURESTIE.

Quand arribats à Nourjat, se bous rebirats de la part de la coumo, beirets d'abort la bedo que pèjo cap à la cri sense jamès i abasta. Apeich, pus abalh, se tenen les bosques de fach, las bernhièros e les abilhanhiès que



besinon ande's ginestas des camps en barèito. E, s'abèts demourat dèts ans à tourna passa per Campanho'mount, alabets o, ne troubats cambioment.

Les bosques se siran fèitis abalh e an espessit: la maleso abasto pertout. Un prat, que se dalhabo encaro, es embahit de bèrs e de tremouls. Un camp, ount jant i abio uno poulido seguel ou uno mounchèro carano, es bengut ginesta. La bedo mèmo, jelouso del fach que nou fa que creiche al despent dels bousigasses, esparrico les petitis abets, ensa, à trabès les bosques que negrejon un chic mès, arreu arreu.

Le que de la bilo, aco i agrado: un chic mès de berduro altour del altour del bilatge nou pod que le countenta. Pourtant, un camp semenat es pus poulit qu'un camp de ginèstos, per ta flhouridos que sion. Le pouèto de Suc, Dengerma, nous ag dit:

Un camp de gabatch es couso poulido  
S'es touto flhourido  
Jous un cèl brumous....

Lo rasou de tout aco be la couneguèts coumo ieu: le bilatge s'acoro, lhèu sira abandonat e les bosques ne proufiton.

Mè i a encaro uno petito causo que dibèts sabé: la lhenho se ben pos mès, le boulangè calfo le four ande poutingos que receu dins barricos de fèr, las gents de la bilo s'an croumpat uno machino à calfa e an dichat las estèlhos de fach ou de bèr. Es praco, tabes, que las brancos creichen dins les bosques, tampon les camis enca al bilatge que i bambiara qualqueres.

I pos encaro cinquant'ans, la lhenho èro pus raro. Las marjes èron recatdados suen, las coupes se fasion cado tardou e les ases abion trebalh and'ana 'l biatge.

Un dijaus, pusque Janou n'èro pos à la 'scolo, sa maire i diguèc:

Bou'n pouirots ana cerca un fèich de lhenho en d'acon, ande Pol. Anèit, toun Paire fara les fagots que manqon and'ana 'l biatge. Douma maiti, biron cerca uno mèrcou.

Les dous goujats, qu'èron alabets dins les dèts ou doutze ans, asurpon le pigassou petit, uno tralho cad'un, uno bièlho bèsto ande se bouta sus l'colh e s'en ban cap al bosc.

La lhenho èro de la part de Mountagut: dos ouros al mens ande i puja e autant and debalha.

Se nou n'anabon al coumunal, à Campèstres, se atrapo?

— O, per qualhues brocs que couparen! Dicharen les pèds e nou prendren pos que las brancos que se ban seca. Belhèu nous dira pos res.

Talhèu dit, talhèu fèit. Les dous bourdegasses biron la 'squeno à Mountagut e s'en ban pel cami que pèjo en retrabessejan cap à la Couetèlho.

La tardou s'acabado; La nèu tardibo aquelh an, n'èro pos encaro casudo. Tout èro desfulhat dins les bosques que senlhabon adurmidis. A la solo de la coumo, encaro, quelques bacos èron sourtidos and'acaba de pèiche les farratjals berdousenquis à l'entour dels orts. Dins les camps, ount berdejaban deja les blhats e las seguels que benion de nèiche, quelques fougairous de camos de patanos ou d'aglam fjmabon e enplhenabon la coumo de fumatièro qu'un petit bent s'en menabo cap à Ribolhoungo. Dins un prat, al bort del riu, uno cabalho touto negro e l'siu poulhi en rabo plharo senlhabon plhantadis pel sol. Mè lhèu le poulhi se boutabo à guimba e dounabo bido à la peichendo. Als plhanèlhs on ausio, le bruch dels esquelhous d'un escabot à la beraso que cercabo quelque punto de brougo encaro fresco, debembado al couènh del bosc. Qualque cop, uno gouvelho se soucadissio e le sou de la 'squelho en repican pus fort fasio pensa que la bèstio sentio la bèu, aro touto procho.

Janou e Pol trabessèguen la Tèrro-Negro sense s'atura.

Laire èro biu: le soulilh, arrans la pico, s'anabo coulca lhèu. Dins le bousigas ount les enibres abion encaro un senlhant de bido, les falgas coulou de rouselh s'èron atiouladis sus la cams touto pourido. La Couetèlho èro 'chi: Janou la couneguio plha, elh que i benio garda las bacos, l'estiu, le maiti d'ouero ou la brespado les jouns de brumado.

Les dous goujats s'aturèguen à l'aurièro del bosc e estendèguen las tralhos à un endreit plhanhié, aisit ande fè les fèiches. Janou, le pigassou als digts, dentrèc li prumiè dins le bosc, coumo dins uno glèiso, tout siau. Le cor i batanabo. Les sibis pèds routabon l'embrum noubèlh, secat per la tourrado de las nèits e que rasounabo coumo'n sac d'escalhs. La bisto dins les matasses desfulhadis èro milhouno que l'estiu, les bouiches el les agreus plhenis de bolos roujos empachabon pourtant le i beire d'un tros lhènh.



Janou se boutèc sulpic à coupa brousto ensa enlha, que Pol tirgoussejabo sus l' bousigas e engalhabo dins les fèiches. Le bruch del pigassou, trop fort al greu de Janou, retrouneïchio lhèn, à trabès les aïbres, toutis nudis, que se quilhabon cap al cèl pus lhoungarudis encro, aro qu'èron despulhadis.

Le goujat fasio plha attentiou de nou coupa que 's brocs que serbion pos à res, les pus finis tabes, es so que calio and'ana 'l biatge. Quand n'ajèguen prou, estaquèguen les dous fèiches, petits, petits de la part del cap, so que calio pourta, pus grossis per darrè, so que calio arroussega. Aci rait, ja biro plha, tout èro à la bebalhado. Apèich, Janou espourguèc coumo cal dous pifoures, plha pifourcadis, qu'abio mes de costat en les coupan. Janou lhebèc le fèich tant que pousquèc e Pol boutèc le pifourc à la tralho, le pus en debant que se pousquèc. Les fèiches se tenion dreitis, i abio pos pus qu'à se bouta la bèsto sus l' colh, le pifourc sus la 'spallho e coumensa à debalha. Abion pos fèit dèts passes, que Janou cridèc: Calguèc pos plha tems als dous goujats ande desentourtilha las cordos dels fèiches: dos segoundos aprèts, Janou debant, se founhabon dins le bosc. O tio, ja i poudio beni le Fourestière, per tant qu'ajès l'abitudine dels bosques. N'èro pos de pr'achi-n amount e sabio pos courre coumo les dous bourdegasses. Res nou's aturabo: les genibres, les bouiches, les roucatèlgs mèm, tout èro rescoumpassat, abion pos le tems de ne fè l'tour. Coumo' n dalfi, èron negadis dins le bosc e abion deja cambiat de birado.

Quand sourtiguen de Campèstres, toutis pessegadis pels genibres, de la part del Talh, Pol e Janou, a trabès las rasos, debalhèguen à la Prado, rescoumpassèguen le riu e pujèguen de l'autre part de la coumo, cap à la Carolo out abion un bousigas. Achi, se sietèguen and'alenda. Cap tour qu'abion jougat al Fourestière, elh que se cresio dels teni.

Apèich, les dous goujats se feguen un fèich de ginèstos.

Siro toutjoun aco, se disio Janou, n-hi- auro and'alhuca l'foc tout l'ibèr.

La nèit benio coumo'n cop de roc. Calio dentra. Quand arribèguen al Pas del Besinat, las goujatos pousabon las dournos à la fount ou escurabon le casset qu'abio serbit à fè las farinos de sibado. Al pèd d'uno cantounado, le Fourestière, las jumèlos sus èlhs, entourrougabo les camis que passon per la Tèrro-Negro ande sabe se debalhabo dous fèiches de lhenho. Belhèu se cresio que's nostris dous balentis s'èron sus l' jas.

Quand les bic arriba, per la Carrière ' balh, se boutèc las jumèlos dins le sac.

— D'out i benèts? se i ous diguèc.

— B'ag besèts, se respoundèc Pol.

— De las ginèstos, se diguèc Janou.

Al joun de bèi, quand las gents se plhanben que les bosques creichen trop, que la ramisso ba emboustissa le bilatge, que les sangliès e las mandros ban beni jusco dins les orts ande se chapa se i a res de bou, Janou se pod pos empacha de tourna pensaa à-n-aquelo brespaso de la tardou out le pa d'uno mèrconou benguèc pos sus la taulo, parceque le Fourestière i ous boulguèc pos dicha tirgoussa dous brocs deja coupadis e engalhadis dins un fèich, à uno plheto de la Couetèlho.

## LA CARBOUNADO

E bolon las belhuscos curiosos

Que ban gaita, perdessus l'tet,

Se las estelos luminosos

Se soun amourtados de fret.

RAYMONDE TRICOIRE (JUMARÈLHS).

I abio uno sereno del diablhe. La lhuno que benio de se lheba fasio las ombros per Margenet ablh coumo s'èro 'stado le solelh e les tres fustets, aro nautis dins le cèl plhe de frescuro, se poudion beire sense peno. La nèit èro fredo: la tourrado abio sulpic secat l'aigo que s'escoulabo de la nèu dels tets adoucido pel soulelh, e las candelos de lhampo s'alhoungabon pels courredous à touca l'sol.

Janou sourtio de sibo tout'n esplhoupejan, las mas à las pochos e, jous's sibis pèds, la nèu tourrado rasounabo.

Coumo'nabo arriba dabant l'engart de Bati, ount la junèssò se benio para del fret l'ibèr, aprèts soupa, fec estounat de n'ausi pos res à fèt. Chi sap, belhèu èron dentradis à l'aubèrge. S'n anabo tourna chès elh, quand bic arriba, en rasan las parets, Lucièn que les joubis abion batejat Loulim e que dibio èstre dins les seise ans. Qu'ès tout soul? As bist les autris? se diguèc Loulim quand ajèc recouneguit Janou.

-Què nou. Beni d'arriba. Belhèu s'en soun anadis chès la Lhibertè.

-Nou. Beni de gaita per las finèstros. I a pos que Pistoul que bado tant que pod. Be sabes qu'abèn tuat le porc, aqueste maiti. La brspado abèn fèit le repèch e penfat al soutoulh. Mès aro, benèn de nous abisa que nous an panat las carbounados desempèich que la nèit s'es barrado. A pus près, ja mi pensi se ches. Bos beni, ande ieu, Arquisat? Achi, soun segur de trouba le Guido e touto la siu bando. Dèben èstre anadis chès la Majoro ande las se chapa. Bè te caussa e tourno lhèu.

Un quart d'ouro aprèts, caussadis de fortis souliès, les dous goujats birèguen abalh, cap Arquisat. Abio taloment casut nèu, aquelh ibèr, que las parets dels camps e des prats de besion pos mès. Touta la siu bando. Dèben èstre anadis chès la Majoro ande las se chapa. Bè te caussa e tourno lhèu.

Un quart d'ouro aprèts, caussadis de fortis souliès, les dous goujats birèguen abalh, cap Arquisat. Abio taloment casut nèu, aquelh ibèr, que las parets dels camps des prats se besion pos mès. Tout èro plhanhiè coumo la toso de Bese. La lhuno se miralhado dins la nèu tourrado del cami e se boutèguen a trabès camps. La nèu pourtabo delhaba. Quand rescoupassèguen le riu s'en abidèguen pos souloment, la nèu e la lhampo l'abrigabon gairebe tout à fèt, e elh s'èro adumit per dijous.

Cap de buch. Res que, de tems en tems, le cric de la tabèco, alha, de la part de Nalham, que s'en anabo retrouni al Roc de Quiè.

Arquisat, elh tabes, èro adurmit. Las gents abion tampsat la nèit deforo plha d'ouro e abion coumensat la belhado. Loulim e Janou n'estouloumièguen pos gaire pels courredous e s'en anèguen truca à la porto de la Majoro.

— Boulèn un nina, i respoundèc. La Majoro que dibio pos sabe res. Benèts bous calfa. Justoment, i soun toutis de pr'achi -n -amout.

Dins la cousino, touto caudo, i abio le rount d'uno grandò belhado. Al tour del foc, ount brandejabon las estèlhos de fach, uno bouno doutzeno de calhastres e de moustels s'abion sourtit les souliès e alhoungabon las camos sus la placo del cantou.

Al prumiè cop d'èlh, Loulim bic le Guido que ne coumtabo uno, al mièi del rount, e que s'aturèc, tout d'un pic, coumo s'abio perdut le fièl.

Tè, qu'èts achi? se diguèc Touni, bous cresion al lhèit. Bous abèn pos best abant de debalha!

Le Guido, elh, n'abio proufitat beire la Majoro dins la boutigo. Apèich, s'èro tournat sieta, un chic embahit; las lhengos repiquèguen e la rasounado ag fec retrouni tout un cop de mès.

Al couènh del cantou, entrans le fourroulh e las estèlhos secos, i abio un ome que Loulim e Janou nou couneguion pos brico e que senlhabo embriagat. La Majoro i boulio pos mès ana creca mièjo e les joubis i fasion despièits. Touto la belhado s'en feguen le palhas. Les unis i jitabon carbous per la figuro ou i alhucabon un pecic de journal jous la cadiero. D'autris, i fasion fuma uno cigareto ount jant abion embarrat, d'amagat d'elh, uno alumeto de las roujos.

Loulim e Janou se gardabon plha de fè minèstros e, coumo dous busarocs, demourabon la fi de la belhado ande sabé so que faron de la carbounado. Mè degus nou ne parlabo. Ramoun del Tremoulet èro le goujat le pus fi de la bando. Ajèc lhèu fèit de beire se chin pouiron fè ande se debarrassa dels dous genaires.

— Atisats-le, se diguèc al Guido en parlan del pintat.

Ieu, i bau dire qu'es Loulim que i fa misèros. Coumo 'co s'en beran e pouiren fè rousti la cabounado.

Del tems que les unis i fasion jocs, Ramoun pourtèc la siu cadiero arrans l'embriagat:

Te fan misèros? Ieu te bau garda, bas beire aco.

E talhèu que pousquèc i diguèc que les que fasion causos de trabès èron aquilhis dous, alha, que n'abion pos l'aire de touca.

De las doulentisos es coumo de tout: quand n-h-i a prou n-h-i a prou! Un carbou, arrounsat d'un cop de ma, benguèc tampa l'èlh esquèr de l'ome que se lhebèc, alabets, passèc per darrè l' rount e benguèc emplhastra Janou e Loulim.

Aquestis dous, eichauridis, blhanquis coumo coulhistre, sabion pos se d'ount i ous benho. Que calio fè, tabes? Se tourna? Mè oun t menaro, aco? E la carbounado? Calio abala las coulobres e dire pos res, res à fèt. Les autris s'en rision, belmal, e se foution d'elhis. L'ome, tout fièrot, se tournèc sieta. Mè Ramoun e le Guido ne feguen per lhouris söuses. La carbounado pos èstre roustido aquelho nèit, j'ag besion aro. Calio tourna bira' mount.

Coumo sourtion de chès la Majoro, debant la petito finèstro del soutoul que douno dins la carrièro, dous gats negris sus la nèu blhanco èron acuferadis à se roussega qualquares. Loulim atrapèc le bras de Janou, le sarrèc tant que pousquèc e d'uno bouts enrauquido i diguèc:

Bos t'i paria que se chapon la carbounado?

Coumo de fèt, les dous gats acabadon de se rousega le darrè bouci de porc que la Majoro èro 'nado amaga dijous un pelhot, à la boutigo del tabac.

## TERRO PROUMESO.

Abio taloment nebat, aquelh an, que les escabots se pensèguen mourì de talent dins las bordos. Les pastous abion bailhat les darrèris arpats d'èrbo à las anelhèros, bisto que la primo èro arribado; las autros s'acampabon dins las barèitos ount la berduro coumensabo à regrelha. Mè, tout d'un pic, le bent fret se boutèc caire uno bouno quinzinado.

Les que poudion, pujabon qual'escarge de palho à la bordo e ne boutabon un dins le restelhè ande fè granuta las bèstios, estouèro de las dicha pos agani. Coumo la nèu casio toutjoun e que la touurado abio cremat pertout so que les prumièris jouns de la primo abion fèit crèiche, s'en calguèc ana quèrre fèiches d'abetalhos dins la bedo ande n'enguirlanda unos als restelhès.

Las gouvelhos las se curabon, belmal, n'abion pos res pus ande se manja, mè las que ne manjabon trop èron coumo embriagados parce que l'abetalho es coumo de toutos las causos fortos, ne cal pos abusa.

Un joun, le soulelh tournèc beni e les bousigasses s'atarrenhèguen, un cop de mès. Les escabots sourtiguen ande s'assouelha e ande se cerca à manja. Ero uno pietat de beire puja per las dressières las gouvelhos toutos magros, la lhano arrapado de la pèlh, l'èlh tout atansat: on auro dit que fasion trentoulos. Les anhelhs, qu'èron estadis poulidis tout l'ibèr, èron aganidis e eicharlutabon tout le tems le braiè de las maïres que les boulion pos souloment dicha poupa parce que n'abion pos res pus à i ous bailha.

Quinze jouns aprèts le prumiè rajol de soulelh que seguic aquelho tarrilhho nèu, s'èro tournat atarrenha pertout mè l'èrbo èro lhoungò à crèiche sus la tèrro tant afredado.

Janou e Ramoun de la Carrièro abion les escabots dins un bordo à touca les bosques de Soustal, ount la peichendo èro pus tardibo que pertout abalh. Toutis dous se rousegabon les punchs quand besion les anhelhs que s'en tournabon dins tèrro.

— Cal fè qualquares, se diguèc Janou.

— Se las plhetos se soun atarrenhados e an reberdit.

Le besset, b'ag sabèts, es la mountanho que se trobo al delha de la Sèrro del Roc, à touca la mountanho del bilatge. Achi, las gents del bilatge beso menon le lhour bestia à la sasou de l'estiu.

L'endouma, de boun maiti, Janou e Ramoun algarguèguen les escabots e birèguen amount cap al Caroulet. Las gouvelhos pujabon seautadoment, à trabès le bosc, en espuntan qualche pecic de brougo ou qualche punto d'abajounhièro. Las bèstios arribèguen à la bedo, sense abe pescut res de plha goustous e buèrguen alabets per la bedo'mount e las pus bièlhos passèguen debant quand biguen que calio siègue le cami del Roc.

Arribados foro de la bedo, al tarrenh, se tournèguen atura. La Sèrro, plheno de brougo nauto que n'abio pos cap de goust i ous bailhabo pos plha de gauch. Mè la Qouèlo, qu'èro esquelhado, se boutèc debant e toutos seguiguen alabets, la uno darrè l'autro, cap à la cri.

Quand arribèguen e qu'ajèguen uno bistosus l'Besset, Janou e Ramoun feguen estabousidis. Debant elhis, èro la Tèrro Proumeso! A pèrto de bisto, las cunhièros blhanquejabon las unos pus nautos que las autres, mè per toutis les tussals, toutos las jassos e las plhetos qu'èron à las soulanos la nèu èro foundudo e le sol èro bert.

Ero qualqueres de se gaita toutos las mountanhos al delha del Besset, toutis les plhanèlhs que berdejaban al soulelh, arans la nèu que joundio cadio joun un chec. Las gouelhos bièlhos abion bist elhos tabes la berduro e les dous escabots, toutis barrejadis, debalgèguen sulpic per las cunhièros ablh cap als plhapets berdousenquis que se bedion al founze de la coumo, proche del riu.

A la prumièro jasso, las bèstios se jitàguen sus la peichendo à plhen mots. Las unos se couitabon d'abarra e s'en anabon un chic pus lhèn beire se i abio pos un autre tussal pus bert encaro; las tutros rasplhabon sense cambia de jas. Alcap d'un chic, las gouelhos tenion toutis les endreits tarrenhis e Janou e Ramoun, coulcadis à l'eïchut, sus un roucatèlh, las gaitabon s'affarta.

La brespado, quand turnèguen puja cap à la Sèrro ande s'en ana embarra, les dous pastous èron urousis de beire que las gouelhos abion le bentre talomnet tibat qu'a peno se poudion camina. Deja i ous senlhabo que n'èron pos tant magros!

Aquelho fèsto durèc tres semmanos. Bint jouns de soulelhados, de sadoulhs e de countentoment. Las bèstios n'abion taloment grat que, talhèu qu'èron lahargados, s'ag fasion pos dire dous cops ande prene le cami del Besset. La pujado èro courto, n-h-i abio pos cap que fesso rampèu, mèmò las rancos. La lhano, sus la 'squeno, abio crescut de dous digts al mens, les angèlhs s'èron rebiscouladis e sus l'cap dels joubis marras la corno coumensabo de s'alhounga.

A la fin del joun, sadoulhis de lhèit e d'èrbotendro, les anhèlhs s'arremassabon al pèd d'uno roco e ne fasion le tour en reguinnan ou pujabon sus l'roucatèlh fè minèstros. Un bourrèc qualque cop, fart elh tabes, se bembabo qu'èro ' stat joube e se boutabo à guimba dins le rount, jous l'èlh estounat del gous que se ganhabo la sibado sus la cunhièroande se refresca. Anem, tout anabo plha, les pastous se poudion coulca!

Tout aco èro trop poulit: poudio pos dura. Un maiti, Ramoun diguèc à Janou:

— Un d'aquestis jouns, le gardo del Besset ba beni fè n' tour pr'aci-n amount e nous ba atrapa. Sables se que nous cal fè? Ièu, m'en bau ana pr'alha, al cap de la Lhèssò. Achi, se besi puja qualcus de la part de Sèrro-d'Espinàs, boutarè la capeto al cap del bastou e la brandirè. Tu, talhèu que beiras le pelhot, arremassaras l'escabot d'un cop de gous de la part de Besset de naut e passaras la Sèrro cap à Camp-Redoun abant que sio 'chi.

Ramoun se perdèc dins les aberdalhs e Janou se demourèc tout soul, al bort del riu, sus un roucatèlh, l'èlh toujoun birat cap à la Lhèssò. La prumièro joun se passèc pos res. Le segoun coumo Janou s'abio durbit la saqueto ande brespalha, debès las tres ouros, la fi de la boumbanço arribèc. Tout d'un pic, Janou se bic quilha, debant elh, al cap de la Sèrro e n'ount pas alh, lhèn, al cap de la Lèssò, le sinne del malur. La capeto, brandido per Ramoun, senlhabo l'auselhas de la malo- fèito.

Janou plheguèc le brespalh e, d'un cop de gous arremassèc sulpec l'escabot. Trop tart! Darrè Ramoun, aro aturat sus la cri, un ome se besio que benio cap à-n-elh. Un chic aprèts, las gouelhos jpujabon siautadoment, coumo se i ous arracabo: n'èron pos encaro fartos. Ero pos mè la peno de las fè courre, aro, pusque tout èro perdut.

Bous alegrats achi, se diguèc le gardo. B'ag sabèts qu'es pos bostre aco. D'ount be que las e menats? -E, las e menan pos, se diguèc Janou. S'en benen aci toutos soulous. Aro las ne birabo. Nous artris, j'ag sabèn qu'es bostre. Me, elhos, e ous ag poudèn pos bouta en escriut.

— E l'tiu camarado, las gardo de lhèn las gouelhos. A pöu que l'pennen?

— O que nani. Ja's courtatjut! Las abion perdudos.

S'en èro anat d'aquelho part ande las cerca.

— E be, pus qu'aimats la trastejèro, bendrets douma maiti en so del mèro. Bous adoubaren aco, pel prumièro cop.

Un chic pus tart, coumo las gouelhos s'èron desplhegados encaro, primos e anaigados, per la brougo abalh del Caroulet, Janou demandabèc à Ramoun:

— Chin ba que te sios dichat attrapa?

- Me soun adurmit. Tout d'un pic, quand me soun despertat, e bist un ome nou n'pas à Sèrro-d'Espinass, mè à quelques passes de ièu. Me soun lhebata, coupo se res nou èro, apèich e caminat pus bite qu'elh. Pensabo que, belhèu, aruos le tems de te salba. Poudio pos lheba la capeto, coumo coumbengut, ag aurocoumpres. E demourat que fesso amagat darrès un tussal ande te fè sinne.

Calguèc quelques jouns als dous pstous ande fè debremba à las gouelhos le boun pa que se manjabo al Besset. Apèich, cips de chics, le soulelh del mes de maï benguèc jè creiche pertout l'èrbo boubèlho e les sadoulhs que s'abion pres demèst las cungièros feguen pos pus qu'un soubeni.

Mè ja i ous sapièc mas à Janou e à Ramoun. Tems aprèts ne parlabon encaro.

Al joun de bèi, que i à pos pus de ramats en lhoc, que d'èrbo nou demoro piusèlho dins las jassos! Es bertat qu'aquestos nou berdejon pos tant que d'autris cops. Alabets èron femasos e l'èrbo creichio al prumiè rajol, talhèu qu'èro tarrenh. Belhèu un joun les ramats tournaran abriga las soulanos, l'estiu. Las plhetos tournaran affarta las gouelhos e alabets beiren encaro guimba les anhèlhs altour dels roucatèlhs!

## LES CARIBOUS.

Abant de se coulca, Nourè del Uu èro sourtit dins la ièro, gaitasse l'tems. La nèit èro escuro e fredo. Sira tourrat douma maiti, se pensèc Nourè, mè fara bou. La lhuno es bièlho e tant que tendra fara bon tems.

Apèich, belhèu se gastara e la nèu pouiro caire.

Nourè, alabets, s'en èro'nat al porje bailha un brassat d'èrbo de mès à l'ase e à las bacos de junhe. Pèich, abio tampat le pourtal e s'en èro tournat dins la cousino.

Douma maiti, fara lhuno. Biro plha and'ana als cabirous. Chi pouiro beni ande ieu? se diguèc Nourè à la siu fenno.

— Pren-te Janou. Es petit encaro, mè per mena las bacos ja fara. Be sirets tournadis abant que soune à la'scolo?

— Se nou n'anan d'ouro tio. Anem, Janou, bè t'en durmi;

Te caldra lheba debès tres ouros, douma. E Janou abio plhegat les caiès e s'en èro'nat durmi.

L'endouma, Jénou se lhebèc quand soun paire le cridèc. Avio son encaro, mè e fasio plphase d'ana als cabirous. Soun paire, lhebata desempèich dos ouros e mièjo, abio deja apasturat. Quand ajèguen dinnalhat, Nourè boutèc la'mbardosus l'ase, le couliè e tout so que cal ande tira.

Janou tenio l'ase pel cabestre del tems que Nourè estacabo sus la'mbardo, pel costat, and'un parelh de liams, la bigo e entrabessat per dessus, le julh, las julhos, la cadeno de jèr e's cunhs. Quand tout fec plha recatdat, l'ase sourtic de la ièro e prenguèc le cami de la bedo seguit per la Courbo e la Ramé que se cresion, belhèu, que las menabon à un prat ount jant l'èrbo auro crescut demèst la tourrado.

Le bilatge èro tout adurmit quand le trabessèguen de la Plhaço à Pijol. Les gousses del Besinat les benion flhaina e pèich s'en tournabon, la coueto en l'aire. Quelques unis, estounadis de beire passa tant de gents e de bèstios à uno ouro ta maitinhièro, chaupabon un chic, de lhènh, e despertabon les pouls que soucadion las alos, dins las galhinhièros, abantde canta en l'auno del joun noubèlh.

Mè le joun n'èro pos encaro 'chi. Foro del bilatge, la lhuno nauto dins le cèl fasio plharou coumo se l'albo benio d'espelhi.

L'aire èro biu, le cami tourrat. Las bacos, en caminan, abion uno fumatièro penjado al mour: l'alende que se tourrabo arreu arreu que sourio tout caut.

Qalque cop, las bèstios s'arrapabon à un roumendieral, al bort del cami, ande gaita d'atrapa las fèlhos de roumendièros encaro berdos. Janou las butado, d'un cop toucadouro, ande que tenguèsson pèd à l'ase que s'en anabo, debant, sense demoura degus.

A Farièros, al lhoc de siègue le cami que pèjo pel bort del riu amount cap à la bedo, cap à l'agal de Coumo-Croso ount èron les cabirous, Nourè enguindèc l'ase cap à Soustal, pel caminot que s'en ba en retrabessejan. Achi, n'auron pos tant de fret que dins la coumo ount la fescuro èro pus bibo, arrans del riu.

En pujan per la Bartoulho amount, le pus grand plhasé de Janou dec d'escarni l'auselhas de la nèit que cribado la siu coumanho, de l'autro part del riu, dins les bosques del Tremoulet. L'auselhas i respoundèc, se fec prochi, pèich, quand nou fec pos pus qu'à quelques passes, tournabo fè lhènh, de l'autro part de la coumo.

Als prats de Soustal, las bacos sautèguen les passes que menabon à las barèitos ount jant abion pres le plhec de pèiche, l'estiu. Janou las rebirèc al pus lhèu e las tournèc bouta dins le cami. Las bèstios se dichèguen fè, mè Janou s'en besio ande las fè puja, se dibion mesfisa que i abio pos mès de peichendo en lhoc.

Aro, le cami pujabo pos mès, mè s'en ababo tout plhanhiè cap à l'agal, à trabès les bosques. Deja la bedo se besio dins le joun que coumensabo de plhareja. Le bruch de l'agal que debalhabo de la bedo benio juscos à n-elhis. Nourè passèc debant ande l'ase, l'anèc descarga al bort d'un cami estreit, abant l'agal, e desfec las julhos al pèd d'un matas de bèrs tout desfulhat. Apèic, tournèc cap à Janou ande i aduja à sarra las bacos. Aro, calio fè de fineso, las bèstios besion plha que i abio pos res à manja. Dins le cami encaichat, Nourè las atrapèc per uno aurrelho cad'uno, las boutèc arrans e, d'un rebèts de ma, i ous boutèc le julh sus l'cap e las junhic.

Dous passes pus lhèn l'agal rajabo pels rocs abalh e, cops de plhapets, la lhampo lhusio. Un aire fret buffabo entrans les abets. Al founze de l'agal, à touca l'cami, les cabirous toutis peladis, toutis blhanquis, èron toutis entrecatzadis, coumo s'èro escasut quand èron debalhadis de pr'achi-n-amount. Nourè, bite, plhantèc le cunh à un gros cabirou que siro tirat per las bacos e à un autre, pus petit, que l'ase s'en arroussegaro. Tout siau, le parelh fec aprouchat, la bigo penfado al julh. Quand la cadeno fec estacado à la bigo, Nourè diguèc à Janou:

Bas passa debant e las faras tira de frount. Jè attentiou se cabirou se descunho à uno debalhado; Te salbaras sus la pared.

Las bacos, talhèu que sentiguen le cabirou darrè, tirabon tant que poudion, mè la lhampo, l'aigo e les rocs las espantabon; Quand uno tirabo, l'autro retioulabo e Janou abio trebalh ande las amanhaga e ande las jè tira toutos dos al cop. Anfins, le parelh sourtic le l'agal e prenguèc le cami que debalho per la coumo, al bort del riu. Le cabirou rouncabo per darrè las bacos e, quand atrapabo un bouci de lhampat, uno debalhado, se lançabo. Alabets las bacos tibabon le cap ande teni la bigo: le cabirou butabo dessus e n'anabo pos pus lhèn. Mèn à la debalhado de Bertrenat, à forço de beni buta sus la bigo, le cabirou se descunhèc e passèc entrans las camos del parelh.

— Garo! garo! se cridèc Nourè.

Janou, qu'abio bist le mal parat, èro deja quilhat sus la marge d'abelhanhiès quand le cabirou passèc darrès elh, dins un bruch de trounedado e s'anèc plhanta dins la pared, un chic pus abalh, à un rebiret.

Nourèn ande l'pal, desenterrèc le cap ande poude tourna cunha. Janou, elh, amanhagabo las bacos qu'abion le pel erissat e la broumo penjado al mour. And'un arpat d'èrbo seco arremassado am pèd d'un matas, Janou i ous eichugabo la babo e i ous passabo la ma sus l'colh. Las bèstios apelhados per lhour noum se dichabon fè e, un chic pus tart, quand le cunh fec prèt, Janou las sarrèc del cabirou.

Fè tira, se deguèc Nourè, e n'ajos pos pöu!

L'atelatge tournèc parti cap al founze de la coumo. Que de debalhados lhampados, que de rocs lhusentis, que de rebirets mal aisidis, que de camis estretis nou calguèc siègue abant de se touba, anfins, sus l' plhanhiè. Tant que passèguen arrans la bedo, Janou se gaitèc les abets bairebe autant que l'parelh. I senlhabo qu'èro l'encantaire de l'endreit que, jelous de beire que s'en pourtabon le cabirou, abio fèit creiche la lhampo sus l'cami ande's empacha. Chi sap, belhèu anabo sorti de darrès un abet. Coumo la bedo èro escuro!

Quand ajèguen despassat las lhapparros de la Countenciou, dins un cami estreit ount le parelh fregabo las paretas de cado part e que feguen al plhanhiè de la Prado, Nourè e Janou aturèguen las bacos ande las dicha alenda un chic.

Uno grosso fumatièro sourtio de las nasics de las bèstios e se perdio dins la frescuro de la maitinado. Fasio fret mè toutis susabon. Janou, apuat sus l'julh, alhisabo le pel rous de la Ramé que broumejabo toutjoun. Anem, calio tourna fè tira. La plharando del soulelh que s'anabo lheba, al cap del Ticol, roujebabo de mès en mès. Lhèu, la campano de la 'scolo anabo souna.

Las bacos, sus l'plhanhiè, repepitjabon tant que poudion ande tira l'cabirou, sustout quand aqueste estrabuncabo darrès un roucas. Coumo tout èro cambiat: elhos qu'abion tant retengut andel'julh à las debalhados, calio que tirèsson, aro, à touto forço; Qualque cop, n-h-i abio uno que, tout d'un pic, s'aturabo e le parelh, alabets, se troubabo le mour birat cap à la pared. Janou, tout siau, mè la toucadouro debant les èlhis, le tournabo dressa e l'apelhhabo. Las bacos, doundados, tournabon jè tibia las barros del colh e le cabirou seguio.

Quad ajèguen passat le darrè rebiret e que se boutèguen per la Carrièro ablh, le cabirou rouncabopus fort darrès le parelh e Janou, tout debant, n'auro pos dichat la siu plhaço per res al moun.

Coumo passabon debant la ièro, las bacos alabets bulguèguen tira cap al porje. Mè nou, calio debalha juscos à Campanho ount jant les cabirous s'empieloutabon ande se seca abant d'ana al ressèc. Le tems de descunha, sarra le cabirou sus l'pièlot e la campano de la'scolo sounèn.

Bite, Janou s'en anèc à maisou, se beguèc un bol de lhèit tengut al caut prochi del cantou e, and'ana pus bite, rescoumpassèc la pared de la 'scolo.

Trop tart, la regento, un lhibre als digts, fasio la lecturo d'un counte als mainatges.

Janou, que s'alhesabo entrans les bans, gairebe à gratipaudos l'ausic que disio:

Dins aquelho bedo, l'heno de mistèris, out jant les abets, les agreus e les bouiches se gardon las fêlhos, l'ibèr, parce que soun fredeluquis, i abio un encantaire que boulio....

La regento s'aturèc la mièi de la linho, se gaitèc Janou, tout crnetous, que se boutabo le cartou al pèd del banc e i diguèc:

Me faras trento linhos, aquesto brespado!

## LA DALFINADO.

Fasio caumas. Janou s'en èro'nat de boun maiti dalha l'auserda del Col de la Fajo, arrans Labelhanet. Le soulelh touquèc e camp à peno se benio d'acaba le prumiè reng. Sulpic, Janou le troubèc maichant. Apèich, èron aquellos mouscos que bolon quand on a les trounics, que l'embaeichion. S'abio sourtit la camiso ande dalha pus aisit mè calguèc que la se tournès, autroment le s'auron chapat.

Tout'n agusan le dalh, Janou se gaitabo qualque cip la solo de la coumo e le bilatge per aro dins l'oumbro. Dins les restolhs, les trasinhiès se couitabon de carga les garbaros sus brèsses dels ases, ande's s'en pourta; Dins las ièros, escroumbados de fresc and'uno balejo de bès, las gents estendion deja la cortado que secaro al soulelh rajant. Siro un joun d'estiu e de calou.

Janou se couitabo de dalha. Ero coumbengut que sa maire i pourtaro la toupino al camp de Labilhanet, ount le blhat èro 'n gabèlho desempèich dous jouns. Quand auro dinnalhat, gaita-ron de l'estaca abant que dio trop caut e que la palho se frousoulhe.

Le darrè reng pel sol, Janou, ande l'fourcadèlh, desfec l'ausèrdo, ensa enha. Coumo'co s'en prendra se pensèc elh e, dins la brespado de douma, la pouirè beni quèrre ande l'ase.

La maitinado s'abansabo: aro, le soulelh rajabo pertout. Per Bareto' balh, de l'autro part del riu, les darrèris simbouls de las bacos que benion le pèiche à la Couetèlho acabadon de passa. Janou plhantèc le fourcadèlh à la raso de l'auserda, boudèc l'aigo de la coulièro sus la cantulho, se boutèc les martèlhs e le dal sus l'colh e s'en anèc cap à Labeihanet.

En arreban al camp, Janou bailhèc un cop de pèd al prumiè gabèlh, al bort del pas. Le blhat èro sec à fèt e la palho rasounabo jous l'cop de pèd. Anem, se pensèc Janou, quand aurè manjat un mots, ja sira l'ento de lia. Anèit, le pouiron pos touca taloment siro sec. Justoment sa maire passabo l' pas, la toupino à la ma e le cridabo:

— Bene aci, jous l'ciriè, siras à l'oumbro.

Janou se gaitèc encaro les gabèlhs; le blhat èro carano, i abio pos ni èrbo ni cardouls, mè se que palho e espigts repecoutadis. Fara plhase and'ana beire la Mouliño.

Dijous l'cìrè, ount l'oumbro lhaugèro dichabo trabessa qualque rajol de plharou, Janou se manjèc l'asinat e sa maire, que sèro sietado, alendèc un chic e s'eichuguèc la susou.

Durara pos aquelh tems. La sal èro molho aquem' maiti. Pr'achi-n-abalh, las gents se couitabon de fè la prumièro courtado. Sèi pos se tournaran estendre; Auses se trucon?

Coumo fèt, on ausio les pics de las batoulhos que s'acourdabon dins las ièros, ensa enha. A la courtado qu'èro prochi la fount, e dibio abe cinq ou qièis bateires and'escabessa. Las batoulhos fiulabon e le qu'acabado la rengado de pics trucabo tant que poudio: le gra dibio jisca!

— Ja l'abèn, se tournèc dire la mairé, que se rebirabo suen cap als Lhabarièls. Gaito te so qu'arribo!

Janou s'èro aturat de manja. Al colh de Gamèl coumo s'èron espelhidis tout d'un pic, de grossis roucatèlhs negris pujabon e coumensabon de jita ombros sus la bedo. Le cèl se mascarabo.

Ja ba trounida. Les nhiffalhs me chapabon aqueste maiti.

-Me bau couita de jè gabèlhs. Acabo de manja e bene lhèu. Nou n'biren se besèn la malparado.



Sa maire, le bilhot à la ma dreito, fasio les gabèlhs en sautan la gabèlho, pel founze del camp; La palho, touto caudo, rasounabo. Janou dounabo un cop de ma per darrè la vantulho s'abio besoun de catza, se prenio un arpat de palho, la toursio per ne fè uno lio que passabo sus l'gabèlh e qu'stacabo d'un cop de bilhot. Apèich, passabo sulpic à l'autre gabèlh e las arbos, darrès elh, fasion un o rengado d'or touto repicoutado. Sus espigts, que durbion las arstos juscos à beire le gra taloment èron secos, les grels e les bernat- pudens fsion la peto-reguinno. Cado garbo liado, Janou se lhebado, se gaitabo l'tems tout plhe d'èrnho. Les roucatèlhs se fasion pus nautis, l'oumbro s'esparricabo pels prats abalh, le cèl se fasiopus irètge. Just à-n-aquel moument un trounic esclampètèc, seguit d'un autre pus fort encaro.

S'en cal ana, se diguèc sa maire. Abè la grellassado.

Nous anan assouganti. Prente l'dalh e courrèn. Me tardo de beire un tet ande m'arresta.

-Passo debant. Acabi de lia la que tani e te siègui, se respoundèc Janou.

Sa maire, la toupinou à la ma, s'en èro fujido. Deja l' siu casabè se perdio dins le cami roucatelhut asoumbrat jous's abelhanhiès. Del bilatge, le bruch de las batoulhos s'ausio pos mès: las gents dibion plhega la courtado.

Mè Janou l'aimabo trop le siu blhat qu'abio semenat, sarplhat, segat. Es trop poulit ande que l'dèiche grelassa: abant que la plhèjo sio achi cal qu'ensaje del lia.

Alabets se couitèc de fè las lios. Le cèl eichaurit s'escureichio. Las brumos s'èron arrapasos de la bedo e coumensabon à baicha. Janou n'abasabo e debrembado d'aparta l'cardoulh e la roumendière, coumo de dèu fè, d'un cip de bilhot. Les sebes dounouls fasion gemega la garbo quand s'adounoulhabo sus elho ande la bilhouta. La susou i debalhabo pel cap abalh e, quand se lhebado, s'eichugabo les èlhs ande l'couèng del pendou que i sourtio d'uno jpocho traucado. Se souloment abio pouscut lia abant que lhabasse!

De tems en tems, jitabo un cop d'èlh de la part de Gamèl que se fasio toutjoun pus burèlh. Las brumos, que se tumabon, s'abrandabon tout d'un pic, e la dalfinado fasio plhareja la bedo qu'èro dins l'escur;

Apèich, la lhoungo trounidado jitabo l'espant sus ausèlhs que se couitabon de s'en aba jous las fèlhos que nou bouludabon pos mès. Qualque cop, le dalfi èro ta biu que le trounic petabo sec, coumo se qualqueres s'èro coupat dins le cèl. Entrans dous trounics, Janou auso la bouts de la Tunè que, d'un pic, mestalhado dins uno lhoungo trounidado, la bouts de la campano, aro, pujèc cap à-n-elh. Chi sap s'arrbara al cèl ande bera le mal parat? Nou n'sè! se pensabo Janou. Mè, pr'achi-n-ablh, ja n'an pöu! Dins las ièros talhèu escroumbados, las gents se demenabon e esparrecabon la palho d'un escarje qu'empacharo la plhèjo de s'en pourta la bouso.

Janou tenio la darrèro garbo: anem, la calio fè poulido aquesto, sero la que cal ande jè le capulh. Janou, mort de set, artrapabo cap al founze del camp, al bort del pas. Achi, ne boutèc tres amasso, las estaquèc touca l'espigt ande dos camos de blhat e las dressèc sus l'plhanhiè. Ba plha, soun plha quilhados. Aro, cal ana cerca las autros. Janou, coumo l'bent, se coumensèc per las que se troubadon le pus lhènh. Coumo fasio la courrido à trabès le restoulh un esplhop s'arrapèc à uno courrejolo per la gansolo e se perdèc. Alabets, Janou jitàc l'autre: coumo'co sirè pus lhaugè, se pensèc elh e ta bite que l'dalfi tournèc cap al pas and'un biatge de garbos plha granados.

Anem, sira lhèu acabat: le garbarou èro tout quilhat al bort del cami. Janou èro content d'elh; D'un rebèts de ma, atioulèc la pus grosso garbo, la del capulh, blhinquèclas camos de blhat ensa enlha e la boutès sus l'garbarou.

Deja als Lhabarièls la plhèjo casio sus la bedo. Mès qu'aco, les rengs de la grellassado se besion que debalharon e fasion un bruch pus fort que la brounhido de l'agal. Goutos lharjos coumo boutous de capeto casion sus l'restoulh, ensa enlha.

Janou, pintat per l'audou jèito de calou, de mentastres e de tèrro assougantido que pujabo del camp aro netejat, acabèc d'estaca le capulh al garbarou, courric cerca le bilhot, l's esplhops les founhièc entrans dos garbos; Pèich, plhe de joio d'abe salbat le blhat, se pren le dalh e le plhanto sus la garbo la pus nauto del garbarou. Ero tems, la grèllo traucabo la fèlho dels ciriès dins la marge.

Janou ajèc lhèu fèit de se founha, elh tabes, dins als garbos. Seitat pel sol, plha remicoulat, se gaitabo la lhabassado qu'abio tout escuresit dins la coumo. Mè l'escur durabo pos: uno dalfinado jitabo la siu plharou que fasio lhuse la grèllo. La ma foro del garbarou, touto dubèrto, l'ome apescabo l'aigo e la se passabo sus las maichèlhos ande se refresca. Les sibis efants pouiron abe la couco, aqueste ibèr, aro ja n'èro segur!

Tout d'un pic, le malur arribèc. Les que n'ag an pos bist se poden tampa's èlh: un dalfi pus fort que toutis autris jisquec del cèl, al dessus de Labelhanet, sourtic d'uno brumo vegro que passabo al dessus de del restoulh e debalhèc coumo 'no rego de foc. Le trounic que seguic sulpic, sec coumo'n cop de martèlh, fec tremoula le Roc de Labelhanet, mè le mal s'aturèc achi. Le dalfi, elh, se benguèc plhanta sus la lhamo del dalh e le foc abrandèc le gargarou. Janou, tout despulhat, fec arrounsat al mièi del camp, le nas al sol.

La grèllo e l'aigo que i casion dessus coumo chi l'abètzo le refresquèguen e, un chic pus tart, se lhibèc, nut coumo un bèr e se palpèc. N'abio pos res de coupat, mè les sibis pelses e las cilhos èron rumadis e sention le roussit;

Alabets, Janou se passèc la ma sus l'cos ande se lhaba. Pièich, s'aprouchèc del garbarou qu'acabado de brandeja. Le dalh, frousoulhat, èro dins le marjal.

Janou s'adounoulhèc sus la cantulho rumado, junhic las mas e, les èlhs biradis cap als Lhabarièls, diguèc:  
— Senhou, m'as tout panat, mè me dèichos la bido!

Janou es passat à la bordo del Colh de la Fajo ande se prene un pantalon bièlh que serbeich al pastou ande muda, le joun d'uno lhabassado; Apèich, pèd nut, s'en es bengut.

A maisou, les sibis le memoron. Que dèu fè? Quand le besin arriba, presque nut, las cilhos rumados, toutis le palpon:

— Qu'as fèit? Que t'es arribat? Qe t'ès cremat?

Le foc del cèl m'es casut dessus. Abio fèit un garbarou, le blhat s'es abrandat. N-h-i a pos pus à jèt!

La mamai plhouro:

— Que manjaren l'ibèr? Un blhat qu'èro ta poulit quand le seguègui!

— Calho te mamai. Tiraren lhenho and'abe pa blhanc.

Nou n'arrincaren bessé. Apèich, qualcus be nous prestara un bouichèlh de semenço. E l'an que be, auren un lhat encaro pus poulit que l'doungan e pus espigat!

## LA LHEBRE DE RABOT.

En sourtin de la 'scolo, nous arribadosuen de trouba, sus l'nostre camí, un bièlh ou uno bièlho que nous dision istouèros de d'autris cips: countes d'agals, de brumado, de brèichos, d'outses ou de malo-fèito. Me bembí toutjoun d'aquelh Josepou que fasion canta al pas del Besinat, quand s'en ababo croumpa dous souses de preso chè la Lhibertè. Se poudio pos desfè de nous autris tant que nous abio pos cantat à cad'un, de la siu petito bouts:

N'es pos la salado  
Que i fa la puntounado  
Ès un gros mal al cor  
Que i ba mena la mort.

Tems, nous èron toutjoun demandadis so que poudio èsse aquelho malautio que s'en boulio mena cap al cementèri uno filho poulido e brabo coumo la gilho de la cansou de Jousepou!

Un autre bièlh, tabes, nous fasio debremba aisidiment que le brespalh nous demourabo. Ero toutjoun bestit d'uno bèsto de belou, d'unos grègos lharjos ande pochos ta grands que s'i embarrabos les utisses dedens. Rabot, es atal que l'apelhabon, èro menusiè. S'anabo à la journado ande l'mèstre de bouès que i sourio d'uno pocho el e nibèlh que desassabo de l'autro. Mamai disio suen que siro estat un boun oubriè se n'anabo pos toutjoun beure mièjo e Papai, elh, disio que n'èro pos qu'un chapaire.

Mè, per nous autris, que nos poudio fè que fesso un boun oubriè ou un chapaire, So que nous abradabo le mès èro quad le besion sus l'cami de Nalham, la cinto plheno de cartouchos e le fusilh sus l'cami de Nalham,

la cinto plheno de cartouchos e li fusilh sus la 'spallho, un fusih à maitat rouselhat que dibio abé cent ans de dimenges.

Rabot nous disio, d'un aire mesterious, que s'en anabo espera la lhèbre dins les bosques de Nalham. Espera la lhèbre: aco nous berabo l'cap e ja l'besion, darrès un matas de fach, demoura la lhèbre ande i tira un cop de fusilh.

Apèich, èron toutos aquellos estouèros de casso que Rabot nous disio tout'n quequejan, les èlhs plhenis de maliço, la lhougo moustaicho blhanco que i bouludabo coumo se i abio agut auta. Que de lhèbros rusados n'abio tuat à forço de las abinha, que de mandros plhenos de doulentisos n'abio atausat, que de sangliès n'abio berat dels gabatches ou de las sibados dels pus nautis camps!

Nous autris le nous escoutabon, estabousidis. I abio plha d'aquilhos maichantos lhengos quen nous dison:  
— Que l'escoutats, aquelh chapaire? Las lhèbres i fan pöu, chin boulèts que las attrape? Mengant, disèt i que la bous fasso beire la prumièro qu'attrapara!

Mè tout aco nous agradabo pos gaire e nous estimabon mès escouta Rabot e le nous gaita passa, uno brespado de la tardou, cap als bosques plhenis de caminots.

Un joun, pourtant, nous abisèguen que Rabot cassabo pos pus. On le besio pulhèu chès la Lhiberté, jouga mièjo à la manilo, ou passa pel carriè enlha anassen fè la belhado chè l'Moulinhiè. Que i dibio abé de coupat? I abio jes pus de lhèbres dins le besc, ou las camos de Rabot boulion jes pus camina cap als esquerjes? Nou n'sè!

Uno brespado de la tardou nous troubadon, Janou del Tu, Pierrou de Malubèr, Tonèn de Luc e ieu debès Campanho en trèn de jouga al toi. Rabot benguèc à passa.

— Ount i anats? se diguèc Janou.

— Bau pos plha lhènh, se respoundèc Rabot.

— Pus qu'abèts le tems, parlats nous de la bostro caso, se i diguèc Pierrou.

— Chin ba que i anats pos mès, a la casso, se i demandèc Tonèn.

— Ca... cassi pos mès, se diguèc Rabot. Desempèich le darré cip e jurat de dicha l'fusilh al granhiè.

— O ba! se diguèc Tonèn. Ja i tournarets un joun.

— Ja'guè dichat, ja. Me faro peno de tua la lhèbre que parlo ta plha que bous autris.

E alabets, Rabot, tout'n quequejan, nous diguèc so que i èro arribat le darré joun que s'en èro abat à l'espèro de la lhèbre.

Aco de passèc à la fi de l'ibèr darrè, se nous diguèc Rabot. Abio casut tant de nèu aquelh cip, que tout ni demourèc abrigat un fhoc de tems. Apèich, le fret qu'èro bengut avio tourrat le cresse de la nèu bièlho e aquesto pourtabo. Sus aquello nèu tourrado, dous trabèsses de digts de nèu noubèlho èron casudis dins la nèit. Alabets, me pensègui que bero plha and'ana espera la lhèbre debès le Sol del Bosc. Melhebègui abant le joun, me boutègui les guetous, la capeto e l'fulilh sus la 'spallho e birègui amount cap al Ticol.

Achi, èro un plhase de routa la nèu fino, casudo de fresc, e de trouba per dijous un tartiè de nèr que pourtabo à fèt. Me regalabo de camina, à la punto del joun, sus aquell abrigalh blhanc, qu'amagabo mèmo les pus nautis genibres. Sus la nèu casudo de la nèit, las bèstios salbatjos abion peniquejat, ensa enlha, ande s'ana cerca qualqueres à chapa. Las lhèbres e las mandros abion fait pèdjos que s'èron pillados las unos dins las autres. Bèlh cop d'aquellos pèdjos d'en anabon dins le bosc, cap à Lhasquir. Le joun, aro, blhanquejabo. Le cèl, phe de brumos negros èro erètge, mè la nèu nou casio pos pus. Quand dentrègui dins la bedo, al coumensament delcami de Lhaquir, aprèts le plhanèlh del Sol del Bosc, un petit bent fret que pujabo de Baichon me fasio caire sus l'cap la nèu que s'èro arrapados sus las blancs de fach.

M'en abègui pos plha lhènh: me boutègui al dessus del cami, birat cap à Lhasquir, estendègui la capeto sus la nèu à uno plhaceto de carbounhiè e me sietègui dessus. Apèich, me boutègui le fusilh debant ieu, tout cargat, le canou apuat sus uno branco, à pourtado de la ma. Fasio taloment fret, aquillo maitinado d'ibèr, que me calio buffa as digts autroment auro agut las fitos.

M'auro plha boutat un pelhot sus la aurelhos ande me bera l'bent, mè be me calio escouta s'ausio bouluda dins les batasses. Suen, m'arrebabao d'attrapa le fusilh, tout nou, n'èro pos que la nèr que dibio dire istouèros del cèl als abets. Apèich, le bent se benio bouta la miè e las abetalhos se descargabon de la nèu triso que casio pel sol. Sulpic las blancs s'anairabon, toutos alhaugeridos; en gemegan.

Chi dap se quand de tems demourègui achi and's èlhs que me plhourabon del fret e que me fasion brumadèlhos à forço de gaita a mèmo endreit? Nou n'sè!

Tout d'un pic, pel cami de Lhasquir, que bigui beni cap à ièu, als quatre pèds? Uno lhèbre! A! ja poudèts creire que n'abiabo ja! Le tems de prene le fusilh, d'afusta, la bèstio s'èro dja reberado sus l'plhanèlh e prenio le cami cap à Milhaus. La bous auro calgudo beire rebira, d'un cop de tioul, al mièi del plhanèlh, la nèu triso jiscabo pertout. E ieu ne disio focs del cèl, per un cop qu'abio uno ta poulido lhèbre, la m'abio mancado! Abio tournat pausa l' fusilh, tout dreit arrans le fach, ande me buffa als digts quand, debinats, uno outro lhèbre encaro, ta poulido que la prumièro, me tourno passa jous l'nas, arribo sus l'plhanèlh, se rebiro ta lhèu que l'autro e camos adujats-me cap à Milhaus, sense que ieu ajèso agut souloment el tems de bisa.

Que bouliots que tirèssò? Merça las cartouchos? Soun trop caros al joun de bèi!

Ne passaro pos pus aro, me pensègui ieu, n'è pos res pus à fè qu'a m'en tourna. M'anabo lheba, quand ne passo uno outro e pèich uno de mès, e cado cop, le tems de bisa, s'èro forobandido. Dèts que ne passèc, coumo'co, e se n'abio pos cresut qu'èro toutjoun la darèro que besio, ja n'auro tuat uno al mens. Las dèts lhèbres passados me lhebègui, me soucadigui la capeto e m'aprestègui ande lhebègui, ande m'en tourna. Just à-n-aquelh moument bigui arribal al ounzièmo. A! ja la tenio aquesto: ranquejabo! Ajègui fec gairebe arrans ieu, anabo tira, alabets la lhèbre me bic, gaitèc un moument e me diguèc:

— I a plha tems que soun passados, las outros?

— Be.... be.... benen de passa aro mateich....se i respoundègui ieu le fusilh baichat.

La lhèbre se boutèc à courre coumo s'abio l'foc al darré e prenguèc, elho tabes, le rebiret de Milhaus, tout 'n ranquejan. N'abio les brasses coupadis. Uno lhèbre que marlabo! Que l'auro pouscudo tua!

Alabets, ajàgui lhèu fèit de m'en ana. Al lhoc de m'en tourna pel Ticol, me boutègui per las Garrafoulhèros abalh; Ala cri dels Lhabarièls, sernio la nèu coumo farino. Aquelho farino se benio empielouta dins le plhot de Coumo-Croso, sus uno grando cunhièro e la coumo se fasio de mès en mès estreito.

La primo que be, me pensabo ieu, les isards n'auron pos besoun de fè l'tour: rescumpassaront!

A soustal troubègui toun paire, à tu Janou, que coupabo la lampo dins les rècs d'asaiga ande fè beure l'escabot. Talhèu que me bic, toun paire me diguèc:

— Que....que.... qu'è bist uno lhèbre que parlabo!

— Uno lhèbre que parlabo? E que desparlos deja?

Bè te calfa, bè, busaroc! En paddan debant la Lhibertè, fè te fè un bi caut. Sira pos de rèsto!

Nourè me diguèc enca de dentra un moument dins la bordo ount las gouelhos, que s'abion acabat le dinnalha, s'èron coulcados e roumiabon. Uno calou douço m'embostisèc e m'adurmigui gairebe. Fasio bou dins la bordo, ount le bestia plha relicoulat al recès e sadoulh, s'anujabo pos. Les anhèls, fartis de poupa, s'èron coulcadis arrans as maires e i ous passabon se cou le bent fret buffabo ta fort quand la porto se durbio e pourtabo belhugos de nèu que se foundion dins la calou del parsou. Las maires, s'aturabon de roumia, alabets, e lhebabon les anhèlhs que s'adurmion, elhis tabes.

Quand fegui escalfurat, que la nèu se fec foundudo à la semèlo dels souliès, m'en benguègui e dichègui Nourè qu'anabo apastura las gouelhos abant de baulha la porto.

Desempèich aquelh joun, soun pos tournat à la casso.

M'è bendut le fusilh al baichelhaire. Me faro plphase de i tourna, mè me faro plha peno de tua lhèbres que parlon. Chi sap so que dèu èstre aco?

Rabot abio la moustaicho bhlancoque i fasio ombros sus las maichèlhos quand ajèc acabat li siu raconte. E nous autris ne debrembèguen de plhega le toï que dichèguen al miei del cami, aquelho brespado. Las lhèbres que courrion cap à Milhaus e parlabon à Rabot nous senlhabo qualqueres que n'abio pos cap de noum. Belhèu èro brèichos de Lhasquir que s'en ababon teni l'sabat sus l' plhanèlh de Milhaus. Le grand sedas que sernio la farino sus la cri dibio èstre goubernat per uno que boulio fè fèsto à las outros, arremassados sus l'plhanèlh emblhanquit de fresc.

Rabot abio rasou: d'aro à l'enlha calio pos tua las lhèbres!

## LA BESSOULHADO.

Ero un poulit joun de la tardou, un joun d'auta e, mèmo à l'ubac, i abio pos res de gelat.

Janou èro pujat de boun maiti à Soustal, alharga dins la bedo! Les camps e les bousigasses èron rasplhadis à fèt. Dins les bosques, i abio pos res pus que la brougo mè, ande l'auta que fasio, siro mès que richo. Dins la bedo, al mens, i auro enlha qualque fêlho de gerses ou qualque plhapet de pel de cap que n'auron pos encaro plha patit de la tourrado.

A la fount de la Carrièro, Janou abio troubat la Saletto, uno bièlho à maitat brèicho, que poussabo aigo dins uno dourno.

- T'en bas phla d'ouero, bèi. Qu'as pöu de i poude pos abasta,
- Las me cal mena à la bedo, bèi que fa bou.
- J'as le temps bè. Porto me la dourno, que me fau bièlho.
- O, que n'è jes le tems. Ja las perdras las gouelhos, aquesto brespado!
- O nani, ja las tendrè de prochi. Se dins le cas las perdi, las cercarè.
- Tio bè! Ne tournaren parla anèit.

Talhèu arribat dins la ièro de la bordo, Janou boutèc la nauqueto en plhaço and'assala, pusque fasio eichut. La porto dubèrto, las gouelhos se jitèguen sus la sal e, la nauqueto lheapado, Janou las enguindèc cap al bosc sense i ous bailha un mots. Bèi rait, se camparon deforo, siro tant d'estalbiat per l'ibèr.

Dins le bosc, las gouelhos se boutèguen sulpic à la birado, cap à Milhaus. Abion coumpres que biron lhènh: le pastou las menabo pos dins les bousigasses coumo abion pres le plhec de fè les jouns out les ubacs èron geladis e quand calio demoura que la rajado ajès passat pertout. Janou se tenio debès le mièi de la birado e las seguio de prochi, bisto que se calio pos retarda.

A siu ma esquèrro, per la cabesso del bosc, à touca le cami de Milhaus, on ausio l'esquilho de la Pigo, la gouelho la pus degourdido, la qu'abio le mès de balans. A ma dreito, pel founze de l'escabot, èro l'esquelhou de l'Elh Negro que s'en menabo toutos las que tirabon al flhèich. Quelques unos se dimourabon trop endarrè ande se rousega les camparols que creichion al pèd de las soucos pouridos. Janou, alabets, beire à Ponpon que las anabo moutsega à las cabilhos e las fasio fuje, un tros de moussairou al mour.

Un anhelat, sustout, n'èro pos d'accort ande l'gous. Embèfie de neichenço, abio toutjoun la maliço de fè repèd dins le bosc ande s'en ana abarra a seguel de las Garrafoulhèros, d'uno courrido. Apèich, quand èro fart, benio tourna ensaja de pèiche, demmèts las autres. Anem, j'èro achi, ande l'escabot. Tout anabo plha.

Las bèstios, toutos esparricados, s'aprouchèguen del Prat de Malubèr. Janou passèc debant, pel cami de Milhaus e las demourmèc, abant le plhanèlh. Talhèu que las prumièros arribèguen, menados per la Pigo, las dichèc pos rescoumpassa el cami coumo boullion fè, mè las enguindèc cap à las Bartos. Chic à chic las autres aribèguen e, sense que Janou ajès pos res à fè, s'en abèguen, elhos tabes, dins l'autre bosc, en sièguen le sou de las esquelhos de debant.

Quilhat sus un tussal, Janou las de gaitabo passa. Uno à uno ou quatre ou cinq amasso, las bèstos rescoumpassabon l'agal des Courbasses, bebion un cop, e pèich se boutabon à routa l'embrun noubèlh e se perdion dins le bosc. Les anhèlhs petitis, que n'èron pos encaro bengudis ta lhènh, belegabon quand ausion le bruch de l'agal. La maire i ous respoundio e, alabets, ensajabon de trabessa. Talhèu de l'autro part, ne proufitabon ande 'icharluta un chic de lhèit. Le m'i caldra fè teni, abant d'embarra, se pensèc Janou. La mourano, touto negro and'uno estelo blhanco entrans les dous èlhs, la soulo negro de l'escabot, anabo passa l'agal, elho tabes. Tè, se pensèc Janou, a doublhat le braiè desempèich fasiè, ba lhèu anhelha, m'i caldra teni l'èlh.

Alabets, la cridèc e la Mourano, quand bic que boutabo la ma à la saqueto, se benguèc cerca un croustet que se rouseguèc, sus l'jas, en le se gaitan plheno de contentement. Apèich, se boutèc à courre, tout menudoment, genado pel siu bentre que i pesabo trop e se perdèc, elho tabes, dins la betzano del bosc. Aro las darrèros passabon: la Quouèlo, la Crabito se couitabon de trabessa. Le sou dels esquilhous s'ausio pos mès. Janou, alabets, s'anèc amourra à la fount de Milhaus que coulabo dins uno solo de cressou, beguèc un cop e peich pujèc al plhanèlh. Auro lhese de i ana fè un tour del tems que l'escabot trabessaro le bosc, al dijous del plhanèlh, se pensèc elh, le biro atenhe quand siro dins les prats de Nauseno.

Le plhanèlh aquelh joun, n'èro pos berdousenc coumo l'estiu. Rasplhat à fèt pel bestia, èro tout terrous e i abio pos res pus à manja. Calio demoura la primo ande beire refè le farouch salbatge. Sulpic, Janou bic, un chic pus lhènh del cami, qualques que boulludabo. S'aprouchèc, siautadoment, tout'n jèn sinne à Ponpon de se demoura darrè. Quand nou fec pos pus qu'à quelques passes, bic qu'èro un poulh salabatge que s'alhisabo las plumos ande l'bèc. La bèstio le besio pos beni, Janou lhebabo deja l'bastou ande l'ataussa, mè le poulh lhebèc le cap, just à-n-aquelh moument, l'emboulèc e pèich s'anèc apausa un chic pus amount, al mièi del

plhanèlh. Chun doumatge, se disio Janou, s'abo saput i auro tirat le bastou d'un tros lhènh. Belhèu l'auro apuntat. Menhant, me cal enfaja aqueste cop. Janou s'aprouchèc, tout siau, e, quand fec prou prochi, lhebèc le bastou e le i tirèc.

Mè le poulh s'èro tournat lheba, abio boulat un chic e s'èro amagat darrès un genibre, al cap del plhanèlh. En fèn le tour del genibre, belhèu me pouiro aproucha un mès se pensèc Janou e, à gratipaudos, d'un genibre à l'autre, le pastou s'abansèc. Coumo n'èro pos pus qu'à dous mèstres lhènh, se gardèc l'alende ande prene balans e, al moument ount anabo lheba le bastou pel troisième cop, le poulh, que se mesfisabo, s'emboulèc encaro, rasèc le plhanèlh e s'en anèc pel bosc de las Barthos ablh, cap à l'endreit ount jat dibio èstre, al mèmo moument, l'escabot à la birado.

Janou abio perdut le siu tems, es tout so qu'abio fèit. Alabets s'en anèc bite cap à Nauseno pel caminot que meno à la bedo. Achi, l'escabot se dibio trouba dins les prats.

Quand Janou aribèc à l'agal, n'ausic pos res que le bruch de l'aigo que marmusabo l'istouèro de toutjoun. Pus de sou d'esquelhou en lhoc. Se boutèc sus un tussal, se gaitèc la coumo, cap à Bertrenat, res en lhoc. Be fan plha rampèu, se pensèc elh, bilhèu an troubat la brougo pus fresco dins las Barthos.

Janou fec repèd juscos Milhaus. Achi, se founhèc dins le bosc de las Barthos, cap à l'endreit ount las abio dichados quand seguio l' poulh. Res en lhoc. Debalho jusco l'Roc de las Barthos, d'ount on bets le bosc jusco l'riu, res en lhoc encaro. Escoutoun moument: cap de sou d'esquelhou, cap de belèc n'aribo jusco las sius aurelhos. Res que le piulet del gai: Piou.... piou.... que l'auselhas jitabo tout'n fèn roundinèlhos al dessus del bosc. T'ès taloment amusat à siègre aquelh poulh, que las gouelhos t'auran pos demourat, e, coumo i abio pos res pus à pèiche dins les prats, l'en siran anados toutos soulous dins la bedo.

Janou s'en tourno à la bedo, pel caminot. Quand fec jous's abets, sulpic, fec estounat de l'escur que i abio. Ja se besio que n'èron pos mès à l'estiu, le soulelh èro deja birat de l'autro part el la bedo, dins les ubacs, èro ountoumbribo. Aquesto, trabessado jusco l'Agal de Coumo-Croso, nou dichèc pos beire ni ausi cap de gouelho. Mès ount diablhe èron passados? Janou, plhe d'èrnbo de mès en mès, rescoumpasso l'agal e s'en ba debès Farnhaus. Al Pijol, quilhat sus un roucatèlh, las cimos dels abets èron als sibis pèds. Mès elh besio pos res, ni la mar de las abetalhos frescos e aberidos, cubèrtos de pinhos, ni la pnto dels abets que jiscabon cap al cèl e que se dichabon bressa pel bent d'auta, ni las ombros del soulelh que coumensabonde puja de l'autro part del riu e qu'èron deja à mièjos. Barthos, ni las brumadèlhos que s'esparricabon dins la coumo e qu'emboustissabon les aibres desfulhadis d'uno telo de coutou'n ramo. Janou gaitabo souloment se besio sourti de darrès un matas, sus uno cri, uno taco blhanco de bourrèc. Mès res nous se besio, res que dos bacos, alha, al pèd d'uno bordo, que peichion las darrèros fèlhos d'un alba, abant de s'en aba beure al rèc d'asaiga. Janou estirabo l'colh tant que pudio, belhèu ausiro un esquelhou aci ou alha, eescoutabo d'uno part e apèich de l'autros, le bruch le l'agal que bressabo las mandros adurmidos dins las tutos ou l'ase de Pistoul que bramado dins les camps de Soustal quand bedio la bourrico de Toussèn que se ganhabo la seabado dins le ginesta dels Bousigasses Plhanhièris.

Mè ount èro passat l'escabot? La Saleto abio rasou: falas abio perdudos aqueste cop, e plha perdudos. Chi sap, i dibio èstre per qualqueres, elho! Abio maichanto regardaduro quand i abio pos boulgut pourta la dourno. Belhèu s'en èron anados per la bedo amount cap à Coumo-Croso e las abio mancados?

Janou fa repèd un moument e quand tourno passa à l'agal de Coumo-Croso se founho per la bedo amount cap al plhot. Dins les moullharals, cap de pèdjo en lhoc. E se soun passados à l'eichut? Menhant, cal puja toutjoun. A Coumo-Croso, Janou s'i fec pos bièlh. Res en lhoc. Res que le soubeni de l'Ome pelut que l' fa courre, tout'n se rebiran cado dèts passes, cap à l'Agal Grando. L'agal, que s'anujabo sense bacos, nou diguèc pos res al pastou aro desalendat de tant trasteja. L'Agam Petit tapauc, rescoumpassado un chic pus tart, boulguèc pos èstre pus sabneto que la siu besino. Janou, alabets, se founhèc dins la bedo del Roc e la trabessèc d'un cap à l'autre, sense s'atura à fè despieits als fourmigals qu'on elh, dins Lhasquir, fasio escur coumo uno gorjo de lhoup. Las gouelhos nou dibion pos èstre achi. Le bent s'apusabo, las abetalhos fasion pos mès la musico del joun: la bedos'aprestabo à passa la nèit!

Alabets, se sietèc sus un brougal and'alenda. La nèit èro achi. Le soulelh acabado de lhepa le plhanèlh de Camp-Redoun e la frescuro casio deja. Qu'anabo fè? E de se tourna demanda: ount èro passat l'escabot? Chi sap! Belhèu uno brèicho l'abio embarrat dins uno tuto qe degus nou counèichio! Ou un espanhol le s'abio boutat debant ad'un gous, à trabès les sarrats, e i abio fèit passa l'Port! Que dira soun paire se l'trobo pos d'aci tantos?

Janou, tout sietat, se gaitabo le plhanèlh de Milhaus, un foutral pus ablh qu'elh, que coumensabo de s'amaga dins las brumadèlhos de la brespado. Alabets tournèc pensa al poulh. Qu'èro bengut fè, aqueste? Chi l'abio mes achi, à perpaus, ande i fè manca l'escabot? Chi sap, bihèu abio fèit pöu à las gouelhos e las abio encaminados dins uno outro berado. Menhant, caldro que debalhèssò pel bosc del las Barthos abalh, en s'en tournan. Se nou las trobo pos, e be s'en bira soupa coumo'co. Douma sira joun, se dins le cas.

Janou debalhèc cap al plhanèlh, le trabessèc sense s'atura e se boutèc per las Barthos abalh. Le bosc coumensabo a s'escuresi, l'embrum noubèlh rasounabo jous's sibis esphlops, Ponpon fasio la courandèro ensa enlha, mè res nou se fasio beire ni ausi. Aro, uno plharou lhusio al founze del bosc: les prats d'Anjouan arribabon. Janou sourtic del bosc coumo les tres fustets jiscabon del cèl al couènh de la bedo del Roc. Dins le prat, se fec abalh, un chic, sus un tussal. Alabets i senlhèc qu'ausio un esquelhou, achi, dins un plhot, à touca l'agal dels Courbasses. Fec uno courrido, dap al sou, e talhèu que fec dins la debalhdo, ja bic quelques gouelhos, coulcados ensa enlha, que roumiabon. D'autros encaro, dins le prat, que n'èro pos estat pescut per las bacos e ount jant le bejiure-rumat per las tourrados èro encaro goustous, peichion toutjoun e acababon de s'affarta. Un chic pus abalh, al bort del riu, sus uno plhaceto, Janou bic l'escabot que fasio l'rout. Que i dibio abi, achi, Le pastou s'aproulados, la Mourano que se lhepado un anhèlh que benio de neiche. L'anhèlh fec un bilèc, se lhebèc sus las camos de debant e la Mourano, alabets, le se boutèc entrans las calos e le fec poupa. Mè que i abio achi? Un autre anhèlh, deja, se poupabo la maire. Aro, n-h-i abio dous, qu'eicharlutabon, toutis dous negris and'uno estelo blhanco entans les dous èlhs. Janou ne rebenhio pos! Coumo las gouelhos, elh tabes se gaitabo les anhèlhs, dos anhèlos, que s'affartabon. De tems en tems, uno gouelho les benio flhaina, à toutis dous, e pèich, countento, s'en tout'n s'i lhepan las aurelhos. La Crabito, amairabo le siu anhèlh, tout'n roumiane l'anhèlh de la Cournudo ne proufitabo and'eicharluta l'autro poupo sense que la gouelho s'en abisèssò. La 'nshado fasio reganha l'tioul demèts dosou tres bourrègos que se fasion jocs. L'Escournado rumiabo, le cap un chic de trabès, belhèu parce que la corno que i demourabo i fasio countro pes. L'Esquebo, touto soulo sus un tussal, jitabo cops d'èlhs ensa enlha, toutjoun prèsto à fè un saut de coustat. Dous ou tres anhèlhs de tres semmanos guimbabon, dins le rount, à l'entour de dous anhelhats que se tumabon, per la frimo, belhèu ande s'assoulida las cornos. Le marra, quilhat sus un roc, coumensabo de tampa's èlhs, tout'n se gaitan de trabès, que roudabo arrans la Mourano. Mè aquesto trucabo pel sol ande's pèds de debant e Ponpon s'en anabo pus lhènh escoutasse las anhèlhos Belhèu parlabon de coulca sus l'jas! Janou fasio l'tour, countent de las beire. Toutos, i dibion èstre toutos, bous disi. L'escabot èro amatigat dins uno grandò pats e Janou n'èro estabousit. Elh qu'abio tant courrit touto la brespado e qu'abio passat tant d'èrnho!

Quand les anhèlhs feguen sadoulhis, Janou les emboustissèc dins le cap de la capeto, les capzes e las camos de debant que i ous sourtion, se boutèc la capeto sus la 'spalho e s'en anèc, pel prat amount, al caminot que trabèssò, apèich, tout plhanhiè per las Barthos elha, cap la bordo. Las gouelhos seguion, la uno darrè l'autro sense se pressa. En aprouchan de l'Agal dels Courbasses, dins l'escur, la tiro blhanco de las bèstios esquelhados, tenio tout le bosc. Le bruch de l'agal se maridabo ande l' bataclan de las esquelhos e dels esquelhous e, quand las fouelhos rescoumpassèguen l'aigo, aquesto calhèc un chic les sibis charradisses and'espanta pos les anhèlhs, que se sarrabon, enca'co, de las camos de las maires.

Als Bousigasses Plhanhièris, les joubis bourrècs e las anhèlhos guimbabon e boullion passa debant le pastou e la Mourano que l'seguio, sus sibis talous. Mè Ponpon, per debant, las aturabo, d'un chaupet.

A la bordo, Janou durbic la porto e fec entra la Mourano e las dos bessoulhos, que boutèc dins un couènh dil parçou. Apèich, dec manja un parpat de bejiure à la negro. Quand ajèc acabat, dichec embarra las autres, uno à uno, e las coumptèc ande beire se i èron toutos; Quatre, cinq,...quatre bints, quatre bints uno.....le coumpte i èro. Mè nou, n-h-i abio encaro dos, al cap de la ièro, que se lhepabon la nauqueto. Ero bertat, n-h-i abio dos de mès, aquesto nèit, e Janou, alabets, countent de las sabe toutos dedens, se couitèc de baudelha la porto e s'en anèc coumo'n dalfi, cap à maisou.

Coumo passabo debant la fount de la Carrièro, degus, aqueste cop, nou pousabo la dourno. La lhuno, arp; s'èro lhebado, e Janou, de lhènh, besio lhuse l'aigo que rajabo de la calèlho e qu'emphlenabo un nauc de nouiè. Quand ajèc begut un cop, al picharlot, Janou s'escoutèc un chic la fount que i rasounabo. L'aigo es la coumpanho dels pastous, nou pod dire que causos agradencos. Janou l'ausic que marmusabo estouèros estranjos! Pèich, i diguèc: tres gouelhos negros al ramat!



## LE TUSTET.

Aco s'èro esplhandit coumo un foc de fenasso dins un ginesta. Janou, que s'en ababo fema al Coudi, abio troubat qualcus, per Prat amount, que i abio dit:

— Ag sabes que la Saletto es tournado?

— La saletto? Mè, i a dous ans qu'es morto! Bos couiouna. Chi t'ag a dit?

— Uno talo. Pareich que siro dins le granhiè. Degus nou l'a bisto, mè l'auron ausido. Aquelho particuliero se troubabo pos plha en lhoc, aqueles mensounjos? S'èro bertat, be se sauro!

— E tio, le siu gendre qu'es anat cerca l'mèro. Que noum gause jes puja, tout soul, ande l'ana beire.

— Ag boli beire, abant d'ag creire, respoundèc Janou, qu'abio toucat l'ase, alabets qu'espeltirabo le roumendieral, en le demouran.

Dind les pantanhiès de Campanhos, las gents s'acuferabon. Al plhanhiè, le bouiè durbio les regats and'un parelh de bacos, un sus dous, ande que las bèstios penique jèssels on pos las patanos. Quand s'èron eichugados al soulelh, les omes n'emplhenabon les sacs ande las d'empourta. Dins las dressières, als camps ps nautis, les joutchaires escarrassabon las regos que le bouiè fasio coumo chi lhauro, desterrabon toutos las patanos que poudion trouba and'uno eichado e las fasion assouelha. De tems en tems, les bouiès s'aturabon, al cap de la rego e rasounabon d'un camp à l'autre, de cado part de la raso. Belhèu parlabon de la Saletto, se pensabo Janou.

Justoment, tres omes pujabon per la Soulhelho amount. Janou recouneguic le mèro, que rasounabo ande Birobèten, le gendre de la Saletto e darrès elhis dous un autre que dibio èstre le champètro. L'ase fouto, se pensèc Janou, las gents an rasou, i a qualqueres de nòu.

Quand ajèc bouidat las aigors, al camp del Coudi, Janou s'en tournèc sense rassoulheja. I tardabo de beire aco: la Saletto qu'èro tournado! Coumo arribèc a Trounc, troubèc Ramoun que benio de cerca un fèich de farratjou and' apastura las bacos de junhe.

— Que i a de nòu dins le carriè? An dit que la Saletto.....

— Tio bè, la Saletto! Es Birobèten qu'ag dits. Chi sap so que i a. Cal pos que m'ag bengo dire à ieu, se diguèc Ramoun. Figuro te qu'anèit pssado, m'èro boutat al finestrou n'èro pos encarolhebado mè fasio quand mèmo prou plhar. Un gous abo chaupat tems, dins le farratjal. Anabo tampa l'finestrou quand, tout d'un pic, ausigui fourruga dins le migroussa de Toni, à touca l'cami. Tè, s'en pensègui ieu, le taichou es bengut acaba d'espelhouna l'migros mè nou troubara jes grand causo ande s'ag chapa. Alabets me demourègui achi, un moument, and' abinha se besio sourti qualqueres d'aquelh migros.

— E cou nou l'anègues pos espalbatja?

— Nou n'sè, garo, Al cap d'un chic, bigui sourti l'nas de dous trapelhurs, al cap de la pared que douno sus la ièro de Birobèten, gaitèguen un moument se benio degus, debalgèguen la pared, e, del tems que la un s'en anèc arrapèc uno popou que i fasio passa un troisièmo lhairou e l'anèc plhanta al cap de la ièro, à touca l'cami, sus la lhenho. De lhènh, on auro dit qualcus qu'èro espalancat sus's brocs e, ande l'escur, nou se poudio pos dire se chi èro. Quand tout fec prèst, les dous artistas tournèguen puja la pared e se founhèguen dins le migroussa.

Al cap d'un moument, ausigui truca à la porto que douno dins la cousino e cridèc:

— Chi i a? Pèjo.

Mè res nou respoundèc. I a pos degus, se diguèc Birobèten en tampan la porto. N'ajec pos birat la 'squeno, que deja on ausio tourna truca à la porto. Alabets, Birobèten sourtic sus l'balet e se gaitec la ièro.un moument. Quand fec abituat à l'escur, bic le calhastre que bouludabo pos, al cap de la ièro.

— Qu'es tu que picos? E que bos?

Coumo l'ome nou respoundio pos, Birobèten alabets le courroussèc:

— Aprocho te, menhant, fè te counegue!

— ...

— S'ès pos on fhehant, fè te counegue!

— .....

— Ja te counegui, ja. Te dèbi pos res, Mè tu, ne podes pos dire autant. M'as abarrat le prat a Nauseno, l'an passat!

— ...

— Ja te counegui, ja. Te bèbi pos res, ièu. Mè tu, ne podes pos dire autant. M'as arrabat le prat a Nauseno, l'an passat!

— .....

— Qu'as pöu de t'aproucha? Dit got so que bos, n'as jes soupat?

Res nou boutjabo. Birobèten, quand bic aco, se tournèc embarra. Pèich, l'ausigui que durbio la porto ount le martelhet benio encaro de truca qualques pics, e le bigui que se prenio uno estêlho de fach al lhenhiè. Quand fec a mièjo ièro, Berobèten arrounsèc la 'stêlho sus l'cap del jambroc qu'èro quilhat sus la lhenho e l'apuntèc.

— Porto le lhum, Mario, cresi que l'è toucat, se cridèc Birobèten.

Coumo Birobèten s'èro rebirat and'ana prene la lhanterno que Mario debalhabo, la popöu, tirado and'uno ficèlo, s'èro forobandido dins le migroussa.

Be beses que i a pos degus, se diguèc la Mario, n'ès pos qu'un chapaire.

— Calho te, lhaganhudo. Pusque l'è bist coumo te besi. N'aura pos embejo de tourna beni martelha la porto, a questo nèit!

Un chic aprèts, Birobèten e la siu fenno, la lhanterno als cap dels digts, s'en èron anades à la belhado chè l'Fargaire.

Coumo Ramoun acababo le siu recit, èron arribadis al cami que meno sus la ièro de Berobèten. Un fhoc de gents s'èro arremassadis debant la ièro e cad'un disio la sibo. Janou dichèc ana l'ase tout soul, cap al porje, e, ande Ramoun, s'aturèguen.

Al mièi de la ièro, le mèro, un counselhè e le champètro fasion rasouna Birobèten que i ous disio un cop de mès:

— Quand tournèguen de la belhado, anèit passado, debès las dèts ouros, ande la Mario, abèn ausit marcha al granhiè. I abio qualqus. L'è cridat mè degus n'a respoundut. Coumo fourrugabo toutjoun, nous abèn emmajenat qu'èro la Saletto. Nou n'èn abadis coulca à la granjo e abèn demourat le joun.

— Tio, ja dèu èstre elho, aquelho pauro malurouso. Qu'as jes boulhut fè dire uno messo, al cap de l'an. Ja t'ag disio que te sauro mal!

Per i abé qualcus, ja i a qualcus, se diguèc le champètro. Ausi fourruga dijous l'tet!

— Cridats-lo, belhèu sourtira, asardèc la Maitinhièro.

— Anem, anem, se respoundèc le mèro, barganèlhos que tout aco, abèn pos tems de nous acupa de touts aquellos busaroucados. Las patanos soun pel camp o Campanho que d'assoulehlhon. Se i a qualcus, ja cal que sorto.

È alabets se sourtic la 'icharpo de la pocho de la bèsto, la se boutèc al tour de la cinto e cridèc:

— Al noum de la lei, se i a un crestia dins le granhiè, que se fasso beire, sulphic!

Las gents s'èron calhadis. Toutis estirabon le colh e se gaitabon le balet del granhiè. Mè res nou sourtic am finestrou e degus nou respoundèc.

— Dit i oc en frances, belhèu ag ausira, se diguèc Jano de Tanguet.

— Dichats i l'tems de se besti, bilhèu se bol ennoubia, se diguèc le Buraire.

— I anan puja, se diguèc le mèro. Bene Bitorèn.

— Prenèts bous un broc. De cops, se bous boulio moutsega, se diguèc Pierrou de Casso.

Deja le mèro e l'champètro èron pel soutoulh enlha, cap à l'escaliè que pujabo al granhiè. A-n-aquel moument, al finestrou del balet, un cap tout pelut sourtic, le cap d'un ase, le mour plhe de pelholfos de sibado. L'ase, ja n'èro un, se boutèc à brama. Las gents, alabets, esclampètèguen de rire.

— N'ès pos le tiu ase, aco, Birobèten, se diguèc Ramoun.

— Ja senlho elh, ja. Mario, bè gaita al porje se i es;

— Ja's elh, tio, se dision toutis. Se dèu abé chapat touto la sibado e aro bol beure.

— Oou Birobèten, cridèc Proupèr desempèich le cap de la ièro, ja bas courre aro and'un sac de pantanos, ja sira fart le tiu ase. Me caldra teni coumpte à la bourrico!

Le mèro e l'champètro tirèguen l'ase per la coueto e le feguen rebira. Aro, le calio fè debalha. Mès elh nou bouluèc res sabé. Birobèten, qu'èro pujat elh tabes, le tirabo pel cabestre, l'amanhagabo. Res a fè. Le mèro e l'champètro le butabon, i foution trucs: l'ase retioulabo al lhoc d'abansa.

— B'es pujat, pourtant, se diguèc l'champètro. be pouiro debalha, b'es pus aisit.

— Tio bè, se respoundèc le mèro, bè t'en beire se chin a fèit ande puja. Ja l'an adujat, me mesfisi!

Le tems passabo, l'ase èro de mès en mès testut.

— Se l'abiabon per la 'scalo abalh, se proupousèc le champètro. Be se lhebaro debmès le soutoulh!

— È tio, i respoundèc Birobèten, se bira espatarna dins l'escudelhè de la cousino.

— Ne cal sourti, se diguèc le mèro. Anats me serca dous parelhs de liams de garbeja, l'anan fè passa pel balet.

Coumo de fèt, un cop sus l'balet, l'ase fec tralhat, les liams passadis al tour del bentre. Le cap d'un liam fec tirat foro del balet. Quand se troubèc penjat al dessus de la ièro, se tournèc bouta à brama. Las gent rision, las fenno ne bebrembabon d'ana poussa la dourno, les trasinhiès s'aturabon dins le cami estreit ande beire l'ase que boulabo.

— Atrapo le pel cabestre quand s'abaichara, se diguèc Birobèten à la Mario. Que nous se coupe pos uno camo quand toucara la ièro!

Quand l'ase fec al sol, se soucadic e pèich, tout fièr, trabessec le flhoc de gents e s'en anèc cap à la fount.  
— Dichats le beure e boutas i la'mbardo, le me prendrè aquesto brespado se diguèc le Buraire. Ja n'abansarè and'elh. Bira plha and'ana cerca les escoutjals de la part d'Albiès.

Birobèten n'a pos jamès saput se cou le tustet de la siu porto abio trucat aquelho nèit, se cou l'ome qu'abio atausat al cap de la ièro s'en èro fujit dins l'escur, se chin l'ase s'èro destacat i s'abio chapat la sibado del granhiè. Dèu abè bouno fhaino, se disio toutjoun la Mario, qu'ajo sentit le gra de tant lhènh!  
Mè, les qu'anabon beure mièjo chès la Lhibertè, ausion ous senlabo trop arrapenc:  
— Ja se pod fè, ja. Sira pus aisit que de fè puja l'ase de Birobèten al granhiè!

## L'EU DEL GALANTOU.

A Nourjat, d'autris cops, quand le bilatge èro plhe, on troubedo de tout mounde. Belmal, cad'un abio l'siu petit trabès: les unis èron mesfisentis, d'autris busaroquis, la mès part testudis, quelques unis jelousis. Plha pauc aimabrais e n'auron pos fèit mal à uno mousco.

Qualque cop se courroussabon: uno galhino èro anado escarrassa las salados de l'ort, uno baco abio routat un acabat de pèiche per las bacos.

— Fenhant!  
— Aprèts tu...  
— Adurmit!  
— Aprèts tu...  
— Embahit!  
— Aprèst tu....

Apèich, las familhos se parlabon pos mès. Mè les joubis se fatigabon lhèu de teni la lhengo e un bèlh joun las fennos se tournabon entourrouba en pousan la dourno.

Alabets, un joun de fièro, les omes se troubabon coumo per asard debant uno boutelho de mièjo e tout s'acabado coumo aco. Nou i abio que s' testudis que tenion bou.

Tenèts, d'un tal, be boun brembats d'un tal? Toni, que l'apelhabon. Ieu me brembi pos de l'abe jamès bist. Me brembi souloment del joun del siu entèrroment, bous parli de tems, ieu pourtabo enca le debantal coumo'no filho. Se mouric un joun de l'ibèr, que tourbejabo à boulentat.

Qualque tems abant de se mourir, un dimenge qu'èro anat à la messo (à-n-aquel tems les omes i anabon mès que bèi) baillèc uno pèço de dous sòus al ritdou que passabo l'assièto, entrans las cadieras. Mè, coumo troubedo que dous sòus èro trop e que n'abio pos capde pèço d'un sòu, s'abio emnajat de se prene, dins l'assièto mèmo, uno pèço d'un sòu so que fasio l'coumpte. Le ritdou, elh, i agradèc pos à fèt. Arrapèc la famuso pèço de dous sòuses e l'arrounsèc cap à la porto, al founze de la gleiso.

Tè, achi que's as, les tibis dous sòuses, les te podes garda, se diguèc le ritdou.

Toni se lhebèc e s'en anèc cap à la porto. Las gents se cresion que s'anabo amassa la pèço. Mè nou, dreit coumo'n italièn, passèc la porto e desempèich aquelh joun tournèc pos bouta les pèds dins la glèiso.

Quand l'entèrroment passèc debant maisou, i abio pos qu'uno causo de cambiado: Nourè del Moua, la 'icharpo de mèro al tour de la cinto, abio pres la plhaço del ritdou.

Mè so que me susprenguèc à ièu, qu'èr tout petit, fec de beire las gents s'en ana tout dreit cap al cementèri, al lhoc de dentra dins la glèiso escoutasse la messo dels mortis. Las fennos passèguen las darrèros, touts fardados parèlh, ande la capeto negro sus l'cap, que blhanquejo deja taloment nebabo espes. Es tout so que me brembi de Toni. E pourtant le siu noum es demourtat: on dits toutjoun le prat de Toni, la bordo de Toni e toutis saben encaro de chi on bol parla.

Un chi testut, belhèu, mè Toni èro un brabe ome quand mèmo, un fièr pastou qu'abio dichat li siu noum plha enrrasgat dins la mermorio de las gents.

E un tal? Be boun brembats d'un tal? Le bourdassiè de l'Espourganhou que l'apelhabon parce que gairebe tout le siu be, camps, prat, sus un roucatèlh. Las gents le besion pos gaire al bilatge. S'en anabo cado joun à l'Espourganhou e achi i passabo gairebe tout le siu tems. Le bourdassiè bibio alha, tranquille coumo tout, demèst las sibos bèstios e's ausèlhs.

Un joun, pourtant, ajèc rasous ande qualcus de la Carrièro: uno galhino abio sautat le grilhat de l'ort e abio escarrassat las carrotes semenadas del maiti. Le de la Carrièro l'abio tradtat de coucut so que i abio saput mal.

Uno brespado, s'en èro anat tera tèrro al Camps del Baus, arrans l'Espourganhou. N-h-i arribèc uno de poulido.

Se rebentabo à puja descos sus descos del founze del camp à la cabesso, quand, tout d'un pic, le coucut s'en benguèc sus un ciriè, al cap del marjal e se boutèc à canta:

Coucucut....., coucut....., coucoucut....., coucoucut....

Nostr'ome i pousquèc pos teni. Se prenguèc la faus qu'abio pourtat ande coupa las roumindièros de la marje e s'en anèc cap al ciriè.

— Ja t'ag bau fè beire se soun coucut. Que t'a endoulentit le caraco de la Carrièro? Ja l'te bau tampa l' bèc, ja. Alabets, i arrounssèc la faus, ta fort que pousquèc, mè l'apuntèc pos. L'ausèlh s'en anèc sus un autre ciriè, un chic pus amount e recoumensèc la siu cansou.

De matas en matas, d'aibre en aibre, de marjal en marjal, de ribo en ribo, nostr'ome e l'auselh arribèguen coumo'co à la Salbolo, cap à la fi de la brespado. Mouret èro achi, coulcat sus la capeto, que gardabo las gouelhos à touca l'bosc de Labelhanet. Bic arriba le bourdassiè de l'Espurganhou, pus irètje que jamès, la faus à la ma que seguio toutjoun le coucut.

— E que bous a fèit, le coucut?

— Que nou me bol jes dicha trabalha tranquille. Es aquelh caraco de la Carrièro que l'a endoulentit. Mè ja l'aurè. Ja i farè beire se chi es coucut.

E l'ome s'enfounzèc dins le bosc, demèst les bouiches, cap à lendreit ount le coucut s'èro tournat bouta a cantat.

Ero brabe, bous disì, brabe à fèt.....

E d'uno talo? Be boun brembats d'uno talo? Fresino que i dision. Uno brabo fenno, j'ag poudèts creire. Les dous sibis goujats que nou s'èron pos maridadis-dibion abe despasat les crant' ans-Pistoul le Ranc e Pistoul l'ainat (Jètoua pels amics) abrigabon dos mesuros de seguel aquelh de la bordo del Moua. Le Ranc l'haurabo, pengat à la'stebo e se fasio tira per las bacos coumo abio pres le plhec de fè.

L'ainat, elh, menabo l'aurièro and'un bigos. Dibio èsse à mièjo junto quand Janou alharguèc e, coumo abio gelat dins la nèit, birèc dins un restoulh, à touca l'camp de Pistoul, ande dicha escalfura les ubacs. Justoment, Fresino arribado al founze del camp, touto susousou, touto bièlho, la pauroto, la toupino de l'asinat à la ma.

Nou n'anan dinna. T'en bailharen, Janou. Bos-ne?

— O nani. Merci. E dinnat abant de beni.

Le Ranc aturèc le parelh, al bort de la raso, e toutis tres se sietèguen la tour de la toupino.

Fresino dibio pos abe pourtat un culhè ande cad'un Janou bic que l'se fasion passa, la un aprèts l'autre, e le plhantabon dins la toupino, cad'un soun tour. Aco me biro plha, se pensabo Janou, ieu que podi pos beure dins le beire del miu fraire. Mamai j'ag dits toutjoun que soun un estafinhous. Que diro se besio les Pistouls manjasse l'asinat ande la mèmo culhèro!

Quand ajèguen acabat de manja, Fresino cridèc Janou:

— Bene, paurot, bene t'acaba l'asinat. B'es doumatge del douna al gous!

— Nani, n'è pos talent.

— I troubaras pos cap de salsisot, se diguèc Jètoua. Le miu galutre de fraire n'a pos dichat cap.

— Salsisot ou nou, las patanos soun bounos e plha farinuosos. Soun de Margenet. Anem, bene cap aci, se diguèc le Ranc.

— Couito-te, paurot, tournabo dire Fresino, bene lhèu que s'afredo. Beiras qu'ag troubara bou.

La Pigo benguèc salba Janou. Ajèc l'idègo de s'en ana pèiche dins la ribo, e, chic à chic, s'èro dichado debalha dins l'auserda de Tounrro. Janou ne proufitèc ande fè passa l'gous que s'en menèc l'escabot cap al bosc. Adissiats, soupo de caulets. Mamai ja ba plha rire quand dins le bosc, le goujat se rebirèc le la part del camp de Pistoul. Le Ranc abio aturat le parelh al mièi de la rego e, tout dreit, fasio uno bouso!

Mè qu'èro brabo, aquelho Fresino!

E l'Galantou? Boun brembats del Galantou? Brabis coumo elh n-h-i abio pos gaire. Cou l'abion apelhat atal? Nou n'sè, garats, Mè que i anabo plha aquelh noum! Toutjoun rejouit, toutjoun countent, ja poudèts creire que, se femabots, tirabots l'èrbo ou garbejabots de la mèmo part qu'elh, le troubabots toutjoun aturat à un pas, ande bous dicha passa. Eron pos toutis qu'ag fasion aco!

Uno nèit de l'estiu, nous troubabon toutis les joubis, sietadis su's cabirous debès Campanho. La nèit èro poulido, le tecou de la lhuno jougabo à latentó folho dins les alba, le tems èro dous.

— Chun doumatge de s'en cale ana durmi, es aro que i faro bou, deforo, se diguèc Tonèn de Luc. Douma maiti, me cal tira dous coumptes de sibado abant que l'soulelh sio rajant.

— E ieu, me cal ana sega la maitat del camp de Sousquiès. Quand le soulelh arribara al riu, me caldro abe acabat se diguèc Pierrou de Malubèr.

— Quantis èts de segaires? se demandèc Nanouno.

— Ag sabi pos. Sièis, al mens.

Nous autris, nou siren pos que dous, a la sibado de Pèirogudo.

— I a pos que ieu que me lhèbi pos de maiti, se diguègui ieu. Pourbu que sio ande l'soulelh rajant dins la ièro del Galantou, n-h-i a plha prou. I bau aduja a battre l'blhat.

— Chin ba que i anats cad'an, se demandèc Pierrou del Maçou.

B'ag sabes. Nous a bailhat la peichendo de Nauseno.

Per la pago, nous i cal ana aduja à escabessa le blhat.

— Siro l'cop de i ana fè un despièit se diguèc un autre, pusque i bas douma maiti. Nous diras se chin l'a pres.

Aco m'agrado pos gaire à ieu. Apèich, èro l'ouro de s'en ana durmi. Les dichègui dire, mè j'ag abion pel cap, aquelho nèit.

— Se l'anabon crida e se i jitabon un èu quand aura durbit la finèstro se diguèc Pol de Plèti. Abèn uno plhoco qu'a dichat de couga, les èus balen pos res.

— Le i jitaras, tu?

— Se boulèts!

Pus qu'es atal, i anan. Bè cerca l'èu.

Quand Pol de Plèti fec tournat, ande l'èu cougat, la bando s'en anèc per la Carrièro amount, cap à Pijol. En cami, quelques unis n'abion proufitat ande s'en ana durmi. Quand feguen arremassadis al pèd de la fount de Pijol, n'èron pos gaire mès qu'uno doutzeno. Un gous chaupado dins le besinat. Un finestrou s'èro dubèrt e qualcus abio sourtit le nas, estounat d'ausi l'endouma. Tout èro prèst.

— B'es entendut, se diguèc le menaire. L'anan crida, e, talhèu qu'aura durbit la finèstro, arrounsaras l'èu.

— E b'ané!

— Oou le Galantou? E ount èts?

La finèstro se durbic, sulpic, le Galantou n'èro pos encaro coulcat.

— Chi i a? Que me boulets?

Mè Pol de Plèti, tout dreit debant le pourtal, nou boutjabo pos.

— Anem, arrounso le, se dision les goujats, tout siau.

— Podi pos. E pöu de nou poudé l'apunta. Tè, arrounso le i, tu.

E Pol bailhèc l'èu al goujat qu'èro arrans ilh.

— O nou. L'èu es tiu. Es tu que l' dèbes tira. Apèich, es tu qu'as dit que l'arrounsaros. Alabets, qu'estouloumios?

Ieu, ja bigui sulpic que l'èu s'arrounsaro pos jamès.

Ero plha la peno d'abé agut tant de bantardiso.

— Bailho le aci, se diguègui ieu. Que tremolos aro?

— Te calio tremoula pus lhèu. Qu'as pöu que i ag digo? Tè, t'ag bau fè beire.

Alabets me prenguègui l'èu que Pol me bailhèc, plha urous, e l'arrounsègui cap à la finèstro.

— Ta plha! se diguèc le Galantou, que tampèc la finèstro ande s'ana neteja.

La maitat s'en èron fujidis. Quelques unis demourèguen un chic, ande beire se l'Galantou debalharo. Mè res nou se passèc. Alabets, nou n'abèguen durmi. Degus nou risio. Le Galantou, al lhoc de crida, nous abio bailhat uno lhiçou. Soun segur que nous abio deja perdounat; Tabes, ja cresi plha que fec le prumiè e le darrè èu cougat que tirèguen.

Ero brabe, bous disì, brabe fèt. N'ag cresèts jes?

## LE PORC DEL SARRALHE.

Le Sarralhè disio toujoun que las gents trebalhabon trop, que s'i sabion pos prene e que calio que cambièssò,

— Fasèts coumo ieu, e tout bira milhou, j'ag beirets!

Degus nou l'boulìo escouta e toutis i respoundion:

— A mens de biure de fineso, chin boulèts fè, menhant.

Mè le Sarralhè abio l'siu plan e dichabo dire las gents.

Quand benguèc la fi de l'estiu se croumpèc un pourcèlh ande l'engreicha e ande l' se tua l'ibèr. Souloment, nostr'ome troubabo que de i bailha à manja èro trop de rambal. Calio fè beni joutios, naps, caulets patanos e que sabi ieu. Apèich, ag calio fè coire tout aco e i ag calio pourta al bourdic. Tabes, s'abio enmajenat que l'porc se poudio campa deforo, tout soul, en furan dins le bilatge. Quand se randio, sus la fi de la brespado, ande se fè coire l'soupa, le Sarralhè apasturabo l'ase, jitabo un arpat de gra à las galhinos e, apèich, durbio le bourdic al porc que renabo desempèich mièt joun parce que èro mort de talent.

Le porc sourtio del bourdic, tout affamat, jitabo un cop d'èlh al nauc qu'èro toutjoun bouit e s'en anabo dins le cariè gaita se besio res ande s'ag chapa. On auro dit un sangliè, un sangliè blhanc bertat, taloment aquelho bèstio èro magro, le pel erissat e irètjo. Un pourtal èro dubèrt, dins uno ièro? Le porc s'embarabo coumo s'èro chès elh, brescabo tout so que las galhinos abion dichat jous l'engart, se curabo le brenat de la plhoucado e s'en jujio seguit per un gous ou baselhat de cops de balejos per la fenno de la maisou. Elh courrio toutjoun, cerca se besio un pourtanèlh dubèrt à un ort, ande se chapa uno joutio dijous l'poumiè. So que crenhio le mès èro les gousses que las gents e boutabon al darrè quand le besion. Quand de cops nou fec moutsegat als garrous mentre que se couitabo de chapa la fruto que l'auta abio fèit caire dins le joun.

Le sangliè blhanc fec lhèu counegut dins le besinat, les pourtals e les pourtanèlhs se tenion tampadis, les espinasses se fasion pus espessis als passes dels orts, las barralhos se relhebabon, las gents tenion l'èlh dubèrt talhèu que la frescuro casio. Alabets calguèc que s'en anèso toutjoun pus lhènh ande cerca de que granuta. Quand les efants sourtion de la 'scolo, le seguion e i fasion fè courridos dins les carriès. Elh partio, la coueto retourtilhado, en renan, cap à un endroit pus tranquille. En passan debant chès Mato, enca que les rocs i cajèsson sus la'squeno, ne proufitabo ande se prene uno joutio dins le panhiè que l'eichugabo debant la porto, apuat sus l'souc. Uno brespado que s'en èro anat gairebe en deforo del bilatge, s'embarèc per un pourtanèlh dins un ort ount n'èro pos encaro bengut. Ero achi que s'affartabo de peros casudos d'un bièlh periè quand ausic un cric:

— Mal foc del cèl que t'escrase! Pico-le Bergèro!

La Bergèro n'èro pos lhènh, l'affamat ajèc pos le tems de se rebira que deja la sentio als sibis garrous. Raulet, per darrè, and'un fragèlh demargat, le seguio e l'atoutzabo. La gousso e l'nostre porc se foutèguen a trabès les farratjals e Raulet barralhèc l'ort.

Aquelho brespado, le porc se randèc pos. Le Sarralhè anèc beire, dous ou tres cops abant de se coulca, s'èro dins le bourdic. Mè res. Be tournara douma, se pensèc elh, e, alabets, s'en abèc durmi.

L'endouma ni les jouns que seguiguen, cap de porc. Le Sarralhè coumensèc à passa èrnho. Apèich, en rasounan, demandèc als besis se l'abion best rouda per las ièros. Belhèu s'en èro anattrop lhènh e tournabo pos trouba le siu cami.

— S'en sira anat al bosc, aura sentit les sangliès, se i diguèc Julie de Coutre, en badinan.

— O, ja tournara, se respoundèc le Sarralhè, le miu porc es plha dressat;

Mè, le mèmò joun, ja recoumandèc al pourtur de demanda debès Arquisat, se l'abion bist.

Le tems passabo. Le Sarralhè calguèc que ne coumbenguèso: le porc s'èro perdu. Alabets, s'arremassèc las quelques pistolos que i demourabon e s'en abèc croumpa 'n autre pourcèlh a la fièiro del troisièmo dimècres. Ero ouro, le porc auro pos le tems de se fè gras abant Sent Ilari.

Qualque tems aprèts, las bacos de Raulet malautejèguen. Elh qu'abio uno poulido bacado de bacos de lhèit, de jourgos e d'anoulhos ne sabio pos mès se que s'en pensa quand las besio que magreichion à bisto d'èlh. Se i ous bailhabo un chic mès d'èrbo, s'en fasion le palhas.

Qué dibion abé?

Eron à la fi de la tardou. La nèu anabo lhèu caire e i abio pos res pus à pèiche dins les prats. Enca'co, les jouns de soulelh, Raulet fasio sourti debès la Prado, nou siro qu'ande las jè assoulelha, toutos las bacos del porje; Las bèstios n'abon pos cap de balans, espeltirabon sense cap de goust las roumendières encaro felhudos ou s'amassabon coumo se i ous fasio fasti las darrèros fèlhos casudos dels albas, retourtilhados per la tourrado de la nèit.

— Qualcus las t'a embreichados, l'cap e pensabo a qualqueres mès. Un maiti, que plhabio, s'en anèc beire Goundal, l'ome de bou, counselh. Las gents l'ababon trouba cado pic qu'èron dins la nauso.

Goundal, douncos, benguèc beire las bacos, las palpèc, las fec camina dins la ièro, la uno aprèts l'autro, se i ous gaitèc las denses, le braiè, mè i ous troubèc pos res de plha macat.

— Las tibos bacos soun pos malautos, Raulet. Mè an qualqueres. Soun magros, an le pel mort tout aco bol dire que soun pos plha; Que i ous bailhos à manja?

— B'ag beses, èrbo seco, d'aro à l'enlha.  
 — Aquelho pasturo, es bouno? Es se amoulhegado?  
 — Es la milhouno. Be sabes que l'abèn escasudo, oungan.  
 Pourtant, dèu beni del manja. La proba es que te bolen pos l'èrbo e que s'en fan le palhas. Sabes so que bas fè? Ne bas croumpa qualques balos e la ious bailharas. Beiren apèich se i a cambioment. A perpaus, be sent plha le tiu porje? Chin ba?  
 — Be m'ag senlho à ièu tabes. Mè sabi pos se d'ount be. Cado joun, bouidi l'auri, mè ja sent toutjoun parèlh; Raulet fec atal. Al cap de qualques jouns, s'en tournèc trouba Goundal e i diguèc que, desempèich que las bacos menjabon l'èrbo qu'abio croumpat, s'èron refèitos.  
 — Ba plha, se i diguèc Goundal. Aro, la bas tourna mestalha ande al tibo. Beiren so que fara.  
 Coumo de fèt, las bacos tournèguen malauteja e causo curiouso, se tregabon l'èrbo croumpado e tournabon escupe la de l'erbièro.  
 — B'ag beses, se i diguèc Goundal, es la tiu èrbo qu'es doulento. Menhant, anen lo beire.  
 Dins le porje, Goundal, se tampabo l'nas. Apèich, cops de picots, fasio sourti l'èrbo de l'erbièro, la se gaitabo, la flhainabo; L'èrbo abio l'aire plha poulido. Pourtant, d'uno part de l'erbièro, justoment d'ount jant Raudet abio pres le plhec de tira and'apastura, l'èrbo èro rouselhado e sentio doulent.

— Que i as boutat achi dedens, se diguèc Goundal, b'a l'aire plha macado?  
 E Goundal bailhado cops de picots ensa enlha e fasio caire brassats d'èrbo à boulentat. Tout d'un pic, qualqueres de gros, de pesant, debalhèc de l'erbièro e cajèc als pèds dels dous omes. Raulet, and'un fourcadèlh, apartèc l'èrbo qu'èro emboustissado al tour e que biguen? Un porc qu'acababo de se pouiri.  
 — E qu'es aco? se diguèc Goundal.  
 — On diro un porc, i respoundèc Raulet.  
 — Un porc? Qu'es boutos à sala dins l'erbièro, tu?  
 — Ja i soun, se diguèc Raulet. Aco dèu èstre le porc del Sarralhè. Be te brembos que l'abio perdu! La brespado que l' perdèc, s'en èro bengut dins le miu ort e Bergèro le s'abio boutat debant. Que ne fec? Nou n'sè! Me mesfisi que l'porc, embahit que so fè, espantat per la gousso que sèro penjado als sibis garrous, èro pujat dins le porje, per darrè l'ort. Le gajal èro dubèr e se dibèc ambarra dins l'erbièro. Un cop dedens, dibèc fourruga ande s'en sourti e, apèich, se dibèc embarbousti dins l'èrbo e s'estoufèc. La pouirituro a coulat dins la pasturo e a emousounat las bèstios, chic à chic. Abis rasou, quand me disios que benio del manja.

— Se te fa pos res, anen beure un cop, se diguèc Goundal. E pulhèu embejo de beure qualqueres de fort que de me rousega uno carbounado.

## CARNABAL.

Qu'èts debengudis, toutis bous autris, de la junèssò del bilatge? Bous besi encaro, coumo s'èro bèi, dins touto la forço dels bostris bint ans, e ieu, tout petit arrans bous artris, me senlhabo, alabets, que jamès nou bous abastaro à la casqueto.

Te besi encaro, tu, Titou, quand fasios le Grand Ferrè e que nous seguios per las rasos dels camps de seguel debès Ribo-Lhoungo. Perdudis achi demèst abios trebalh ande nous trouba, e, la brespado, à l'ento de s'en ana soupa, la fumatièro de las roumendièros qu'abion abrandat als pèds de Jano d'Arc, estacado à un paichèlh, nous fasio plhoura 's èlhs.

E tu, Condè, que parlabos de coupa la sinsolo; e tu, Chatou, que quequejabos tout le tems mè que disios paraulos plhenos de boun sens, ount èts bèi?

De bous autris, ne demoro pos pus que l'bostre noum sus la placo dels mortis al camp d'aunou que se dresso am pèd d'un ciprès, al cementèri.

E pourtant, dins la rudo de la mountanho, coumo les jouns èron elhusidis quand bous arramassabots, sibant las sasous, ande bous amusa ou mèmò souloment ande canta!

Aquelh ibèr, la nèu nou cajèc pos que tart, debès la primo, e, tout le mes de Jambière e de Febrié le soulelh n'aturèc pos de raja quand sourtio de darè las picos. Les rats s'an pos chapat l'ibèr se dision las gents, mè, pel moument, ne proufitabon ande fètrebals que nou se fasion que la primo, la mès part del tems. Siro tant de fèit, se dision les bièlhis. Les unis partion debès les camps de Soustal, enca que les jouns fesson courtis e



s'en anabon eicherbassa l'aglam e les mentastres d'un barèit. Les autris pujabon als prats de dijous la bedo, curabon les rècs d'asaiga, estalpinabon ou coupabon las marjes.

L'ibèr èro coumo un petit estiu: las gents se couitabon de trebalha coumo fan las fourmigos quand un rajol de soulelh be escalfura la fourmigièro. Un petit bent dauta que bufabo dels Lhabarièrels pourtabo qualque cop le bruch dels cabirous que s'abiabon per l'agal de Nalham, on besio passa colhos de fennos, uno caco d'embrum quilhado sus l'cap: proufitabon que las fèlhos èron secos dins les bosques de fach ande tourna emplhena les parçous del palhas.

La lhuno, elho tabes, s'escasio bouno. De maiti, le Moua fasio passa l'cor pels carriès enha e jusco Pijol and'aberti les omes. Un per maisou, prenion le cami de las Garrafoulhèros, la pigasso sus la' spallho e la saqueto en bandoulièro. On les besio passa, per Bareto amount, cop de flhoucados, que s'en anabon à la coupo, per tout le joun.

Mè, b'ag cal dire, toutis aquelhys trebalhs se fasion sense fogo: proufitabon del boun tems souloment. La brespado, talhèu que la frescuro casio, e be cats d'ouro à-n-aquelho sasou, la brespado douncos las gents se randion abant que la nèit fes tempado à fèt e, talhèu que l'soupa agut nèu à boulentat.

Justoment, èron al tems de Carnabal. Quand la maisounado s'aprouchabo dels andèrs ande se calfa, e que le mèstre anabo tampa l'gous al porje, la menino i cridabo toutjoun:

— Boutes pos la boulelho al pourtal, belhèu auren bisitos auquesto nèit.

E las bisitos coumensabon, coumo de fèt, à mièjo belhado. Las prumièros nèits, on besio arribal les carnabals, cop de dous ou tres amasso e qualque cop un tout soul, toutis crentousis, coumo s'abion pöu de gena, de derenga. Un pic, tout diau, à la porto, les anouçabo. Apèich, que de minèstros ande se fè beire! Les couplhes, la mè part del tems, agradabon als belhaires. Cad'un s'entourrougabo, cercabo a sabé se ch'èro, les embitabo à s'aproucha del cantou, belhèu ande gaita de beire un qualqueres que l'auro mes sus l'boun cami.

Mè le que fasio l'ome se mesfisabo e jougabo del bastou se besio l' mal parat. La fenno, elho, seguio le siu ome e quand las gents i fasion coumpliments sus la siu fardo, baichado 's èlhs e crousabo per la ma e i fasio fè l'tour de la cousino ande fè casabè plha repoutit.

— E tio bè, ja la t'as plha casido, se dision les belhaires, estabousidis. Mè be nous senlho qu'a plha crabassos als digts, i fas jes fè que las parets

— E tio bè, ja t'a plha causido, se dision les belhaires, estabousidis. Mè be nous senlho qu'a plha crebassos als digts, e fas jes fè que las parets?

Deja les carnabals s'en anabon, de pöu que, se trop nou les espeichabon nou les denoummèsson e l'escur les se bebio, dins le carriè del besinat. L'ouro de s'en anan durmi n'èro pos encaro arribado e d'autris carnabals benion randouleja, dins la cousino, toutjoun plha fargadis, toutjoun plhenis de minèstros e de jocs: be calio que se fesson coumprene, menhant, d'uno part ou de l'autro.

A bèl plhase, on s'aprouchabo del joun de Carnabal e, chic à chic, les emnascadis perdion la lhouro crento e fasio mès de bruch. Aro ne passabo cop de bandos on nou poudio pos mès bouta 'n noum counegut sus touts aquelhos caros que grimassejabon e que cercabon pos que jocs. Ne benio de lhènh, dels bilatges besis, e le lhour passatge dins les courredous s'ausio dels cantous a causo de las bourroumbos que quelques unis se boutabon à la cinto.

Quand s'embarrabon dins las maisous, aquelh tèrrotrèn fasio arremicoula les efants que les amanhagabo, tout siau.

Apèich, la maisou se tournabo bouida, uno bentado de frescuro arribado arribabo jusco's andèrs e, la porto tampado, on les ausio encaro un moument qu'estrabuncabon dins la lhenho.

Carnabal bengut, les mascos touto la Carrièro, de mièt-joun à lla fi de la brespado. Les carnabals s'arremassabon darrè la glèiso, e coumensabon de fè l'tour de las ièros, en proucessiou. Les pus biganhejaires s'en dounabon à boine- mès e las bourroumbos fasion brama las bièlhos bacos que tirabon sus la cadeno, dins le porjes que pourtabon dous carnabals causidis parce que bersalsisots ou cambajou e mèmo, les que n'abion pos res de trop à manja, quelques ardots.

Abant la nèit, coumo le soulelh acabado de l'hepa la Sèrro del Roc, les carnabals, aro desabrigadis de la figuro, debalhabon un darrè cop per la Carrièro abalh en pourtan uno popöu que representabo Carnabal e qu'anabon nega dins le riu de Bourcalholos. E toutis cantabon:

Adiu paure,  
Paure, paure,  
Adiu paure  
Carnabal.  
Tu t'en bas  
E ieu demori,  
Tu t'en bas  
Per l'aigo ' balh;

Carnabal negat, la fèsto n'èro pos acabado per aco.

Aro la junèssò s'arremassabo à l'aubèrje ande se chapa la mouleto d'èus, le salsisot e le cambajou que las gents i ous abion bailhat. La riboto durabo jusco l'endouma maiti e las cansous fasion tremoula las bitros de l'aubèrje.

— Anem, se disio Poulou del Pujat, bau canta Les blhats d'Or. M'adujarèts al refrèn.

Aquelho nèet, tout i passèc. Aquellos mountanhos, Le cantounhiè, Nou l'aurets pos l'Alsaço, La siu amigo, e d'autros encaro pus poulidos las unos que las autres.

Quand feguen fartis de beure e de canta, n-h-i abio que parlabon de s'en ana durmi. Alabets, Jousepou diguèc:

— Bous bau canta la darrièro. B'ag sabèts, i a setanto-cinq couplets!

— As rasoun, as rasou, osco, bè i Jousepou se dision les autres que se gaitabon tout'n rire e tout'n bailhan cops de punches sus la 'squeno.

Jousepou partic, a pleno bouts, e nou s'aturabo que per beure un cop. Quand fec al dètzièmò couplet, n-h-i abio que badalhabon ensa enlha. Janou del Riu e Lèon de Bitorèn feguen les dous prumièris à s'en ana, tout siau.

— Nou cal ana bira abalh cabirous, tantos, se diguèguen als que i ous fasion sinne de demoura encaro un chic, le tems à Jousepou d'acaba la siu cansou.

Mè d'ount mès aqeste cantabo, d'ount mès les joubis s'en anabon, un à un ou cop de flhoucados, coumo fa un espigt repicoutat que pèrd le siu gra, un joun de forto calou.

Aro, n-h-i abio pos mès que dous ou tres, qu'abetzabon bi dins le beire de Jousepou cado pic qu'aqeste, eichepat, s'aturabo ande beure.

E bas-t'en tu, ou demoros qu'ajo acabat, se diguèc Titou à Condè que guinhabo parce que la son l'atoutzabo.

Tio bè, se i respoundèc Condè, cresi que me cal ana apastura las bacos à Soustal.

E toutis dous, alabets, s'alhisèguen per l'escaliè abalh e se perdèguen dins la nèit, dijous les tres fustets que s'anabon coulca, elhis tabes, darrè las picos de Mountagut.

L'auberjisto, que les abio bistis passa à la porto del soutoulh, pujèc alabets beire se chi demourabo. Jousepou, tout soul, al cap de la taulo, coumensabo le setantièmò couplet.

L'ome adoubèc las cadieras arrans la taulo, se sourtic la clau de la pocho, la bailhèc à Jousepou e i diguèc:

Tè, se te fa pos res, quand auras acabat, clabaras la porto e faras passa la clau pel trauc del gat. Ieu, m'en bau durmi!

## LA FOUNT DE L'ABAICHADOU

Sense se rebenta de gemega jouls jèiches

N'i a que passon le tems à s'assoumbra fouls frèiches,

Es la qu'a pos fielat qu'esquisso le lhansot!

JULES PONSOLLE (SA MAI).

A Nourjat, al mens, abèn aigo fresco, se n'abèn pos res pus, se disen les bièlhis. Aco, ja's plha bertat: l'aigo de Nourjat es fresco e bouno; las founts e las fountetos rajon pertout, ensa enlha.

Quand disì que rajon pertout, m'abansi plha, la fount de Foutanabibo, la milhouno de toutos, la qu'es estado apescado ande beni dins le bilatge. Nou parlen pos tapauc de las founts de las agals que coulou toutjoun dins le mourasou e d'ount le brouhadis s'auseich de lhènh. Mè parlen souloument de las founts dels pastous e dels baquiès, esparricados un chic pertout dins les bosques, les prats, les bousigasses e les camis.

Chi s'en ba beure encaro, bous ag demandi, menhant, à la fount de la Bouscarroto, que sourtio de tèrro dins uno bernhièro plheno de frescou? Chi se brembo encaro se ount soun las founts de la Bargo e de Cramihos tant aimados dels baquiès? Las brespado de l'estiu, les qu'abion birats debès Cramilhos s'arremassabon als entours de la fount quand las oundros coumensabon. Les goujats bebion à mour de biöu e las filhos, elhos, apescabon l'aigo dins le plhot de la ma e apèich se lhifrabon les pelses del cap de l'endreit ount jant bebion las gents, de grossos gourgos èron fèitos ande fè beure l'bestia. Bèi, aqueles dos founts s'en soun tournados dins tèrro, parce que degus pus nou las dèrp, la primo bengudo. On nou pod pos sabé, mèmo, s'an jamès bist le joun, les falgas e las roumendièros abrigon tout als entours.

E la fount de Milhaus, chi s'en brembo tabes? Aquelho o, èro bouno. La pus fresco, al segur, de toutos las founts. Degus nou passabo pos arrans elho sense s'adounoulha ande la tasta. Les que benion de la bilo nou s'en tournabon pos abant de l'abe bisto al mens un cop! Qu'es debengudo bèi? La siu aigo ba s'en toutjoun cap à l'agal dels Coubasses? Nou n'sè!

E la petito fouteto dels Tres Curès, que fasio creichi le mourasou entrans l'Agal Petit, arrans un matas de fach, e la founteto del Roucatèlh de Liau la lhauso, que pichabo d'uno roco e qu'on eicharlutabo les pots sus la lhauso, que soun debengudos bèi?

Besèts, es plha doumatje de las dicha pèdre. Se jamès degus de Nourjal lhejeich aquestos linhos, belhèu uno ma pietadouso las salbara un chic de tems encaro, las bira beire un cop per an, al printems, las durbira coumo se dibion serbi à qualcus, per re, pel soubeni de tout le bel qu'an pouscut fè tems passat. Chi sap, ne sira belhèu remerciado pels ausèlhs!

Mè la fount que m'aimabo le mès, quand èro joube, èro la fount, la founteto pulhèu, de l'Abaichadou. Un chic parce que sourtio de tèrro al founze del nostre prat de l'Abaichadou, à touca le coumunal, un chic encaro parce que n'èro pos plha counegudo: à peno se la sabion les qu'abion camps als entours ou les baquièsque s'en anabon garda las bacos à la Coutèlho. L'aigo pichabo d'uno roco negro, asoumbrado d'un gros marjal de bouiches, de roumendièros e d'abelhanhiès. Ande la trouba, calio siègue le caminot estreit qu'èro al founze del nostre prat e que s'en anabo cap à las tiros de la Tèrro- Negro i cap à la Couetèlho. L'endreit èro oundriü, retirat, plhe de frescou. Cado pic que i passabo debant, nou mancabo pos de m'amourra e de beure dins la gourgo, fèito dins un plhot de la roco. L'aigro èro fredo, lhaugèro, and'un goust de lhauso que i dibio beni de la roco qu'abio trabessat abant de nèiche.

Aquelho fount m'agradèc mès encaro, quand fegui un chic pus grand e que papai m'ajèc racoutat le counte que ba siègre. Desempeich, e lhejit aquelho istouèro, adoubado sibant les endreits, sus un filhoc de lhibres. Mè, per ieu, l'estouèro se pod pos desparelha de la fount de l'Abaichado e cado pic que i soun passat debant, à jparti d'aquelh joun, e toutjoun gaitat se besio randouleja la mandro qu'aimabo la mèl, abant de m'amourra sus la lhauso, amoulhegado pel fièl d'aigo que pichabo de la roco.

Uno bespado de la primo, bous parli de tems, èro encaro joube, les mibis m'abion pres and'ana foutja las patanos à Sousquiès. Fasio uno poulido brespado de caumas. Quand feguen à Sousquiès, ja nous espantèguen de beire le campplhe de cardouls e de couetos de mandros qu'abrigabon tout, mèmo las patanos qu'a peno se benion de nèiche.

Apèich, èro la tèrro qu'èro duro coumo l' cami. B'ag sabèts, la tèrro forto de Sousquiès, tèrro de blhat se n-h-i abio cap, èro granhalenco ande la trebalha; Las patanos èron estados semenados un joun de moulhuro e la tèrro s'èro enduresido coumo un roc, achi dessus.

Sulpic, le miu fraire se boutèc per la cabesso enlha, en menan dous regats e mamai le seguic. Aprèts benio papai e ieu al darrè, mè, coumo èro le pus petit, nou fasio pos qu'un regat. Le prumiè que fegui, tout se passèc à pus près. Mè quand nous fèguen rebiradis, à l'autro tournado, la musico nou fec pos la mèmo. Qu'èro basso la tèrro. Me couitabo tant que poudio, mè jamès nou poudio, mè jamès nou poudio abasta à

teni pèd à papai que m'adujabo, pourtant, e que menabo dous regats e mièi, la mès part del tems. La tèrro èro duro and'arrinca coumo cal las rasics dels cardouls.

Se nou foutjabo pos en dedens, la rasic se coupabo e èro prèsto à refè.

Quand ne fegui fart, lhèbègui le cap suen e me gaitabo le plhanèlh de Cramilhos ount jant les prumièris baquiès de la primo reguinnabon deja, sus la gerbo. Del bilatge, que se besio als nostris pèds, les piulets de quelques bourdegasses que n'abion pos res à fè coumo èro dijaus e que s'amusabon à siègue debès les camps de Campanho, pujabon jusco Sousquiès. Alabets, mamai m'embouièc pousa uno toupinado d'aigo à la fount dels Predets. M'ag fegui pos dire dous cops, diro tant de ganhat. Mè, quand tournègui arrapa le margue de la'ichado, uno mièjourado aprèts, le trablh me tournèc fè fasti, un autre cop. Abio les brasses coupadis, la miu eichado poudio pos mès esterroussa les terrosses que se lhebabon e, al lhoc de coupa uno rasic de cardoul èro uno camo de patanos que boutabo de patos amount.

Anem, aito de siègue, se me diguèc papai que s'èro abisat que n'abio pos embejos de fè res. Se me tenes pèd, t'en bau dire uno que counegues pos encaro.

Beses alha, l'autro part del riu, al founze del la Tèrro- Negro, le nostre camp n'èro pos nostre. B'ag e ausit dire pels bièlhis qu'ag tenion de tems a, le camp èro trebalhat, à- n-aquelh moument, per un outs e uno mandro que l'abion pres à mièjos.

Pauri de nous autris! La mandro tirabo toutjoun al flhèich quand calio trebalha e l'outs, tout soul, poudio pos abasta pertout. Aquelho annado, l'estiu dec achi, que le camp de la Tèrro-Nègro pos encaro semenat.

Mès qu'aco, coumo nou s'èros pos lhaurat de tems, l'aglam l'abio embagit, e abant de i bouta le gra le calio eicherbassa. Un bigos cad'un sus la 'spallho, l'outs e la madro decidèguen, un joun de grand soulelh, d'ana triga l'aglam e se feguen siègue la saqueto ande nou tourna pos à maisou per dinna. Quand passèguen al founze del prat qu'abèn à l'Abaichadou, penjèguen la saqueto al bouich qu'asoumbrabo la fount ande que la toupino de mèl que se trouababo dins le sac e que dibio serbi al repèich se tenguès al fresc.

Aprèts abe begut un cop à la founteto, les dous lhairous trabessèguen las tiros de la Tèrro-Nègro fèitos per la lhenho que s'i carrejo e las aigos de las prigoulados que debalhon de pr'achi-n-amount e arribèguen al camp coumo le soulelh i rajabo deja.

Sulpic, l'outs se boutèc à eicherbassa sense se bira les nhifals que coumensabon à èstre doulentis e sense l'eichuga la susou que i deblahabo pel bentre abalh; Mè la mandro, elho, peniquejabo pertout, se cercabo les endreits ount jant l'aglam n'èro pos plha espes ou se lhebabo dreito e, tout'n fèn senlham de s'eichuga l'colh, s'escoutabo les bruches que benion del bilatge ou se gaitabo las fumatièros que sourtion de las chumenèios e que le bient d'auta s'en pourtabo per Campanho abalh.

— Anem, trebalho, se i disio l'outs, qu'as la prusièro?  
Be me senlho que peniquejos plha. Ne faras pos gaire d'aci tantos!

E la mandros se tournabo bouta à escarrassa, mè aco durabo pos tems: lhèu, le nas anairat cap al bosc, escoutabo aro las poloumbos que se fasion focs sus matasses de fach de Campèstres.

Papai s'aturèc un moument ande s'escupe als digts e ande se gaita so que fasio ieu. Ero bertat, aquelho istouèro m'agradabo, m'abio fèit debremba les cardouls, le soulelh que rajabo e ieu me couitabo de truca sus la tèrro duro coumo l'fèr ande teni pèd à papai e ande nou pèdre pos un mot de la seguido. Alabèts, papai s'acachèc sus la rego de patanos e, tout'n trucan, countinuèc:

Aro, le soulelh se fasio coumo aquelhos jourgos que les nhifalhs enferenon e que s'en ban mousca dins les bosques en lheban la coueto.

Tout d'un pic, l'outs la bic que se rebirèc cap al bilatge, escoutèc un moument coumo s'abio ausit qualquares. E pèich respoundèc:

Plèti...plèti..

- E chi te crido? se diguèc l'outs.

- Que me cridon and'ana bateja un filhol!

- Un filhol! Auro calgut que t'ag diguèsson dins la semmano. Afins, t'i cal ana, autroment i ous sauro mal; La mandro s'ag fec pos dire dous cops. Ajèc lhèu fèit de trabessa las tiros, tout'n reganhan le tioul, mè, al lhoc de s'en ana tout'n baichan cap al bilatge, s'en anèc à l'enlha amount, cap à la fount de l'Abaichadou ount la

saqueto se refrescabo. Achi, se prenguèc la toupino de la pèl, la bouidèc juscos un tros abalh, se lhépèc la gourgo d'aigo fresco que debalhabo de la roco e s'anèc coulca dins le bejiure, à l'oumbro d'un alba. Quand ajèc fèit un son, s'en tournèc, lhaugèro, touto lhifrado, cap al camp d'aglam ount l'outs, abrigat de pincarts e de susou se rebentabo à bailha cops de bigosses à la barèito.

P 164

Soun tournado, se diguèc la mandro.

- E chin l'abèts fèit apelha?

- Coumensadet..... Coumensadet....

- Chun noum es aco? N'è pos jamès ausit parla; Dèu pos èstre de pr'aci-n-amount!

- E bièt d'ase, ja i anabo plha. Ero plha coumo cal.

- Anem, se cal couita, autroment acabaren pos d'aquesto semmano ni de l'autro. Apèich, la lhuno siro pos mès bouno ande semena l' gabatch!

E truca que trucas sus la gerbo que flhoureichio. Mè al cap d'un pauc, la mandro abio encaro set e embejos de mèl e pèich, d'aquelhos ombros d'alba qu'èron taloment frescos que las mouscos s'i aturabon pos dijous. Tabes, se tournèc bouta à fè minèstros, ja que i abio deja serbit un cop. Alabets, rebirado cap à Pijol, se tournèc bouta à crida:

Plèti.... plèti....

- E chi te crido, encaro, se diguèc l'outs -Que me credon and'ana bateja un autre filhol!

- Encaro! be s'ag an causit bè! Poudion jes demoura un joun de brumado! Anfans, se nou i bas pos, i ous faras un affront. T'i cal randre;

- Ja me fa peno garats. Mè m'en bau, se deguèc la mandro qu'abio dichat caire le bigos e que passabo deja la raso del camp, dijous le bèr ount s'asoumbron les lhouraires quand brespalhon.

Be t'ag emmajenos, la mandro s'en tournèc à la fount, se chapèc un autre chic de mèl, s'afartèc d'aigo e pèich se boutèc de tiouls amount dins le bejiure out le rousal acababo de s'eichuga e s'adurmic.

P 165

Aquelho mandro, quand mèmò, se me pensabo ieu, èro la ruso mèmò. E ieu, tout'n debremban 'ouro qu'èro, me rebirabo pos pus cap à Cramilhos ount las bacos boutabon tacos blhancos sus la gerbo, m'escoutabo pos mès les piulets de la canhièro que routabo les prats debès la Soulilhò, mè me couitabo de mena le regat ande poude ausi la fi d'aquelh recit.

Quand ajèguen brespalhat, toutis quatre siètadis à la cabesso del camp, à l'oumbro del marjal que se fasio de mès en mès lhoungo pel patanhiè abalh e que nous tournèguen trouba debant les regats que demourabon à fè, papai countinuèc:

Quand la mandro se fec prou asoumbrado, s'en tournèc al camp, ta countento d'elho que le prumiè cop e à l'outs que i demandèc se chin abion fèit apelha le mainatge, aqueste cop, i respoundèc:

Mièjet...Mièjet....

- E bol dire, aco? Iè garo, e ount les prenen aquelhis noums? N'è pos jamès ausit parla!

- Pourtant, b'es plha poulit!

- Se n'ag trobos, millhou! Bal mès atal. Anem, se cal couita. Miètjoun ba souna que n'auren pos encaro fèit la founzo del camp!

Tio bè! Le soulilh èro trop caut, aquelh joun, e l'auta que buffabo auro coupat les brasses dels pus balentis. A pus forto rasou les de la mandro que se tournabo gaita se l' solelh se fasio amount dins le cèl. Deja les baquiès s'en anabon ambarra, las mouscos èron trop aberidos.

P 166

Alabets, la mandro i tenguèc pos pus, se rebirèc un cop de mès cap à Pijol en cridan:

Plèti....plèti...

- E que te bolen, encaro? Be te cridon plha suen, bèi?

- Que me cridon and'ana bateja un autre filhol!

- Encaro! B'an plha la batejèro! T'i cal ana pus que fas pos qu'aco, autroment nous cercaran rasous. T'i fassos jes bièlho, pr'achi-n-abalh!

- I bau, i bau, se diguèc la mandro que courric and'ana toupineja e beure un cop de mès e ana attera le darrè bouci de bejiure ount jant las ombros nou s'èron pos enca retirados.

Quand tournèc, las campanos sounabon miètjoun al crouquiè. L'outs, rebenat, ne poudio pos mès. Pourtant, s'apuèc un moument sus l'margue del bigos e demandèc à la mandro:

E aqeste cago- nits, chin l'abèts apelhat?

Acabadet.... Acabadet....

- Bièt d'ase, e chi les trobo aquelhis noums?

- Nou n'sè, garo. Mè, aco es pos aco, s'en cal ana dinna. Ieu, soun sadoulho de courre, aqeste maiti, se diguèc la nostro rusado;

-As rasou, se diguèc l'outs, anen beure cop sustout; Apèich, tournaren eicherbassa. I ag cal fè counegue que i èn bengudis, autroment se nou n'riran!

Quand feguen al pèd de la fount e que l'outs ajèc despenjat la saqueto de dessus l'matas de bouich, la mandro sourtic la toupino, apartèc le tampadou e se boutèc à crida:

P 167

Mal foc del cèl! Te n'es bengut chapa la mèl quand soun anado bateja les mibis filhols!

- De que, de que! Abio trop de trebalh ande pensa à la toupino. Mè tu, que fasios d'aquelh tems?

Quand se feguen plha courroussadis, n'èron pos pus abansadis. Alabets la mandro diguèc à l'outs:

Anan sabé se chi la s'a chapado. Nous anan coulca toutis dous al rèc del soulelh e le que pèus lhèu susara entrans las camos sira elh qu'aura toupinat. Ag bos atal?

- Se bos. Ieu me fa pos res, l'a m'è pos chapado!

Risco pos res qu'attrape la susèro!

Alabets, toutis dous sourtiguen del prat, s'ne benguèguen dins uno tiro oun jant le soulelh rajabo tant que poudio e se coulquèguen; Mè, quand fec estirat, l'outs qu'èro fart de trebalha s'adurmic e talhèu que la mandro l'ausic que rouncabo, aqesto se lhèbo, tout siau, e i bé picha sus las quèichos;

Quand las i ajèc prou asaigados, la mandro se boutèc à crida:

Despèrto te, es tu que la t'as chapado, mentur, bouleur, fenhant! Que t'en benios brespalha quand ieu tenio les filhols a la glèiso!

E l'outs, deja qu'èro rebenat, acahèc le cap e calguèc que se calhèssou: le chapaire de la mèl j'èro elh, ja n'èro segur, aro!

P 168

Las ombros se fasion amount per la Tèrro-Nègro e la fount de l'Abaichadou, taco berdousenco, s'aprestabo à passa la nèit. Le recit de papai èro acabat, mè ieu pensabo toutjoun à-n-aquelho mandro que nou boulio biure que de fineso. Aro, j'èro content d'èstre bengut foutja la pantanhiè, ja poudion piula darrè la glèiso, ja m'en foutio. Quand les baquiès de Cramilhos passèguen per Bareto abalh dins uno poulido simboulado, las darrèros regos de patanos feguen foutjados; Le patanhiè poudio creiche, sense cardouls e couetos de mandros!

Apèich, n'abio ande ouèit jouns ande racounta so que se passèc, temsa, al pèd de la pus poulido founteto. Bèi que i pensi encaro, espèri que qualcus la bira beire e la netejara ande que les ausèlhs s'i pèscon lhiffra las plumos, un joun d'auta....

## LA MORT DEL PASTOU.

P 171

## LA MORT DEL PASTOU;

La Moulinhièro, un fichu sus l'cap, caussado d'esclopos negros gairebe nobos, se couitabo de debalha la Carrièro, à l'ento de soupa. Ount i anats, sus l' tart? se i demandèc la Pabilhouno qu'escurabo le casset à la fount.

- Bau beire l'Adjouènt. Le miu ome es anat relheba Pèli, aqueste maiti, à Lharnoum; E Pèli n'es pos encaro achi ande tourna la mioulo. Dèu abe arribat qualqueres al ramat ou n'a pos pouscut trouba l' cami dins la brumado...

-N'es pos tart, encaro. Belhèu s'es arrairit en dacon;

-Tio bè, que nou l'besi jes beni. E la nèit que se ba tampa!

-I o! Sustout and' aquelho brumo-basso, sira escur pus lhèu que's autris jouns.

P 172

E la Moulinhièro s'en anèc, alabets, tout'n se rebiran cap à Bareto ande beire se besio debalha uno mioulo e le siu trasinhiè.

Mè res nous se besio, per ta pauc que la brumo basso ag dichès beire, atteraco qu'èro jusco l' cap de la Roco, qu'un femaire que benio de fè l' darrè biatge ou qu'un parelh de bacos qu'un baquiè tardiu anabo embarra.

La brèspo d'aquelh joun de Julhet la prigoulado abio esclampetat aprèts uno semmano de caumas. La plhèjo qu'èro casudo debès las quatre ouros, abio negat l'èrbo seco dins les prats. Apèich, dins la nèit qu'abio seguit, la brumo basso s'èro barrado jusco l' founze de la bedo e le tems abio plhairejat tout le joun. Le Moulinhiè, dibio ana relheba Pèli que gardabo las gouelhos à Lharnoum. S'en èro anat debès las nau ouros e abio dit al besi que desempèich le finestrou del granhiè i fè prene un autre parelh de guetous.

Abèn la brumo per un chic de tems, prente ande te cambia.

Apèich, elh s'abio boutat la mioulo debant, cargado de la caco de patanos, del boubou, de la sal and'assala le ramat e de la fardo eichuto e n'abio pos tardat à s'embarbousti dins la brumo que s'atterrabo, aro, jusco l' mièi de l'Abaichadou....

Ja's embestiant, se diguèc l'Adjouènt à la Moulinhièro, se poden èstre perdudis, la un ou l'autre, and'aquelho brumo. Medigan se le Moulhiè n'a pos troubat degus à la jasso. Aco tabes pod arriba. Douma maiti, i bau fè puja dous omes, se Pèli s'es pos randut.

P 173



E l'endouma maiti, coumo de fèt, dous omes del bilatge partiguen à la cescubèrto, cap à Lharnoum. Le tems èro toutjoun macat. La brumo basso se lhebabo qualque cop jusco Cramilhos e senlhabo que se fasio lhaugèro, mè se tournabo barra, un chic pus tart, e la Tèrro- Nègro s'amagabo, un cop de mès.

La brespado, quand se randèguen, fec per dire qu'abion bist le Moulinhiè qu'arremassabo l' ramat espempilhat per touts las retrabèssos de la mountanho. Mè de Pèli, cap en lhoc. Suroment, s'abio fèit mal en qualque endroit, mès ount?

L'abèn cercat, tant qu'abèn pouscut. Mè demèst aquelho brumo n'es pos aisit. Apèich, abèn dichat la mioulo à la jasso. Se Pèli benio à se randre, ou nou pod sabé, l'auro sus l'jas.

Nous i cal ana toutis douma maiti, se diguèc l'Adjouènt. Bau fè passa l' chamtro.

L'endouma maiti, les omes-un per maisou-s'arremassèguen abant le joun, sus la plhaço. Fasio escur coumo uno gorjo de lhoup e la brumo basso èro toutjoun atterado. Toutis s'abion pres le bastou de pastou, la saqueto e la capeto, on sentio que dibio plhabineja. Les unis s'abion boutat les ellhops, gansouladis i tachadis de nöu.

Manco pos degus, se diguèc le Moua, ajèc fèit le tour de las cantounados, ande charra. Cad'un disio la sibo: caldro fè, caldro'na: me degus nou sabio so que s'èro passat à Lharnoum.

P 174

Se dèu èstre espalhat dins un tartiè, se diguèc la Dèno.

- Ou enfangat dins uno moulhèro, nou n-h-i manco jes, se diguèc le Pujat.

- N'ag cresi pos, i ous respoundèc Jan de Casso qu'acababo de se guetouna, le pèd apuat sus l' rebort del bassi. Pèli counèich trop la mountanho ande s'i dicha afina. Bè i trastejabo desempèich mès de cinquant' ans al mens. Sap toutis les passes coumo la siu pocho e n'es de sanc ou le prigoul l'a agatussat sus uno cri!

- Janouli bendra pos, se diguèc Micho à l'Adjouènt. L'è troubat qu'anabo fè ferra la bourrico al faure. L'autre joun embouièc uno saco de patanos al siu fraire qu'es à Marselho, e dasiè recebèc un papiè del Chèf de garo d'alha. Pareich que l' sac es en sufrenso. Alabets cal que i bango gaita, las pod pos dicha pati! S'en bira à calbalh sus la bourrico.

- Lhuscanho! Que se crets d'ana à Marselho coumo chi ba al Colh de la Fajo? Fasèts lheba uno mainado, que l' bango atèhe chè l' faure. Cal que bengo sulpic, nous troubara debès Lharnoum. Las patanos rait. Ecriurè à la garo douma. Dèu pos abe boutat l'adresso coumo se dèu. Anem, amount, se diguèc le Moua, n'en pos d'aci!

Les omes, alabets, s'en anèguen pel Besinat enlha, en estrabuncan als rocs del cami. Al cap de la Plhano, troubèguen les de Pijol, que's demourabon. Quelques cigaretos, ensa enlha, traucabon la nèit fèito d'escur e de retos, ensa enlha, traucabon la nèit fèito d'escur e de brumo basso. Dins les carriès, les gousse chaupabon, e, qualque cop,

P 175

on ausio un pourtanèlh que renabo en se durbin ou en se tampan. Le bilatge se bouidabo dels sibis omes les pus degourdidis. Las gents coumensabon à se lheba, aro e endebinabon mès que nou les besion les que s'en anabon cap à la puntanho ande i demanda de i ous tourna le pastou que se boulio garda.

Tant que caminèguen dins le bosc ou dins la bedo, nou fèguen pos plha derengadis pel rousal que casio de mès en mès espes à bèlh plhase que se fasion amount. Mè, la Sèrro del Roc passado, quand s'enguindèguen dins les aberdalhs e las gispetièros del Besset, la brumo les emboustissèc à fèt e la moulhuro i ous dentrèc jusco's osses. Cado fèlho d'aberdalh, cado matas de brougo, cado camo de falga ou cad'èrbo di gispet èro

plheno d'aigo que s'embarrabo pertout, à trabès les guetous. Toutis, caminabon la un darrè l'autre ande proufita del prumiè que soucadissio las èrbos e qu'ag prenio tout.

Anem, Cabarè, es à tu de mena, passo debant, se diguèc Tounrro qu'abio les pantalouns sougantis e que parlabo de 's se sourti.

Alabets Cabarè, es à tu de mena, passo debant, se diguèc Tounrro qu'abio les pantalouns sougantis e que parlabo de's se sourti.

Alabets Cabarè puntejèc, en debant de la colho que birabo amount e, d'un cop de bastou, fasio caire cops de beirats le rousal que s'arrapabo pertout. Mè, lhèu, fart de soucadi, Cabarè, elh tabes, dichèc repairea l' bastou e routèc l'aigo que i lhababo les guetous e que s'i embarrabo dins les esphlops.

Les prumièris qu'arribèguen à la jasso de Lharnoum, troubèguen le Moulinhiè que coussirabo le ramat e que boutabo berdet a la solo d'uno gouelho qu'abio le pèd escalfat e que coumensabo de ranqueja.

P 176

Qu'èts achi? se diguèc tout'n escupen entrans las unlhs del pèd de la bèstio ande fè arrapa le bistol. Bous demourabo. E be, i a pos res de nou desempèich anèit passabo. E bist le pastou de Bese. Pèli i èro pujat dos bounos ouros abant la prigoulado de l'autre joun cerca un alhelhat qu'abio troubat de mens al ramat. Es elh le darrè que l'a bist, se dins le cas.

\_ Manjen un moutsèc, e apèich nou' biren, se diguèc l'Adjouènt.

Les omes se sietèguen sus la capeto, als entours de la cabano e sourtiguen le pa le salsisot de la saqueto.

Ande so que cats, se diguèc Tanguet, bal mès beure à la bouto qu'à la fount. E las boutos, plha tibados, passabon de ma en ma.

N'en pos aci ande fè la riboto. Bou'n anats ana, dous per dous, e seguirets touti's camis que fan las bèstios and'ana amourgalha ou ande prene la birado, d'uno coumo à l'autro. Le que troubara qualques le prumiè sen bendra aci, à la cabano, e buffara dins le cagarol que penji, achi, à la crinal del tet. Se nou troubat pos res, e be, bous arremassarets aci, à l'ento de s'en tourna. Se n'abèts pos la mostro, b'ag beirets sibant la talent qu'audreit. Tu, la Dèno, qu'as bouno coumo camo e que counegues l'endreit, bas ana dins les tartiès de la Toso d'Encarnhès.

Pren-te qualcus. Tu, Bandeso, bè t'en beire les moullharals de la jasso dels Caudiès. Bous autris dous, anats bou'n le lhoung del riu de Lharnoum e pujats jusco la Ribo de la Calbo, n'abèts qu'a siègue les caminots... E les omes s'en anabon, cop de dous ou tres, cap à Lhahunardo, La sèrro dels Afumats,

P 177

Le Pas de l'Escaliè, La ribo de Founcendrasso ou La Toso de Bese. D'autris encaro partion rassoulheja dins les matasses ou les timbals dels camisque menon à Balodreit. La moulluro les emboustissabo gairebe sulpic, on n'ausio pos que le brounhadis de l'aigo del riu de Lharnoum ou les crics de Oöu... Pèli... que jitabon les omes cado cop qu'arribabon al cap d'un tussal e d'ount le ressou tournabo tout dreit, amourtousit per la brumo basso.

A mièjo brespado, l'ouro de s'en tourna èro achi, les omes se randèguen cap à la cabano de Lharnoum. Le cagarol n'abio pos sounat, degus nou dibio abe troubat traço de res. Tabes, on les besio arriba à bèlh plhase, coumo à regrèt, on auro dit qu'abion bergounho de se fè beire. Ne benio de pertout, d'amount, d'abalh, toutjoun emboustissadis de brumo que les fasio pareiche pus grandis que nou èron e on nou poudio endebina se ch'èro tant que n'èron pos à poutabo de la bouts. Toutis èron fartis de courre, sougantis de moulluro, la topo blhanco petitos goutos d'aigo e les pèds que lhabarquejabon dins les esphlops. Talhèu qu'èron al pèd de la cabano, jitabon la capeto pel sol e se sietabon, jous l' rousal que casio espes: que i fasio

aco, un chic mès, un chic mens, èron molhis ta plha, alabets.... Degus nou parlabo, cad'un roumiabo las sibos pensados, toutis ne boulion à-n-aquelho mountanho tant agradenco quand boulio èstre de grèu, tant irètjo quand le mal tems s'i destacabo e fasio pati bèstios e gents. Que se dibio abe passat, aprèts aquelho prigoulado qu'abio fèit tremoula las gulhos de las bièlhos picos e espalbatjat l'aujam que nisabo les roucatèlhs?

P 178

L'encantaire de l'endreit dibio abe maichanto counsienço pusque desempèich tres jouns la brumo basso amagabo encaro als lhouris elhs las mèrcos de la siu coulèro!

Tout d'un pic, les omes selhebèguen dreitis sus bastous: dos ous ombros arribabon, alha, de la part de Founcendrasso, e la uno, la pus la espallhos. E s'èro Pèli? Qualcus courric, al debant, mè s'aturèc, embahit, à quelques passes: l'ome pourtabo un anhelhat, que se dichabo carreja, le cap penjat, les èlhs tampadis.

Tè, se diguèc Braguilh, l'abèn troubat à la Ribo de la Calbo, entrans dous rocs. Douma, siro estat mort, les babots acababon de s'i rousega la solo dels pèds.

L'anelhat, coulcato sus la jasso, se dichabo palpa. N'abio pos mès que la pèlh e les osses. Un ome i pourtèc un chic de lhèit qu'abio troubat dins uno toupino. La bèstio la se beguèc, tout siau. Un autre gaitèc se pouidio beire courre encaro quelque babot, dijous la corno de las unlhs que tenion al pèds coumo un fièl. Apèich i boutèc uno gouto d'oli als quatre pèds e les i emboustissèc d'un pelhot.

Anem, ja s'en tirara, se diguèguen toutis. Le cal recoumanda al Moulinhiè. Dèu èstre l'anelhat qu'èro de mens e que Pèli cercabo le joun dels trounics.

- I èn toutis, se diguèc le Moua. Anen nou'n, es l'ouro.

Douma cal tourna puja. Belhèu Jan del Rèu a rasou, biren toutos las cris.

P 179

La nèit fec courto pels dalhaires que calio que tournèsson à Lharnoum. L'endouma maiti, toutis èron achi, testudis, les unis ande la fardo qu'abion fèit seca al pèd dels andèrs, les autris ande's pantalouns à peno toursidis, les esphlops empalhounadis de fresc. Toutis s'en caminèguen coumo la brèspo, cap à la Sèro del Roc: i ous tardabo d'èstre sus l' jas ande beire se chi auro le dessus, d'elhis ou de la mountanho que fasio toutjoun malocaro.

Cal que n'ajo causos à se reproucha, se diguèc La muleto, pusque fa toutjoun la pourarrudo!

Sus la jasso de Lharnoum. Le Moulinhiè fasio beure lheitou à l'anelhat que senlhabo un chicot pus aberit.

Aquelho brumado, es plha escasut per elh, se diguèc Cabarè. Se fasio soulelh, le te caldro pourta al pèd d'un matas.

-Tio bè, i respoundèc le Moulinhiè, d'aci que fasso soulelh, se s'en debe, ja caminara, se n-h-in bira tout soul!

Coumo la brèspo, l'adjouènt se couitèc d'espempilha les omes dins toutos las trabèssos de la mountanho, mè, al lhoc de i ous fè siègue les tartiès e las moulhèros, i ous recoumandèc de fura las cris e les tussals.

La brespado d'aquelh joun, quelques unis èron pujadis à Bese e à Lhahunardo e se troubèguen debès las quat'ouros dins le bosc que berdoulejo al cap de la gispetièro e te tout l'esquerje de la soulano de l'estanh de Lharnoum. Toutis èron sadoulhis de cerca.

P 180

Chi sap se qualcus a gaitat dins l'estalhol, se diguèc Tounrro.

- I gaitèguen d'asiè, respoundèc Lampè. Biguen pos res. Ande la brumo barrado, se pod beire d'un bort à l'autre.

E alabets, les omes se boutèguen à trabès l'esquerje, tout'n repepitjan dins le gispet rousalut.

Tout d'un pic, troubèguen uno capeto touto plhegado, pel sol.

Aco es la siu capeto, se diguèc un, ja la i counegui. La dèu abe perdudo abant que lhabasse pusque n'es pos dubèrto.

- Belhèu a fèit coumo nous autris, s'en es passat pr'aci and'èstre pus lhèu randut le joun que cercabo l'anhelhat.

Les trounics i dibèguen fè pöu e coumo le gispet èro caut, se dibèc abia.

- Debalhen tout dreit, menhant, un chic.

A forse pus lhèu debant elhis al gispet, les omes troubèguen lhèu debant elhis l'estanh que negrejabo dins la brumo, al lhouris pèds. Un chic lhènh del bort, dijous dous ou tres pams d'aigo, biguen uno sorto de popöu touto negro, que nou s'enfounzabo pos.

Pèli, se cridèc qualcus, s'es negat!

- Bau fè souna l'cargarol, se diguèc Lèon. Apèich, menarè la mioulo ande l' s'en pourta.

- Chin l'anam sourti d'achi? se diguèc Tounrro.

Mèmo se n-h-i a que saben nada, chi se bouldra jita dins

P 181

lestanh? L'aigo dèu èstre fredo. Me digam ande l'ana cerca tant en dedens!

Le ressou del cagarol benio, aro, cap à-n-elhis, pujabo per la coumo'mount e pourtabo à toutis les cercaires la mountanho abio tuat le paure pastou.

Un roc jitat dins l'aigo, per darrè, le diuro fè maure, se diguèc Lampè. Caldre ensaja. Belhèu s'en bira cap al plhanhiè, de l'autro part de l'estanh.

Coump de fèt, l'aigo, treboulado, fasio rounds e cado round butabo Pèli un chic pus elha. Les omes se couitabon de desterra rocs, d'autris s'en anabon cerca lhausasses dins le tartiè lhabat per l'aigo que sourtio de las cunhièros e pèich las arrounsabon dins l'estanh, darrè l' pastou, que se fasio lhènh de mès en mès.

Aro, les omes arribabon sus l'autre bort. On besio la mioulo à trabès les fumarèls de la brumo que peichio l'èrbo fresco demèts les aberdalhs. L'adjouènt èro ' chi, tabes, un lhansol à la ma, que se gaitabo Pèli pourtat per cado round d'aigo. La Dèno, que benio d'arriba, bic que s'i poudio abasta: l'estanlh, ount jant èro le mort aro, n'èro pos gaire entraucat. Sense fè ni uno ni dos, se boutèc dins l'aigo tout bestit e caminèc. L'aigo i arribabo à la faicho. Ande l' bastou, La Dèno fec beni Pèli cap à-n-elh, l'arrapèc per un pèd e le tirèc sus la gerbo. Toutis, alabets se sourtiguen la topo e se calhèguen, un moument. Apèich, i feguen fè dous tours ande l'engouta, l'emboustissèguen del lhansol e le carguèguen sus la 'mbarbo de la mioulo.

P 182

Quand passèguen debant la cabano, l'anhelhat qu'èro mort. Uno mièjourado aprèts, la tiro de toutis's autris, al darrè de la mioulo, debalhabo pel cap de la Tèrro-Negro e les plhaces sounèguen al crouquié. Just à-n-aquelh moument la brumo se dasarrapèc e les fumarèlhs s'enfounzèguen dins la bedo de Lhasquir. Le cèl se tournèc beire, tout blu. Les darrèris rajols del soulelh que se coulçabo darrè la Bouicho l'hepabon l'usplhado de Camp Redoun ount jant le ramat de Lharnat, qu'abio proufitat del mal tems, s'en èro bengut pèiche e s'èro

atterrat. Uno 'stelo lhusio deja al dessus de Pijol quand Pèli arribèc al founze de la Plhano. Las fennos e la mainado s'èron arremassadis achi, ande l'eni demoura. Quand passèc debant elhos, toutos se senhèguen e pèich se boutèguen darrè les omes jusco maisou. Rabot deja èro' chi, uno ficèlo à la ma, ande prene las mesuros. Pèli fec desemboustissat de las tralhos e quatre omes le s'en pourtèguen dins maisou, toutjoun abrigat del lhansol: la mountanho n'abio pos agut le darrè mot. Un autre pastou l'abio relhebat, las gouelhos s'en èron tournados dins les esquerjes e las gispetièros quèrre las pus poulidos dins flhous de regalècio.

## LA FRUTO

Le Printems be fè le flerut  
Jous un soulelh plha mal carut;  
Bol festeja: tourni fulha...  
E quand las flhous sorten dansa  
Abrièl, jelous, las fa ruma.  
Le que bol fruto cal que prègueè

PAULETTE GABARRE (PLHANH DE L'AIBRE.)

P 185

## LA FRUTO.

La fruto a'gut, de tout tems, le poude de fè 'embefo à la canhièro. Nou parlen pos des abajous tant agradenquis quand es rousalut, des gerses e de las majoufos que s'amagon dins les campèstres, des coulindrous doussis que creichen als bords de las agals de Nauseno, des toulhs, ou de las amouros que, la tardou bengudo, negrejon per touti's camis roucatelhudis. Nani, n'es pos d'aquelho que bous boli parla bèi, mè de la fruto qu'on trobo dins les orts ou dins les prats qu'abesinon le bilatge.

Noutjat siro la tèro benasido de la fruto se nou i abio pos las tourrados de la primo que se benen chapa sus l'aibre, qualche cop, las poumos toutos en flhous. Mè que l' coucut bengo d'ouro canta debès Marjenet e on pod beire, alabets, las carièros roujeja su's ciriès e las blancs dels poumiès touca l'sol, cargados de poumos de las plhanhièros ou de las rainetos.

Les bièlhis ag sabion tout aco. Tabe, les aibres qu'abion plhantat, tems a, fasion embejo à toutis, pas solument à causo de la fruto, mè tabes parce que on les troubabo poulidis quand on les se baitabo e qu'on tenio plhase à l'i asoumbra dijous.

Chi nou se brembo encaro del ciriè de Gabarrou? Aquelh aibre, qu'èro plhantat al bort del cami, abant la glèiso, èro carano. On disio: Anan al ciriè de Gabarrou ou Nous èron aturadis al ciriè de Gabarrou ande fè la rasounado ou encaro: L'è recounegut quand es estat al ciriè de Gabarrou e toutis coumprenion so qu'on boulio dire.

Le dimenje, talhèu qu'èro atarrenhat, les joubis s'en anabon al pèd d'aquelh ciriè fè-se à las billhos. Les pus adreitits mandabon toutjoun à la touca, mè les autris les afinabon, le cop d'aprèts, en mandan à la tento folho e la forso, la ruso e l'adresso abion le dessus un cop cad'uno.

Apèich, quand le ramat èro pujat, que la calou coumensabo de fè baira les guindouls jous la fèlho, la mainabo suen s'èron maduris, en lheban le cap. Mè chin fè ande i puja? Qualques bourdegasses, que s'escasion pus degourdidis, se fasion sus-colho ande i arriba e quand èron sadoulhis, fasion caire branquets que la canhièro apescabo, demèst le blhat.

Gabarrou..... Gabarrou.... se disio qualcus qu'abio bist beni un ome.  
Alabets, touto la bando s'en fujio à trabès Campanho,

P 187

per las rasos dels camps de seguel. Les qu'èron sus l'aibre, espaurucadis, debalhabon jusco las darrèros blancsos e achi se dichabon caire dins le blhat, de plhen pes e s'in fujion, elhis tabes. Gabarrou n'atrapèc un, un cop, que benio à peno de sauta e que se fregabo's pots, tout bergounhous.

Que fas achi?

- Nou res... Gaitabo se i abio peses dins le blhat.

- Baldro mès que m'en sourtissos las nhièlhos. que me bos pillha las camos? Que t'escrasès!

Les aibres de fruto, les que fasion qualqueres de bou, les joubis les couneguion toutis. Chi se brembro encaro del castanhiè e del nouiè de Malubèr, als prats d'Abalh? Achi n-h-i abio dous aibres de dous aibres de couma cal. Cado pic qu'on i passabo dijous, la tardou, aprèts uno nèit de tourrado, on èro segur de trouba al pèd un escalh que lhusio dins le bejiure. Les aibres, on les respectabo. On nou i tirabo pos rocs ou bastous ande fè caire la fruto, mè so qu'èro pel sol èro recatdat e degus nou disio pos jamès que s'apelhabo pana.

Qualque cop, la junèssos anabo frullha un punhiè cargat de cocöus ou un perilhounhiè que las blancsos toucabon pel sol, prèstos à peta. Mè aco èro pulhèu un despieit, un aire de dire Es pos tu que n'as agut la primou e encaro ja sabion. Arribabo suen que, entrans dos courtados, les perilhous d'un ort èron soucadidis. E quant de cops, la nèit, à la frescuro, quand les lhums s'èron amourtadis dins la maisous, uno bando s'en anabo soucadi las prunos d'un tal. Le pus degourdit pujabo sus l' prunhiè, les autris s'amassabon las prunos dins la topo, demèst les caulets e las s'anabon chapa al bort d'un gajal, sus uno erbièro, sense gaita se n-h-i abio cap de baboutado.

Aco fasio repoutega le qu'abio le prunhiè, belmal, mè, la mès part del tems, se gausabo pos plhanhe, parce que sabio que les besis se siron foutudis d'elh.

Beirets que les jandarmos pujaran, un joun, se disio Bati, e n-h-i aura quelques unis que s'en biran fè esperdenhos!

E les poumiès, bou n'brembats d'aquelhis poumiès, de las plhanhièros qu'èron, que calio paichelha quand las blancsos toucabon pel sol taloment èron cargados. Las prumièros que casion, un joun d'auta, alabets que n'èron pos encaro maduros à fèt, nous arribabos de las nou-s amassa, dins les orts, e de las nou- s bouta à couga, dins le bejiure, arrans uno jassinhièro d'un porje.

N-h-i abio un sustout, me brembi, qu'èro debès les Prats d'Abalh, à un prat grand coumo dous lhansols. Las gents dision qu'èro de Labur.

Uno annado qu'aqueste Labur dibio èstre al Pais- Bas ou à la gredo, nou n'sè ount, les joubis s'èron arremassadis, aprèts soupa, dijous s'èron arremassadis, aprèts soupa, dijous l'gajal de Finou e s'arrestabon del rousal en se sarran al pèd de la porto del porje.

— Me senlho qu'un beire de citro debalharo, se diguèc un.

— Qu'as manjats salsissot? se i respoundèc un autre.

— Se ne boulèts, ne pouiron fè, se diguèc Lèon. E un poumiè que fa pos que rafatalho, al Coudi. Le pouiron ana soucadi.

— B'es lhènh, aco, le Coudi, se diguèc Mouret. S'en bal pos la peno de s'ana pèd-bira.

— E se nou'n anabon à las poumos de Labur. Aco be siro pus prochi.

Qualcus abèc quèrre uno saco del minot e nou n'anèguen touti's per Campanho' balh. La nèit èro'scuro, enca que i ajèssò estels. Dins les bosques de Nalham, las tabècos se cridabon e, d'un aibre à l'autre, debalhabon jusco l'riu.

Arribadis al prat, nou n' anèguen cap al poumiè tout'n estrabuncan à la gabèlho de cambel que grisejabo dins l'escur. Sulpic, nous boutèguen à emlhena la saco de poumos grossos qu'arrapabon à plhenos mans sus las abion alhaujeridos. Qualque cop, uno poumo baboutado se dechabo'na de las brancos las pus nautos, aprèts uno brandido, e nous casio sus l'cap en nous fèn estrementi. Quand le sac fec plhe, dous de nous autris l' arrapèguen per las las michos, un autre pels ulhets e nou n'anèguen chè la Lhibertè que tenio la prèssò à fè la citro.

La Lhibertè se gaitabo las poumos qu'èron bouidados dins le nauc e ja troubabo qu'èro doumatje de las esplhafa.

— Es pos rafatalho, aço, b'es doumatje! Las bous calio garda ande l'ibèr. De chi soun? Soun las tibos, Lèon? Ount las abèts?

— Nani, se diguèc Lèon. Soun las de Miquèl. Be sabèts que se baboton toutos. On las pod pos garda. Tant bal las aproufita tant que poudèn!

E la Lhibertèse calhèc. Pourbu que paguen..... se dibio pensa. Quand la citro pichèc, al founze de la prèssò, cad'un s'emplhenèc le beire e beguèc un cop.

— Nous boutaren la que demourara dins uno दौरmo e la nous bendren beure cado nèit un chic, se i diguèguen.

Sira milhouno quand coumensara de pica.

Quand Janou partic al serbici, la prumièro permiciou qu'ajèc, debès la fi de la tardou, èro sourtit dins le besinat ande dire so qu'abio bist de poulit al Pais-Bas. Mè, abant de s'en ana durmi, qualcus diguèc que, del moument que la lhuno s'èro lhebado, biro plha and'ana tasta les precècs de Nourè del Pas d'Engabarro.

— Soun maduris, aro. Tardara pos à i ana ande's se recatda. Les caldro tasta abans elh!

S'èro 'stat poumos, degus n'auro pos fèit cabalh. Mè precècs! Chuno idègo abio' gut, Nourè, de plhanta priceguiès! Anfins, tant pis per elh, calio decidat la junèssò.

A gratipaudos, les joubis s'aprouchèguen de l'ort e, ande la lhuno que plharejabo, ajèguen lhèu fèit d'aparta l'espinas qu'èro à la barralho.

Coumo i abio pos plha tems qu'abio lhabassat e que la tèrro èro souganto, les esplhots fasinpèdjós dins les regats de las joutios. Mè Janou, que s'abio dichat las sabatos, abio boutat pertout de poulidos rengados de tachous que se biguen d'un tros lhènh, l'endouma maiti, quand le soulelh tournèc raja sus l'ort.

— Que soun le carbou, se diguèc Nourè. M'ag an tout debarautat. Mè ja sabi se ch'es. I èro la sabatado del fantassin!

Bèi, toutis aquelhis aibres de d'autris cops se besen pos pus. Les unis de bielhuro, les autris debrancassadis pel bent de l'ibèr, toutis s'en soun anadis endacom mès.

Cou las gents que demoron bèi al bilatge, n'an pos plhantat d'autris à la plhaço? Uno marje b'es pus poulido quand i un ciriè que roujejo pulhèu que de i beire creiche las autrigos. Le pais, s'èro plhe de fruto, faro embejo e noun pas peitat. Se i abio aibres pertout, s'en ne manjen, les que n'an coumo les que nou n'an pos. E se toutis n'abion....

Anem, le cal tourna plhanta le ciriè de Gabarrou. Me senlho que manco qualcus, per Campanho' mount, ande me dire:

— Qu'ès tournat? Ieu, ja te demourabo!

## **BOURROUMBOS E BOURROUMBILHS.**

Dins uno glorio de campanos  
Le ramat gautjous de las lhanos  
Pinlo- minlo engalhat, arpino, tout'n raujant.

Debants sount las ouelhos bassibos  
Que foutralejon per las ribos,  
Pèit le gros troupei que ba palanquejant....

CÉLESTIN MAFFRE (RAMOUN E BELHOU).

Se pujats un joun dins un granhiè de Nourjat les bostris èlhs se gaitaran sulpic un furgou plhantat sus un cabirou del tet, arrans un finestrou, ount jant beirets penjados canaulos d'un flhoc de qualitat. Qu'e poulit tout aco e misterious! N-h-i a de petitos que porton uno couscourro de gous ou un simboulet de crabo, de mièjancièros and'un esquelhou ou uno esquelhou ou uno esquelho de gouelho, de pus grandos and'un simboul ou uno esquelho de baco.

Mè las que bous estounaran le mès siran aquellos canaulos que soun pos plha grandos del colh, mè lharjos, lharjos de ouèit trabèsses de digts al mens. Ande las tampa, le que las a fèitos i a boutat sèt ou ouèit boutous de bouich, plha ajustadis, la maitat que nou serbeichen qu'a fè poulit, les autris barradis and'uno cabillho plha sarrado. A-n-aquellos canaulos soun penjadis de grossis bourroumbilhs ou bourroumbos de touto sorto, de lhonguis, de bentrudis ou de repoutidis. Se les fasèts tinda, chun bataclam nou sort d'aquellos esquelhos: i a sous estranjis qu'emphenaran le granhiè e bous retrouedaran dins las aurelhos.

Alabets, ja pensarets als pastous de d'autris cops e las bostros idègos caminaran à l'endarrè. A -n que poudio serbi tout aquelh esquelham? Menhant, menhant, gaiten nous oc. La couscourro serbeichio al gous que randoulejabo à l'entour del ramat: las gouelhos n'abion pöu, s'en mesfisabon e, talhèu que l'ausion se rebirabon. Qmuant de cops dos pastous que n'abion pos qu'un gous à-n-elhis dous, que nou poudio pos abasta, pertout, se prenion, la un le gous, l'autre la couscourro!

Talhèu qu'on alhargabo las bacos dins les ginestas ou las malesos, la primo, on i ous boutabo les simbouls; En las gardan, on las besio pos toutjoun, perdudos qu'èron dins les campèstres. Mè on poudio dire: E ausit le simboul de la tiu Ramé! e atal, plha suen, on n'abio pos besoun de i ana gaita. Debès dos ouros de la brespado, quand èro l' moument d'alharga, Mamai me disio: — Paurot, t'en cal ana, ausi les simbouls que coumenson de sourti.

E bous è suen parlat endacom mès de la dimboulado que durabo uno mièjourado e que passabo per Bareto' balh, à l'ento d'embarra.

Las bacos que pujabon sus la mountanho, al mes de Julh, èron esquelhados. Las bièlhos, talhèu que la canaulo i ous èro boutado al colh, ja sabion so que boulio dire e ja s'en cresion, garats. Deja pensabon à la plheto d'èrbo fresco e à la filhaino dels aberdalhs. Uno esquelho, ja la fresco i ous calio, ande que l'banquiè la pousquèsso ausi quand se troubabo soulo dins la brumo basso. E le bedèlh, se n'abio un, se fisabo al sou e troubabo sa maire pus aisidoment.

Ero parèlh per las gouehlhos que pourtabon tout l'an esquelhos, esquelhotos ou esquelhous; Las milhounos, toutos esquelhados, s'en menabon las autros que seguion le sou de la 'squelho que s'estimabon le mès. Mè las bourroumbos, mè les bourroumbilhs, à-n-que poudion serbi? Degus n'ag sap! Res, uno pared, l'escur, degus nou s'en brembo, degus n'ag a ausit dire pels bièlhis.

En darrèro, n-h-i a pos gaire d'aco, aquellos èron boutados als marras ou als anhelhats ande fè bruch, ande croio, ande fè creire que l'escabot èro fort. Le que s'ausio de pus lhènh èro le pus poulit, e de bèlh cop. Mè abans? I dibio abe d'autros rasous, m'en mesfisi; Chi sap se las bourroumbos n'èron pos ande fè pöu à la malofèito, als lhouns, als outses, à las faïnos que se benion ande las maires dins les orris. Belhèu, tabes, èron achi ande que las brèichos e les encantaires nou se gaugèsson pos approucha ou mèmo ande que l' prigoul nou bengo 'sclampeta sus l'rammat un joun de prigoulado!

A perpaus d'aco, bous boli dire aquesto; Uno annado, la primo fec abansado e la nèu se foundèc d'ouero sus las plhetos dins les orris que le bent d'auta atarrenhabo. Les pastous que dibion puja l'ramat à la jasso dilhus de Julh, bisto que l'ramat de Courtal Marti èro pujat, elh, desempèich uno bouno demmano, ouèit jouns aprèts las bacos qu'abion deja pescut la plheto. Calio proufita del caumas que fasio: las bèstios s'enrudiron pus aisidoment ande passa las nèet deforo.

Aquelh maiti, douncos, les pastous se lhebèguen abant le joun and'ana cerca les escabots dins las bordos. Calio d'abord pega e apèich barreja;



A punto de joun, ne besion beni de pertout: ne benio de la Bouicho, que debalharon de Labelhanet. Las bèstios, engourmandidos per la bisto dels caulets, sautabon dins les orts debès Marjenet. Ne benio per Roc Coubertoula' balh, per Endoumens, per Pèirofesso. On ausio le bruch dels bourroumbilhs que retrouniddabo jusco darrè la Roco. Ne benio per Bareto ensa: aco èro l'escabotot de Toutoun del Moulinhiè que passabo. N'abio pos qu'uno binteno que se boutabo al debant, esquelhados and'esquelhous ta petitis qu'a peno s'on les ausio: b'ag sabèts que las menabo pos dins las bedos! Las bèstios se quilhabon sus l'bord del cami and'ensaja d'abasta à la sibado del cap de la ribo e Toutoun attissabo la goussou ande las fè camina.

Les escabots trabessabon le bilatge s'embarrabon dins las ièros.

Achi i ous boutabon la mèrco sus la lhano aprèts abe trempat l'utis dins uno pairoulado de pego que calfabo sus un brasiè d'estèlos de bèr, al cap de la ièro. Las gents se gaitabon passa les escabots, fasion le coumpte de las bèstios qu'abion la ranquièro ou soucacion le cap, amount e abalh, quand besion negreja la lhano de las gouelhos que s'èron coulcados sus l'fems, dins la nèit.

Aro, èron les escabots de Soustal que benion per Farièros ensa. Janou, debant le diu escaot, le bastou à la ma, seguit per las gouelhos las pus manhangos, debalhbo per que durmion enca; Jano, plhe de croio, s'escoutabo aquelh bataclam e l'escabot fasio uno tiro darrès elh, tout esparricat. Las gents se dision: D'ase per elh, ja s'en crets, ja las fa souna las bourroumbos! D'autris se rebirabon cap à l'escabot, en se gaitan les flhocs per darrè, e les anhillats embastadis de lhano que s'ufilhabo: — J'a de poulit bestia, qu'es le tounèro!

A! ja l' se poudion gaita, toutis, tant que boulguèsson!

Ne besion pos suen gouelhos de ta blhancos, le flhoc plha dreit entrans las aurelhos, and'anhèls que guimbabon sus l' rebord des naucs d'abeura e cap de rancos: si fèt, uno soulo, qu'abio arrapat uno tacho.

Dins la ièro, la pego abio bouno flhaino. Janou se couitabo de dinnalha e de se fè la museto: calio que birèssou mount, tantos. Las gouelhos se repairabon en le demouran e, un'ento pus tard, l'escabot s'en anèc per la Roco' mount, darrè les autris que coumensabon à s'estira pel la Tèro Negro en se barrejan. Les belècs dels anhèlhs que cercabon las maires s'ausion del bilatge, le bruch de las bourroumbos espalbatjabo les ausèlhs qu'abin nisat dins Campèstres.

Les pastous, talhèu qu'abion barrejat, butabon le ramat per las tiros de Cramilhos, mè n'abion pos besoun de i ous ag dire dous cops. Las gouelhos bièlhos ja sabion deja qu'èro le grand joun e s'en anabon, le cap anairat, cap à la bedo: le goust de la regalècio i ous tournabo despèich l'an passat.

Per Bareto'mount, l'ase del Maitinhiè, le prumiè pastou de las Coulhatos, pujabo elh tabes, cargat de las biassos del pastou, de la sal e d'uno saco de patanos.

Al Roc, le soulilh rajabo quand le ramat sourtic de la bedo. Achi, le dichèguen pèiche, un moument, abans de l'enguinda cap al colh del Szsc. Les pastous s'en abèguen debant, alabets, ande l' Maitinhiè, ana fè la cabano e un ome soul seguit le ramat.

A las Coulhatos, les pastous se boutèguen à refè la cabano. Les unis fasion plhapasses de gerbo, sus la plheto, and'enlhansa l'tet; d'autris anabon cerca brancos lhisos de fach ande la crinal e les barrous; d'autris enca amassabon fèlhos eichutos, falgas ou fenasso bièlho que serbero à fè l'jas.

Sus l' tard, on coumensèc à ausi les bourroumbilhs del ramat que dibio èstre, aro, debès le Pas de l'Escaliè.

— Caldrouna cerca un chic de lhenho ande te calfa e fè coïre le soupa, se diguèc Mouret.

— È tio, ja m'arremountarots, se respoundèc le Maitinhiè. Abats i abans de bou'n tourna.

Alabets, Janou de Finou, Lèon del Riu, Toni e le Toc, s'en anèguen en s'en pourtan la pigasso del pastou. Les unis boullion an acerca brancos de fach de la part dels Caudiès; d'autris, al countrari, dision que siro pus aisit d'ana quèrre tiouls de genibres que se secabon dins uno usplhado debès la Sèro de Lharnoum.

Bal mès bira' mount se diguèc Léon, quand siren cargadis debalhara e noun beiren pos tant and'ag tircoussa

E toutis quatre partiguen sulpic cap à Lharnoum. En cami, le caumas les fasio susa. De la part de la pico de Bese, de grossis roucatèlhs de brumos negrous sotrion del sol e pujabon dins le cèl.

Cresi qu'auren les trounics, se diguèc le Toc. Las mouscos soun doumentos. I abio la cacaduro debès Baichon, aqueste maiti. Le ramat n'ag escaira pos plha per la prumièro nèit à la sereno.

A la Sèrro de Lharnoum, les rousegous de genibres èron bèlhis. Les omes les derrasigabon. Finou se couitabo de coupa les pus duris ande l'pigassou e les autris ne fasion quatre carrassados qu'estacabon ande redortos de pudeguiè.

Un trounic qu'escampetèc debès la Sèrro dels Afumats les fecs couita un chic mès.

— S'en cal ana, i fa pos bou à Lharnoum quand fa mal tems. Me digan quand i a la prigoulado, se diguèc Toni. Deja la brumo basso pujabo per Balodreit amount. Aro les emboustissado à fèt e tresion mal à troubat l'cami.

— Se cal pos pèrdre, se diguèc Lèon entrans dous trounics que feguen tremoula les sarrats. Seguièts -me.

E toutis quatre, molhis de susou, ande l' caumas que fasio, caminabon tant que poudion. ande gaita d'arriba à la cabano abans la grellassado. Quand las prumièros goutos cajèguen, la brumo se fec encaro pus epresso, pus la mountanho prenio foc.

Les omes, espaurucadis, se sarrabon de mès en mès. Just à- n-aquelh moument, le prigoul debalhèc tout dreit del cèl e se benguèc plhanta sus l'pigassou de Janou de Finou que l'abio founhat jous la redorto, dins le fèich. On auro dit que tout s'abrandabo. Le foc les emboustissèc à toutis quatre e s'en anèc dins tèrro. Toutis dichèguen caire les fèiches. Toni e Toc qu'èron arrans, cajèguen dins les brasses la un de l'autre e se ganhèguen la sibado; Lèon e Janou s'en fujiguen, camos adujats-me, cap à las Coulhatos. Un chic pus tard, quand feguen desalendadis e que se boulguèguen atura un chic, Lèon se rebirèc cap à Janou e i boulguèc dire qualqueres, mè la siu lhengo boulio pos mès bouluda!

Janou, elh tabes, fasio sinnes, ande las mas, que nou poudio pos parla elh ta pauc. Alabets s'en anèguen à la cabano, ount les autris s'èron ambarradis ande s'arresta.

— Qu'èts achi? se diguèguen toutis. Ount soun Toni e Toc?

Mès elhis fasion coumprene que poudion pos mouta e que les autris èron estendudis pel sol, alha, sus la cri.

— Dèben èstre ataussadis per la prigoulado, i cal puja, se diguèc le Maitinhiè.

— Dèicho ' caba la lhabassado, se respoundèc un autre.

— Que nani, que nous i cal puja sulpic, belhèu alendon encaro!

Alabets els pastous sourtiguen, sus l'pas de la porto e que biguen cap à-n-elhis, les palpèguen e ious demandèguen se chin se troubabon. Mè les dous omes se dichabon palpa e respoundion pos, res à fèt, la lhèngo s'i ous èro arrapado à las maichèlhos.

Nous es qu'uno ourado aprèts, quand les ajèguen escalfuradis and'un bi caut que les quatres pastous pousquèguen tourna parla. La lhabassado s'aturèc, alabets. Le ramat arrivèc à la plheto. Le bruch de las bourroumbos retrouneichio dins la coumo. Las prumièros gouelhos se besion à trabès les fumarèlhs de la brumo basso.

— Qu'a plhaugut aci? Se demandèc le pastou qu'abi seguit le ramat. Al Pas de l'Escaliè, i a gut quatre goutos e res pus.

— Es las bourroumbos que t'ag an birat. N'ag creses jes? se diguèc Lèon.

— Tio bè, se respoundèc Toni, à Lharnoum i plhau toutjoun sus l'estanh, mèmo quand on s'assoulelho en d'autris endreits. Ès le pais que s'ag bol atal!

Anem, le Maitinhiè, nou n'anan. Tu, ag as mal escasut.? Auras la brumo basso.

Urousoment que 'l ramat es plha quelhat: las perdras pos, se i diguèguen toutis.

— O be, fa pos res aco. Es bous autris qu'ag abèts mal escasut. È encaro, bous cal pos plhangi, auro pouscut ana pus mal. Per ieu, se gardi le ramat, las bourroumbos me gardaran, elhos, se dins le cas!

## LA NOCO DEL TOUNI.

En beiren passa, la semmano darrèro, uno noço endimenjado qe s'en anabo cap à la glèiso del petit bilatge, me soun brembat d'aquelho istouèro que m'abio racountat Finou, un joun que m'ag diguèc, à l'oumbro d'un matas de carabenos;

Te partli de tems, se me diguèc Finou, i abio un noummat Touni, tu nou l'as pos counegut, un fort calhastre de binto-cinq ans que benio de se retira del serbici qu'abio fèit dins les dragouns. A so que pareich mèmo, aco l'abio randut un chic berfulho e, quand benio en permiciou, èro fièr de carreja le casco de fèr ande la coueto de chabal que penjourlinabo per darrè. Tout aco, belmal, nou èro que las maichantos lhengos qu'ag dision....

Soun paire, que coumensabo de se fè bièlh, alabets, èro beuse de Janou del Bargaire. Les joubis l'abion batejat Lèon de la Caro. Ero pulhèu busaroc que degourdit. Sus pèich s'aturèc de dalha e de lhaura. Le ritdou, que s'i couneguio dins las malautios, disio qu'abio grabiè dins la boutarigo, so que i fasio beni embijos d'ana suen al petit couènh. Coumo fèt, las gents l'arrapabon tout le tems al cap de la ièro en trèn de se bragueta:

— E que fasèts, Lèon?

— Pichi tè.... pichi tè.... se respoundio le nostre ome en acaban de fè teni un boutou que tremoulabo à forso de i tira dessus.

Lèon e Touni demourabon dins uno petito maisou. La porto dounabo sus uno carrièro que debalho de Pijol cap al riu. La maisou es encaro dreito al joun de bèi, le que la te n'a fèit uno grano e on pod beire, à la finèstro de la crambo, estèlhos de fach que secon al soulelh e que serbeichen de countrobens quand tourbejo.

Dins aquelh tems, le bilatge n'èro pos mort coumo es aro. Las maisous se despallhabon pos e, dins caduno, i abio plha suen sèt ou ouèit efants. Touto aquelho mainado menabo tèrro-trèn pel bilatge. La 'scolo èro plheno de goujats e de filhos e dins les camps le trebalh se fasio aisidoment; Le que n'ag a pos biscut n'ag pos pos creire. La junèssò se besio pertout, al trebalh d'abort, ande lhaura, sega, dalha, battre, tira tèrro, tira lhenho, bira abalh cabirous à la bedo, garda las gouelhos e ne passi. Les camps, b'ag sabes, abastabon à la bedo. Les escabots de Gestès s'en benion quelque cop abarra las seguels que neichion al pèd dels bosques e las gouelhos de Nourjat s'en anabon escatza les semenats de Gestières, darrè Gamèl.

Les dimenjes, sibant las sasous, touto aquelho junèssò la musico ande fè dansa las filhos. A las billhos, les pus adreitiss mandabon pos plha lhèng, à la touca la mès part del tems, e les pus fortis, elhis, gaitabon de ganha en mandan à la tento folho. La brespado èro le ramelhet que se fasio e se desfasio pel besinat e on ausi piula las filhos, dins l'escur, quand se pèd-birabon pe's carières enlha.

Le Touni, que te parli, s'entendio plha and's sibis amics de la calssò que nou s'èron pos encaro maridadis. Auron lhese, se dision toutis, ande nous bouta la canaulo al colh.

Pourtant, Lèon de la Caro entreprenguèc le siu bourdegas, uno brespado qu'esterroussabon un patanhiè debès Pèirogudo.

— Me fau bièlh, aro. Te caldro pensa à mena uno filho à maisou ande nous coussira à toutis dous. As i pensat?

— B'aurè l' tems, me senlho, de me cerca d'autris soucis!

— E tio, d'ount mès demoros, mès t'en beiras ande ne causi uno. Gaito te la que te caldro, tè. Balento, plha coumo cal, fa le trebalh d'un ome à sibo. Es Lèontino del Boulop que tiro tèrro al Coustat.

Alabets, le Touni se rebirèc cap al camp del Coustat, de l'autro part del riu, ount jant i abio uno filho, touto soulo, que tirabo tèrro. Lèontino, al cap de la ribo, se couitabo d'emphena la desco, la pujabo sus las aigors de bouès que l'ase pourtabo, e s'en tournabo, sulpic, emphena uno outro descado. Quand las aigors èron rasos, la filho se boutabo l'ase al debant e le birabo amount, cap à la cabesso del camp, ande l' descarga.

— Ja's balento, se tournèc dire Lèon, gaito se chin n'abanso. A quelho tio, nou la couniejis la filhaunhaquiso!

A parti d'aquelh joun, Lèon tarabustèc le siu goujat cado pic que pousquèc. Le Touni se dechèc fè, à bèlh plphase, e, un joun de brumado, les sibis camarados s'abissèguen qu'abio alhargat las bacos dins la mèmo birado que Lèontino.

— Que se parlon, se diguèc le Rèiche, s'i dèu boule marida!

Le paure Touni n'abio pos acabat de s'en beire. Aro, la junèssò e troubado à redire, se cou se maridabo, se cou boulio pos pus fè la junèssò, qu'auro le tems de s'estaca, e patati, e patata. Le dimenje, à l'aubèrje, les pus acuferadis i dision esperlèiches, so que sabio mal al Touni. Soun paire le tirabo per uno margo, les goujats per uno outro e le nostre calhastre sabio pos mès so que dibio fè.

Uno brespado de la fi de la tardou, le Touni s'en èro anat à la Lhauso cerca naps. La nèit anabo caire e le Touni se couitabo d'emphena le sacou que tenio pel la cordo, tout dubèrt, pel camp enlha. Les naps èron fresquis, poulidis à fèt. Las fêlhos galhardejabon e rescurbeichion le camp fèit de tèrro roujo, tèrro de blhat, sense cap d'èrbo doulento. Quand le Touni ne besio un de plha gros, sulpic, se couitabo de plhanta 'n broc arrans elh, e le dasio puja pus aisidoment sense l'escoueta. N-h-i abio de toutis: les unis blhanquis de pertout, and'uno rasic lhoungo que s'arrasigabo plha en dendens, duris à fè beni; les autris pus redounis, bentrudis, ande l'colh tout bioulet ou que tirabo sus l'negre e que s'arrincabon sense trop fourça;

S'en anabo tourna, cargat de felhum e de frescuro, quand bic passa le Ramoun e Jan del Bosc que benion d'embarra les escabots al Colh de la Fajo.

Demourats-me, se i ous diguèc Touni. Nou n' biren amasso! ÈON  
-Abèn pos lhese, t'anan ambouia Lèontino se respoundèc Ramoun.  
E les dous pastous s'en abèguen sense l'demoura. Touni n'èro malaut. Auro boulgut fè plhase à soun paire, sustout que Lèontino i agradabo aprèts tout!Mè les reprochis dels sibis amics i fasion peno.

Un joun se decidèc. A proumes à soun paire de marida Lèontino, la maridara. Se les amics se fachon, b'ag beira!

Uno brespado de decembre, Touni debalhèc chè l' mèro, Arquisat, ande cerca les papiès de la noço que se dibio fè le dessatde aprèts. S'en tournabo à maisou: la nèit èro escuro coumo uno gorjo de lhoup e le sol tourrat. Touni pujabo, tout'n estrabuncan als rocs del cami, debès le Prat Coumunal, quand, tout d'un pic, ausic camina per darrès elh. Uno grosso esphoupejado, sourtido nou n' sè d'ount, pujabo pel cami amount, se fasio pus forto, pus prochi. Chi dibio èstre aco, à-n -aquesto ouro, se pensabo Touni. A quelques passes darrès elh, le bruch s'aturèc, tout d'un pic. Touni fec repèd, un chic abalh, mè bic pos res à fèt. Alabets bira amount, cap à sibo. Al cap d'un chic, le bruch se tournèc fè amount, encaro pus fort. Touni se couitèc de puja, le bruch le seguio toutjoun; Arribat à la porto del cementèri, so que bic acabèc de i jita l'espant dessus: uno popòu touto blhanco brasses, lhebabo uno camo aprèts l'autro, apèich se demourabo retdo, un boun moument, coumo s'abio besoun d'alenda.

Touni, alabets, demourèc pos res pus e se boutèc à courre, cap à siu maisou, e ta bite que pousquèc. Quand arribèc dins la cousino, soun paire que buffabo el foc s'aturèc, estabousit: le siu gougat, blhanc coumo la lhèit dins la sanche, poudio pos tourna alenda.

- Qua's fèit, b'as plha courrit?
- Me podi pos marida. Las brèichos ag bolen pos!
- Que desaparlos aro? Mè que t'an fèit, pr'achi -n-abalh?
- E bist e ausit las brèichos. M'en bolen parce que me bau marida.
- Anem bè, chapaire. Beu un cop, ja te passara.

Le disatde bengut, Touni, tout embrounzinat s'endimenjèc, prèst per la noço. Toutis's besis èron coubidadis e, encaro que fasson gairebe fachadis, le nobi n'abio pos debrembat les sibis amics. La noço emphlenabo la petito ièro de Lèon e le bi petit de Barilhos coumensabo d'escalfura les omes que bation la semèlo, sus la tourrado. Las fennos arribabon, uno à uno, ande la coffo touto blhanco, e de lhènh on auro dit que i ous abo bebat sus l' cap, pel cami.

La nobio, qu'èro deja prèsto, las fasio entra pel pourtanèlh, las maichèlhos toutos roujos de plhase e las embrassabo. Quand les coubidadis feguen toutis achi, la noço s'aparelhèc e s'en anèc pel la Carrièro abalh, cap Arquisat, darrès la clarineto de Justèn que jougabo uno masurca. Las gents, quand ausion la musico, sourtion sus l' pas de la porto e descambiabion paraulos amistousos and's qu'èron endimenjadis. Le Buraire que s'èro abisat coumo toutis que Toni fasio malo- caro i diguèc en badinan:

- Oòu Touni, n'as jes dinnalhat aqueste maiti? Chi l' t'a panat?

Apèich, le sou de la calrineto se perdèc dins le bruch del riu quand la noço ajèc despassat le rebiret de la Soulilho, dins las brumadèlhos d'aquelh maiti de frescuro. Toutid entrèguen dins la mèrio. Le mèro, que

s'abio boutat la bèsto de belou, s'ajustèc la 'icharpo sus la cinto e le champètro demourèguen dreitis, las camos i ous fasion pos mal, aco rait.

- Touni de la Caro, se diguèc le mèro, bos te marida ande Lèontino del Boulop, aci presento?
- Ebe, bouldro..... belhèu que.....
- Nou, nou, se diguèc le mèro. Cal dire oui ou nani.
- Nani. M'an jitat un sort. L'an que bé,se Dius ag bol, ag tournaren beire.
- E be, se diguèc le mèro, i a pos res de fèit. Boun poudèts tourna' tal.

Las gents de la noço parlabon toutis amasso. Bèon de la Caro courroussabo le nobi, le Boulop l'asounteichio, las fennos sustenion la nobio, les goujats entourabon Touni e dision qu'abio perdit las coulous de la maitinado, se sietèc dins un couènh tout'n s'eichugan les èlhs and'un moucadou

S'en calguèc ana. Les que sustenion la nobio s'en tournèguen and' elho cap al bilatge. Les autris, ande Touni, decidèguen que,pusque la noço èro prèsto, tant balio fè l'repèich, siro tant de pres. Alabets, s'en anèguen cap à l'aubèrje ount les demourabo la carbounado roustido, la galhino farcido e le bi petit. La fèsto durèc jusco l'albo, entr'omes, auro durat encaro tout le joun que seguic se n'abio pos calgut ana apastura l' bestia.

Finou abio acabat siou raconte coumo l'ouro de tourna arrapa les semaliès benio de souna. Le grèc buffabo en escalfuran las soucos e fasio ujlha las telos dels coupaires. Finou s'en anec beure al barral qu'èro amagat dijous uno souco d'aramoun.

Pauro Lèontino! Les sibis malurs me fasion peno. Que dibio èstre, aco, qu'abio espantat Touni, aquelho nèit de la fi de la tardou? Cou les encantaires de l'endreit abion fèit tout so qu'abion pouscut ande fè tort à la filho balento? Mardèt-se l'an d'après ande Touni? Finou m'ag diguèc pos.

## LA TRIPO DE FETJE.

Las ne cal bira, las bacos del prat..... oöu..... Malodegracio que t'estèlhe, al mens! N'as jes bergounho! Es atal que, uno brespado de Noubembre, Janou de la Torto asounteichio Batisto de Toni que gardabo las bacos debès l'Abaichadou e que las dichabo ana. Es bertat que le siu prat èro rasplhat a fèt, s'i besio le sol que terrejabo....

Las fêlhos mèmò que casion dels albas sulpec après la touurado de la nèit èron recatdados per las bèstios que nou sabon out s'arrapa. Tabes, en beiren le prat de Janou que n'èro qu'a maitat pescut, se couitabon de Batisto se cresio, belhèu, que Janou abio acabat de fè pèiche e las dichabo fè. Sulpic après le bram de Janou, Batisto fec passa l'gous e las bacos, anaigados,s'en tournèguen apesca las fêlhos de bèr que demourabon encaro penjados à qualque branquet, dins las marjes.

Fasio uno doussuro qu'èro qualqueres, per la sasou. Las fumatièros dels fougairous que las gents alhucabon ensa enlha, dins les patanhiès que s'anabon semena en blhat ou en sequel, pujabon cap al cèl, toutos dreitos e apèich se mestalhabon ande las ombros que s'abaichabon per las Ribos abalh. Dins bèlh cop de camps, les bouiès butabon las bacos ande fè la junto abant la nèit. Las bèstios, suen, jtabon dejunhit que s'en anabon dins un prat tout prochi, affartasse de bejiure.

Batisto, quand bic que la nèit anabo caire, s'en benguèc tout douçoument, per Bareto'balh, and' ana embarra. Las sibos bacos n'èron pos fartos, s'en mancabo, mè be calio estalbia le bejiure que demourabo à pèiche, als prats d'abalh. Se la nèu tardabo à caire e se la tardou n'èro pos fredo, auron le tems de s'ag acaba. Tant pis, anèit, i ous bailharo un chic de palho de gabatch qu'abio batut de fresc e que s'èro pos engaumido.

Quand fec al riu, Batisto troubèc la fenno de Janou que benio de torse la ruscado. Alabets, ajèguen rasous que se jitàguen à la figuro. La fenno de Janou i diguèc que n'èro qu'un galutre e l'autre i respoundèc après tu, que n'abo jes bergounho de se manja le lhour be, que i bous ag pagaro e que sabi encaro!

Quand fec al riu, Bastisto troubèc la fenno de Janou que benio de torse la ruscado. Alabets, ajèguen rasous que se jitàguen à la figuro. La fenno de Janou i diguèc que n'èro qu'un galutre e l'autre i respoundèc après tu, que n'abio jes bergounho de se manja le lhour be, que i ous ag pagaro e que sabi encaro!

N'as mentit, se respoundèc Batisto e l'autro se couitèc de dire: E tu, nas repoutit!. Apèich, s'en abèguen cadun de soun coustat e, à parti d'aquelh joun, las dos familhos se parlèguen pos pus. Quand las fennos se troubabon à la fount, cad'uno pousabo la dourno sense entourrouga l'autro, sense parla de la baco qu'anabo bedelha, de la crabo qu'abio perduto un crabit, de la lhèit que i elhaumabo le braiè, del pourcèlh qu'abion croumpat ande tua à la fi de l'ibèr e que sel boulio pos acaba l' farnat.

Les omes, èro parèlh. Quand se crousabon, à un cami estreit, fasion coumo se nou se besion pos. A laubèrje, le demenje, prenguèguen le plhec de se bouta cadun à un cap de taulo e, se un dels lhouris amics les cridabo, à toutis un que fasio l'sourd.

Se nou èro pos estat las fennos, aco siro pos estat grand causo: uno brumadèlho sus un rajol de soulelh e res pus.

Mè las fennos s'en boulion desempèich tems. Julie, la fenno de Janou de la torto, s'èro boulgudo marida ande Batisto mè aqueste l'abi dichado ande prene Marie de la Pujado. Tabes, Julie ni boulio à mort à Marie de pic que poudio ja fasio replans sus elho.

Un joun de l'ibèr que seguic, Marie benio de la coupo de las Garrafoulhèros e debalhabo pe's Bousegasses Plhanhièris abalh, ande l'siu ase que tirabo uno carrassado de lhenho.

Talhèu que la crousèc, sus l'plhanhiè, alabets que birabo amount le siu ase, tout bouit, Julie s'i plhantèc debant e i diguèc:

- Qu'as cargat al miu pièlot, ja la counegui la miu lhenho!
- Qu'ès folho, se i respoundèc Marie, toutis les ases se ressenlhon à la fièiro!
- Tio bè, ja la counegui, gaito te la mèrco que i fegui jasiè passat!
- Aqueelho mèrco? N'as mentit. Es ieu que la i e fèito ande l'cunh! Apèich, dèicho me passa, n'è pos lhese de t'escouta!

Mè Julie laretenio pel bras:

— Demoro, demoro, sios pos tant pressado! Be ne bouios pousou del miu ome, t'en a jes boulgut abalh e gaitèc de rescoumpassa Julie. Aquesto, d'un rebèts de ma, l'arrounsèc sus la carrassado de lhenho que la s'en menèc touto espaurucado. Quand l'ase s'aturèc un chic pus abalh, sus l' plhanhiè, Marie èro touto engarramelhado e abio les coutilhous plhenis de fango.

La primo arribèc, pourtado pel bent d'auta que fasio espelhi les gatous dels sauses dins las bernhièros, al bort del riu. Las gents se couitabon de foutja les farratjals talhèu que la farratje èro segado e, un cop plha acalibat, semenabon achi dessus quelques regados migros.

Uno brespado debès las quatre ouros Janou abio semenat le siu ort, al Pradalas. Quand la mainado sourtic de la 'scolo, ausiguen un cop de fusilh. Un moument aprèts, la Marie bic arriba dins la siu ièro, touts espalbatjados, la plhoco e las galhinos que benio à peno d'alharga e que s'en èron anados beure al rèc e gaita de se trouba qualque babot ou qualque lhimauc.

Per darrès, la topo enfounzado sus las aurelhos, le cap acachat, Janou s'en benio, le fusilh sus la 'spallho.

— Que benes de la casso, deja, se i diguèc Tanguet que s'en anabo fema à Peirofesso, n'es pos dubèrto encaro....

— Beni de bera las galhinos de l'ort. M'an desterrat tout le migros. Se nou las bolen pos teni, las tuarè touts, se cal.

— E tio, bè, be siran magros ande las se chapa, al joun de bèi!

Marie, quand ajèc coussirat las sibos bic que nou ni mancabo pos cap. Mè ajèc plha pöu e las embarrèc sulpic dins la galhinhièro.

— Qu'es le diablhe, aquelh ome! Se i ag fasion à- n-elh, que diro? se disio la fenno de Batisto à la fount. Julie, elho, de al siu part, disio à las pousairos que Janou abio plha rasou:

— N'an qu'a i ous bailha gra, s'en biran pos grelha pils orts enlha ande s'affarta chè's besis. B'ag sabèts, le bestia crèbo de fam à-n-aqueelho maisou. Mèmo als opes i ous fa passa talent, le boubou le cal cerca uno mièjourado, dins l'oulo, taloment es petit. Naps, que i ous fa manja, chin boulèts que nou passen talent. Aro, se i ous tuon las galhinos, e be, las se pouran fè coire!

E l'estiu arribèc, ande las calous, l'èrbo que calio fè seca les prats à toca la bedo, las recoltos que coumensabon à baira sus las dressièros de Sousquiès ou de Pourquinasso. Toutis aquelhis trebalhs fasion debremba à las fennos las colèros qu'abion pasat dins l'ibèr e la primo.

Pourtant, cad'uno se mesfisabo de l'autro e quand le joun d'ana garda arribèc disio la sibò al siu ome. Deja, quand las gouelhos èron pujados, les dous omes s'èron arrengradis ande que les lhouris escabots sion pos dins le mèmo ramat. Janou s'èro demourat à fè partido del ramat de las Coulhatos. Mè aco n'èro pos prou als èlhs de Julie, qu'entreprenguèc Janou un joun que segabon la seguel al Roc- Coubertoula:

— Batisto de la Pujado s'en ba garda dilhus que be, à las Coulhatos. Te caldro jè douna l'tour pel Moulinhiè e ana t'en à Courtal- Marti. Pouiro arriba que te fasso despièits al tiu bestia, se s'en debe. Se i èros, t'i apararos. Cal pos demoura que l'mal sio fèit ande l' gari. Be faren, aci, and'embarra l'èrbo qu'es coupado e ande lia la seguel.

Coumo de fèt, Janou n'èro pos tranquille. Se fec cambia l' tour e s'en anèc, elh tabes, relheba le mèmo joun que Batisto. Toutos aquelhos istouèros i agradabon pos. Chi sap, aqueste Jan-Broc de Batisto, mal counselhat per la siu fenno, i poudio cartrinca qualque bèstio que se siro barrejado ande las sibos, ou ne poudio fè asourta uno. Julie a rasou, se pensabo elh en passan la Sèro del Roc, bal mès que m'i bango aparà. Se m'i sap, las gausara pos touca, aura trop de pöu, be l'counegui à Batisto.

Qualques tems aprèts, dibion èstre à la maitat del tour, Janou abio berat debès la Ribo de la Calbo, un joun de caumas. Le siu ramat s'asoumbrabo dins le riu que debalho de la Ribo. Elh s'en èro anat beure a la fount e demoura l'ouro de brespalha, quand ausic las espuelhos del ramat delas Coulhatos que benio cap al siu. Janou i teni l'élh, prèst à fè passa l' Picart se qualque gouelho de las sibos s'aprouchabo trop de la birado de l'autre ramat.

A l'ento de brespalha, Janou se sourtic un croustet de la museto e le se rosegabo en ne bailhan les trosses les pus granhalentis a siu gous, quand bic arriba, de l'autro part del riu, Batisto que se dibio beni refresca à la fount.

Aqueste qjèc uno retioulado quand le bic. Mè, sulpic, se tournèc abansa e diguèc à Janou:

— Fa caumas. Abio set, beni fè coumo tu. Que brespalhos?

— Me manji un croustet. Urousoment que m'è fèit siègue la bouto. Bos-ne?

— Disi pos nou. N'as jes boubou? Bos salsisot.

— Bailho ne. Ieu, nou m'en è pos pres. Le nous abèn deja acabat. Be sabes qu'èn forso ande l'nous manja.

Alabets, Batisto se sourtic un tarnas de tripo de fetje de la museto, poulit coumo tout, quefasio embejo. Toutis dos s'en coupèguen de grossis retalhs e se boutèguen à rousega pa de carrou.

De tems en tems, Janou fasio passa la bouto que se refrescabo dins la fount e cadun soun tour bebion à la regalado d'aquelh bi petit de Barilhos.

Degus nou parlabo. Toutis dous mastegabon sense bruch. A-n-a que pensabon? Al prat que Batisto abo abarrat la tardou passado, à las galhinos qu'escarrassabon le migros del'ort, à la jelousio de las fennos? Nani, nani, toutis dous pensabon pos à res, abion le cap lhaugè, lhaugè, e s'escoutabon le bataclan de las bourroumbos, de las esquelhos e dels esquelhos que pujabo pels timbals amount. Se gaitabon les dous ramats, tacos blhancos sus la berdou del giset que s'èron barrejadis sus las aurièros de la birado e que se tournabon triga, aro que l' soulelh sèro acachat, ande se desplhega cap à la jasso ount s'en biron durmi.

Las bèstios èron sadoulhos. Ero un plhase de i ous beire la panso plha repoutido, de las gaita escatza, ensa enha, pus poulidos flous de la regalècio.

— S'en cal ana, se diguèc Batisto, se fa brespado. Tournaras douma d'aquesto part? Nous acabaren la tripo.

— Ja tournarè. Pourtarè so que me demoro de cambajou. Faren un boun brespalh.

A la fi de la semmano, les dous pastous feguen relhebadis, mè nou se demourèguen pos ande debalha. Le prumiè cop que se tournèguen crousa, al bilatge, ni la un ni l'autre nou feguen un pas ande se parla. Tout èro coumo abant. Las fennos se repassabon tout pic qu'ag poudion fè, quand troubadon uno aurelho qu'abi lhasé de las escouta.

Mè nou bous i troumpets pos: l'ibèr bengut, al moument de tua l' porc, Janou e Batisto faron redoumandacious à las fennos de fè poulidos tripes de fetje, de las bouta à sala dins le nauc, de las penja al milhou-n-endreit.

Toutis dous pensaron al tems ount caldro que tournèsson ana relheba les pastous de Courtal-Marti e de las Coulhatos.

Debant les lhouris èlhs passaro la bisto de la founteto, des aberdalhs à la flhaino forto, de las gouelhos qu'abrigaron touto la Sèrro flhourido de regalècio e de la tripo de fetje tant goustouso que se manjaron, toutis dous, dins la pats, and'un bouci de pa arrousat de bi petit.

## SENT JAN.

Cresi tourna beire toujoun  
Rius de calius caire en cascados  
E belhuscos en lhabassados.

Per fè lhum à las mius pensados,  
Aquelhos nèits ount fasio joun  
Se soun pos jamès amourtados!

JULES PONSOLLE (FOCS DE SENT JAN).

— Que fas?

- Nou res.....

La tunè, en s'en anan cerca un brassat de farratje al farratjal, passèc debant le pourtal e entourrouguèc Janou, acuferat à usplha uno cimo d'abet que s'en abio tirgoussat de la bedo, la brèspo.

— I è diantre, que bos fè farinos, se tournèc dire la Tumè, que paichelhabo, debant le pourtal.

— Nani, nani, es pos ande barreja, aqueste. Es ande qualqueres de pus poulit.

— Nou m'ag bos jes dire?

— Cal pos qu's ausèlhs ag sapion!

Janou se couitèc, alabets, d'acaba de coupa les nouses del furgou d'abet, del pela coumo cal ande l'cotèlh, en fèn plha attentiou de decha gairebé la lhoungou d'un digt à las blancs de la part del cap gros.

A pèich, Janou l'abc desa sus la pèço del porje.

— Achi se secara, se pensèc elh, fara un poulit margue de falhè! Aro, nou me manco pos pus que las falhos.

Las falhos! Aco èro pus malaisit! Chi nou se bembo encaro d'auquelhis ciriès ou bèsses peladis dins les bousigasses jusco las purmièros broustos. Urousoment que les pastous nou pelabon que la pèlh de dessus, la pus fino, autroment l'aibre auro crebat. La pèlh se tournabo fè, touto bourrugado, mè n'èro pos jamès poulido coumo la qu'abio sapat e, dins tout le cas, se poudio pos mès pela. Tabes toutis aibres èron seguidis dins las birados. Cad'an calio ana pus lhènh ande ne trouba de noubèlhis, ou calio demoura que les petitis se fesson grandis ande que se pousquèsson pela.

Talhèu qu'èron al mes de Julh, les bourdegasses fourrugabon dins las bernhièros: cercabon aibres que coumbenguèsson D'autris pujabon jusco l' Tremoulet ount creichen les pus poulidis bèsses lharjos e blancos que fasion anaiga les baquièrots.

— Fè me sus-colho, se disio Janou à Tonèn, bau puja jusco la branco e farè uno falho al dessus.

La brespado, las falhos i fasion uno bossò dins le cap de la capeto e, talhèu qu'abio estacat, las sourtio uno à uno, las alhisabo, las traucabo al mièi e las enfurgounabo sus l' furgou, en crouts. Le falhè se fasio gros, chic à chic, lhèu siro pru pesant e alabets i mancaro pos aue dos tachos, uno de cado part, ande que las falhos se tengùsson sarrasos e nou s'escapèsson pos; Mèn ande que s'en anèsson pos, quand siron abrandados, ou boutabo toutjoun, per dijous las dos tachos, sio uno bièlho ansolo d'esplhop, sio uno roudèlho de fèr blanc aproufitado d'uno bouèto de counsèrbos.



Sent Jan s'escats fi de Julh; les ramats èron pujadis mè les grossis trebalhs de l'estiu n'abion pos coumensat. On poudio dire qu'èro la darrèro e sustout la pus poulido fèsto de la primo.

De boun maiti, aquelh joun, Gabarrou que se picabo l' dalh, arrans le bassi, ande s'en ana dalha l'auserda de Ribo-Lhoung, s'ausic dire pèr Lhèrnho, que se pousabo la dourno:

— Que t'en bas fè Sent Jan?

— I e garo, m'èro passat d'idègo. Qu'es pr'aco qu'è ausit passa la canhièro à punto de joun? Me cal bouta un fagot sus la plhaço!

E alabets s'en anèc quèrre un fagot d'abelhanhiès que secabo sus la pared de la ièro e l'entrabessèc al mièi del cami.

Als joubis, grandis ou petits, n'ag abion pos dit dous cops. Abant le joun, les pus aberidis s'en èron anadis les unis cap à la bedo quèrre un abet, les autris debès la Bouicho ou la Tèrro- Nègro cerca fèiches de bouiches ande fè las garlandos. Las filhos,, de tems en tems, benion pousa la dourno à la fount e gaitabon se s'èron randudis. Les pus acuferadis, èro al cahière. I ous abio pos calgut dire de se lheba, aquelh maiti.

A punto de joun, ja se cridabon, d'un piulet, à trabès les courredous e on les abio bisti parti, demèsts la rousalado, cap als prats de Bernelhoung ou al founze de la Bago, Goujats e filhos, tout barrejat, courrion per las ribos enlha, dins les roumendièralhs, les ginestas, las barèitos, quèrre brassats de flhous plhenos de flhainos, de coulous e de frescou. La mès part, que n'èron pos jamès anadis pus lhènh que la crouts de Bareto, se fasion, aquelh maiti a chi passaro debant l'autre, a chi biro le pus amount, le pus lhènh, dins las ombros e le rousal d'aquelh joun de Julh.

Sougantis de routa le rousalut, cargadis de flhous dels prats e dels bousigasses, i ous calio encaro puja à-n aquelh pais que les pus grnadis i ious abion ensenhat:

les bousigasses plhenis de dansairetos que dansabon toutjoun mèmo quand i abio pos cap de bent.

On les abio bisti tourna, abant que 'l soulelh ajès toucat la cimo del Bosc Redoun. Talhèu al bilatge, s'èron boutadis à fè bouquets, de toutos las coulous, estacadis ande juns, ande courrejolos, and'èrbos las pus lhisos e les abion penjadis à toutis 's pourtanèlhs. Calio que, talhèu que de trouba tant de flous, tant de bouquets, arremassadis en soun aunou e en l'auno de Sent Jan. Quand le bilatge èro tout flhourit del coumensoment à la fi, la canhièro s'en anabo dinnalha.

Alabets la junèssou arribado. L'abet, pourtat per quatre calhastres, èro quilhat al mièi de la plhaço. Al debant, uno filho abio estecat à la bèlho cimo un bouquet de las pus poulidos rosos que la Clico abio coupat dins le siu ort, frescos, dubèrtos coumo cal, encaro plhenos de goutos de rousal.

Embaumabon e lhouro flhaino se mestalhabo à l'audou de l'ampoulho e dels bouiches.

L'abet dressat, las filhos se couitabon de fè garlandos de bouiches que les goujats anabon engarlanda de l'abet à las portos de las maisous besinos. Chic à chic, la plhaço prenio un aire de fèsto. Las gents que passabon s'aturabon un moument, s'ag gaitabon e on besio lhuse dins les lhours èlhs le soubenis dels focs de Sent Jan de d'autris cops.

Aro, le soulelh qu'arribabo, se mirahhalhabo dins la fount; les sibis rajols jougabon dins las brancos de l'abet, dins las garlandos e benion qu'acababon d'entourtilha les darrèris bouiches.

Anem, la mainado, bous cal ana quèrre lhenho, se diguèc Lèon à touto la canhièro qu'abio deja dinnalhat e que badabo, contento de beire que les pus grandis abion fèit de la plhaço un endreit dels pus agrandentis.

E les mainatges s'en fujion, d'uno part, de l'autro. On les besio tourna, un chic pus tart, coumo s'abion le foc al darrè. Ne benio de pertout, de Pijol que tirkoussejabon brancos de fach, abelhanhiès sougantis, brocs de barralhos; d'Engabarro enlha and' destèlhos que las gents i ous abion bailhat; de Prat ande bièlhis genibres dels ort; de la Carrièro ande fagots del biatge qu'abion panat dins un courredou.

La mainado courrio pels carriès, coumo fan las fourmigós quand on a tisounat la fourmigièro ande l' cap del bastou. Al coumensoment, j'anabo plha, las gents bailhabon de boun grat, mè, debès mièit -joun, n'èron fartis e fasion beire l'escoubas:

Dèicho'co, malodegracio que t'estèlhe, se dision à la calhièro que la lhenhièro ande gaita de fè beni uno branco de fach ou de bèr.

Alabets, les goujats s'en anabon pels camis e carrejabon les fagots d'espinnasses que barrabon les passes ou las barralhos que se desfasion ou qu'èron arrouinados.

Las gents, quand benion poussa à la fount, se gaitabon le pièlot que pujabo al pèd de l'abet. Les mesfisentis, qualque cop, fourrugabon ande beire se i abio, amagat dijous un bouich ou uno ginèsto, un bièlh arpec ou un pourtanèlh à maitat pouirit.

La brespado, la mainado troubado que le lhenhiè èro prou gros. Mè les bourdegasses, elhis, èro pos encaro sadoulhis de carreja. En colho, s'en anabon, un pigassou e uno tralho als digts, per La Roco amount cap à la Tèro-Nègro and'ana quèrre uno carrassado de genibres. A la fi de la brespado arribabon sus la plhaço e boutabon les genibres sus l' pièlot, à touca le bouquet de rosos.

Tout n'èros pos encaro acabat: les baquiès e las baquièros n'abion pos dit la lhouro. On les besio beni,-e las bacos s'en anabon cap als porjes toutos soulous and'ana amaira ou and'èstre mousidos-, que pourtabon las fhous las pus poulidos qu'abion troubat dins les bosques ou al garlando ou l'estacabo sus la crouts de Castirou.

La nèit abio emboustissat d'oumbros les aibres del bort del riu quand las gents s'en benguèguen cap à la plhaço, un à un. Deja à l'entour del pièlot de lhenho la canhièro randoulejabo ou se gaitabo les falhès que les joubis fasion trempa dins l'aigo del bassi ande que se cremèsson pos trop bite.

Gabarrou, quand arribèc un lhum à la ma dreito e un arpat de palho à la 'squèrro, fec retrouni le besinat de crits de la mainado que las maires nou poudion pos mès gouberna.

Achi qu'ag abèts, se diguèc als counscrits, boutats i l' foc!

Aro la palho brandejabo, uno jumatièro negro pujabo dreit al cèl e les genibres que coumensabon à se ruma esclampetabon e fasion uno fhaino fèito de soulelh e d'èrbos salbatjos. Aprèts le fum, la flhambo jisquèc, tout d'un pic e la plhaço benguèc plharo coumo en plhen joun mè touto emboustissado de recouènhs ouint l'escur tresio mal à s'en ana.

Pertout, lhènh del foc e de la camhièro que roudabo als entours, la junèso, les omes e las fannos èron arremassadis, sibant que benion d'uno part ou d'uno autro; Quand le foc brandejabo plha, on besio les èlhs de cadun que lhusion e toutis rision, coutentis de se trouba un cop de mès debant le foc de Sent Jan que i ous pourtaro bounur per tout l'an e i ous biraro, bessè, le mal parat.

— Biro del prat! se diguèc Lampè, que benio d'arriba, à la siu filho deja grando que s'en anabo ande las outros, arremassados al pèd d'uno cantounado.

E Lampè s'en abèc arrans Pistou que badabo, apuat sus la cano, arrans le bassi: Beses, se i giguèc tout siau, coumo s'abio pöu que l'ausisson, beses i manco qualqueres, las campanos! Las auron birados, auron arremountat aquesto fèsto! Mè, se pod mès fè, Jan del Rèu las a bendudos al Baichelhaire aqueste maiti mèmo....

O ba! s'estounèc Pistoul. Chin ba aco?

— E tio, se diguèc Lampè, encaro pus siau, b'ag sabes, s'es arrouinat. S'a chapat le siu be auqeste ibèr à las cartos. Es tanguet que l'a despulhat. Aro, cèrco à s'arremounta. Se l' dèichon fè, ja sira lhèu salbat!

— Es un galutre. M'ag cal dire à l'adjouènt.

— Diu t'en garde! Degus n'ag sap pos passa!

Deja les joubis alhucabon les falhès e s'en anabon per Campanho abalh en les fèn rouda al tour del cap quand la brando abio pres. On auro dit lhunos que s'esparricabon dins l'escur, que roudabon, que sautabon. Qualque casio dins las autrigos del bort del cami en se retourtilhan e en dichan uno fhaino de roussit, de coucut de ciriè ou de sèbo de bès. Toutis aquelhis lhums que senlhabon dansairetos per la Soulelho abalh fasion calha las tabècos de Nalham e s'en anabon cap al bilatge besi pourta l' foc e l'amistat de Nourjat.

Al tour del foc que brandejabo, aro, à bos-ne mès, las belhugos pujabon dreit, pourtados per la fumiatèro, toutos roujos toutos boullentos, e tournabon caire un chic pus tart, quand s'èron amourtados e afredados e

qu'abion blhaquit. On las besio caire, tout siautadoment, al dessus dels tets e apèich ransouleja sus las gents, sus las coffos de las fennos ou las topos dels omes coumo fan las berfulhos un joun d'ibèr.

Le foc se rousegabo la lhenho. Le pièlot s'acachabo de mès en mès. La braso touto roujo, touto plhenno de calou que rajabo, fasio beni las coulous à las maichèlhos de la junèssou. Aro, les goujats courrion cap à las cantounados ount las filhos fasion lenlham de s'amaga e tournabon cop de dous, en tenin uno filho cadun per uno ma. Al pèd del foc, la un l'arrapado pe's pe's pèds, l'autre per las eichèlhos e la balancejabon per dessus la brando.

Anem, la cal calfa de las dos parts, se disio en e les dous gougats, alabets, se birabon e la tournabon bressa al dessus del foc. Qualque cop, la brando jiscabo d'un tistou, la filho piulabo, s'arrapabo les coutilhou ande las dos mas ande que prneguèsson pos foc e toutis dous s'en rision. Deja les goujats la boutabon sus pèds, ande n'attrapa uno autre e la filho s'en anabo à l'escur, touto crenouso, mè countento d'abe sentit le foc que i pourtaro bounur per tout l'an! Les bièlhis be dision qu'uno filho qu'èro dins l'anado, alabets....

Anem, Pistoul, es à tu, se diguèc Miquèl. E dous goujats attrapèguen Pistoul que repoutegabo mè que nou demandabo pos qu'aco e le feguen rousti, al dessus de la brando. Quand sentiguen qu'èro prou escalfurat, le que l' tenio p's pèds le dichèc caire dins le foc e l'autre l'arrousseguèc abant qu's guetous nou se rumen.

Les joubis, aro, rescoumpassabon per dessus l' brasiè. Le que sautabo sense se ruma 's pèds e que se tenio dreit quand abio rescoumpassat, èro, de lhènh, le pus degourdit.

Le Sarralhè, toujoun fanfarou, sautèc elh tabes, mè, espaurc dessus la flhambo, s'anèc espatarna le nas le prumiè, al pèd del bassi. La sanc i casio per la barbo abalh; Quand se fec lhebat diguèc:

— Urousoment que soun sus l'nas qu'aqueste m'ag a birat. Autroment m'auro escrasat la figuro!

— Musico, musico! se diguèc Lèon.

Aro, fairebe toutis èron passadis sus l'foc. Poulou, la clarineto à la ma, s'èro que n'abion sus uno cadiero arrans le bassi e, de mermorio, jouguèc uno polca que toutis danssanbon, al tour del foc.

Les dansaires, caussadis d'esperdenhos, randoulejabon, lhaugèris sus rocs que n'abion pos agut le tems d'aplhahours ombros se fasion lhènh de la plharou del foc, las lhours ombros se fasion nautos sus las pareds e pèich se perdion dins l'escur.

Aprèts, èro uno masurca, uno scoticho ou un quadrilh que Poulou jougabo, sense gaire s'atura. Mè so que fec le countentoment de toutis, grandis ou petitis, joubis ou nou, fec le ramelhet de gents que s'entourtilhabo e se desentourtilhabo al e se desentourtilhabo al sou de la clarineto.

Coumo Poulou s'aturabo, desalendat, qualcus diguèc:

— Soun achi... soun achi....

Coumo de fèt, debès la Soulelho, les roundèlhs dels falhès tournabon fè soulelhs à trabès las brancos dels sauses.

Un moument aprèts, les falhès que tenion encaro le foc feguen al pèd de la fount. And'elhis, i abio falhès del bilatge besi que les abion acoumpanhadis.

Les que demourabon èron fièris de poude fè rouda encaro la brando al dessus de lhour cap e les que s'en tournabon ande l'barrejou cremat e sense pus de falhos s'anaigabon e embejabon les autris.

— Pagos uno mièjo, se diguèc Jan del Rèu à Pistoul que fasio senlham de nou l' recounegue.

— Trinqui pos and'un bouleur, se respoundèc Pistoul en lheban la siu cano, nou n' sè se cou;

Tout a uno fi. Deja las ombros se tournabon fè espessos entours de la plhaço. Las gents s'en anabon durmi, un pr 'achi, un pr'alha. On les ausio qu'estrabuncabon dins le besinat ou que tampabon les pourtanèlhs. Pourtant, abant de s'en ana, cadun, s'abio causit un tistou dins le foc e le s'en pourtabo tout dreit. La braso que roujebabo encaro lhusio dins le carriè tant que n'abion pos rebirat cap al riu. Que de bacos nou s'ufllaron pos s'anabon pèiche dins l'auderda, que de gouelhos nou gairiron de la ranquièro!

Le m'en pourtarè à l'Adrapo abant la tardou se diguèc Touni. L'an passa n'ajègui pos uno soulo malauto del mal del sol!

La lhuno benio de se lheba e le foc s'amourtabo. La canhièro, plheno de son mè contento d'abe plha guimbat, seguio las mamas que's s'en menabon durmi. Le bruch s'aturabo chic à chic e les gousses, estounadis d'aquelh rambal que nou s'ausio pos cado nèit, tournabon rouda e benion flhaina las cendres.

Per Campanho abalh, les darrèris lhuquets dels falhès s'amourtabon, elhis tabes. La pats tournabo beni sus l' bilatge que s'adurmio à l'oumbro de la pico de Mountagut. La darrèro berfulho s'apausabo tout siau, sus la fêlho d'un poumiè; A palpos, Janou dentrèc dins la ièro, le margue del falhè tout rousegat pel foc. Le se gaitèc, un darrè cop, le desèc jous l'engart e diguèc:

— A l'an que be; se Diu-s ag bol!

## LE PRAT ABARRAT

Le pus fi, elh tabes, sus la fi de brespado,  
— Ou l' joun que sescasio uno grosso brumado-  
Dichabo l'escabot abarra le restoulh  
D'ount ne fasio bira uno crouts de fenoulh.

(LAS BORDOS DE SOUSTAL).

Se's bièlhis pastous tournabon, ni rebendron pos. Elhis qu'abionn tant de mal ande garda l'escabot, bèi ja se beiron boun tems.

D'autris cops, les camps arribabon gairebe a la cri e calio bira de pertout. Apèich, toutos las maisous tenion gouelhos e casun fasio bira del siu be ande poude mena pèiche las sibos. Nou demourabo pos gaire que les coumunals, les bosques e b'ag cal dire, ja qu'es bertat, les restoulhs e's prats ount jant i abio crouts qu'èro abarradis un joun ou à l'ento d'embarra.

Calio bira de pertout e èro mal aisit. A cado pas on troubaso uno seguel que benio de nèiche, un treflha qu'èro flhourit, un prat que nèro pos encaro pescut. Quand un camp èro en barèt e qu'on l'auro pouscut trabessa, i abio uno crouts fèito d'uno ginèsto ou d'un arpat de falga e ne calio bira.

Le gous abio trebalh, le pastou s'en besio e las bèstios s'anaigabon. Als coumunals, les escabots èron la un darriè l'autre e le sol èro rasplhat. Calio bira de las coupous ount les rejetous del fach espelheichion, autroment le Fourestiè bous benio parla d' un berbal.

Al joun de bèin pus de camps sus las dreissièro, les prats se dalhon pos mès, les ginestas floureichen pertout e l'èrbo creich à boulatat. Causo curiouso, à bèlh plhase que les bousigasses se fan pus grandis, les escabots s'esplhareichen; Lhèu, n-h-i aura pos gaire pus e lesvsoulis que demouraran siran embahidis ande causi la birado: tout sira à-n-elhis!

Brabis gousses de d'autris cops, se tournabots bous anujarots! Pus de seguel à bous apara, pus de gouelhos gourmandos à bira de l'auserda, pus de bourrècs embèfies à siègue dins le bejiure. L'èrbo creich, se fa lhongo sense èstre escatzado dins les bosques, be duro, s'atioulo e poureich sense que cap d'anhèlh l'ajo bengudo espeltira.

Cal pos trouba estranje se, d'autris cops, las gents èron jelousis de las peichendos qu'abion. Quant de cops, talhèu qu'uno baco ou uno gouelho dentrabo dins un bousigas, on ausio crida: Bos me bira las bacos del bousigas, oöu?...

Bidalbo, qu'abio le siu bel de la part de l'Espourganhou, b'ag sabèts, aquelh endroit ta plha sietat, jous las picos de Mountagut, ount jant le bourdassié de l'espourganhou s'èro boutat al darrè del coucut and'uno faus, Bidalbo, douncos, èro jelous del siu prat de Nauseno, al founze del bosc de las Barthos. De l'Espourganhou,

abinhabo tout. A ma dreito, on a uno bisto carano su's camps de Soustal, les prats e las agals de Nauseno, la beso de Bidaloun. A ma esquèrro, on se gaito Nourjat e's sibis camps.

Les pastous de Soustal l'abion pos bèlho and' elh. Talhèu que les escabots s'enguindabon pel bosc de las Barthos enlha, calio que s'anèsson apra al prat de Bedalbo, autroment n'abion pos acabat de l'ausi crida.

Un joun de la primo que fasio plha bou, Janou e Pièrrou abion barrejat. Las gouelhos s'amusabon à escatza las abajounhièros que coumensabon à punteja demèst l'embrum de l'an passat e s'en anabon à bèlh plphase, cap à Nauseno ount l'èrbo, sense èstres lhoungo, berdejabo e amagabo deja las tampinhièros. Les dous pastous abion pres le debant, les gousses sus talous e s' èron anadis sieta al bort del prat de Bidalbo ande s'i apra quand le ramat puntejaro, al bort del bosc. `

Bos que rigan un chic, se diguèc Pièrrou; Dèicho me fè!

Alabets se sourtic un journal qu'abio dins la saqueto ande s'i emboustissa l' brespalh, ne fec uno mièjo doutzeno de trosses, les adoubèc and'uno ginèsto e les anèc plhanta a mièi delprat de Bedalbo, esparricadis ensa enlha. De l'Espourganhou, nostre ome se crejèc que las gouelhos de Soustal i abarrabon le prat. E de crida!

— Las ne cal bira las gouelhos del prat, oöu! N'abèts jes bergounho?

Aco durèc uno bouno estouno. Pièrrou se toursio de rire. Mè Janou, à la fi, i diguèc:

— Be sabes que fara trèn, aquesto brespado, à maisou. Bal mès ne bira, bè. Bè cerca les papiès!

Qualques jouns aprèts, Janou e Pièrrou abion tournat barreja, mè le tems èro doulent. Desempèich le maite, la plhèjo casio coumo chi l'abètzo e la brumo se barrabo per mouments. Le ramat se boulio pos atura en lhoc, las gouelhos se soucadission suen, l'aigo s' i ous arrapabo de la lhano e i ous rousegabo la 'squeno. Les pastous, elhis, n'abion un sadoulh d'aquelho plhèjo que trabessabo la capeto e i ous casio pel cap abalh. Les pantalouns s'i ous arrapabon de las camos, les pèds lhabarquejabon dins les esplhops.

Sus l' tart, le ramat se troubabo pel bosc de las Barthos abalh. Janou e Pièrrou gaitèguen de s'arresta jous un fros matas de bouiches, mè bè tè fè foutre, i plhabio encaro pus fort que deforo. Alabets, Pièrrou se sourtic la capeto, attrapèc le siu bastou e se boutèc à soucadi l' felhum, al dessus del siu cap. L'aigo i casio pel cap abalh tout'n i fèn rècs per las maichèlhos. Elh risio, countent, e soucadissio les bouiches:

— S'en cal pos fè, ensajo got, beiras.

— Se nou n'anabon à la bordo de Bidalho, se diguèc Janou; Belhèu i troubaron un arpat d'èrbo seco de l'an passat e la nos boutaron dins las camos dels pantalouns. Sentiron postant la moulhuro.

— As rasou, se respoundèc Pièrrou. Anen i.

Quand les dous feguen debant la bordo, la brumo se barrèc e on on besio pos pus lhènh que la marje del founze del prat.

Coumo de fèt, Bidalbo cridabo, desempèic l'Espouganhou. Pourtant, dibio pos beire le siu prat and'aquelho brumo que s'atterabo.

— Dèu crida ande nous fè pöu, se diguèc Janou. Coumo'co, nous i apararen.

Cado'stouno, Bidalbo fasio un bram. Ne dibio passa, èrnho, que nus i chapèsson le prat, darrè la brumo!

Le gajal dubèrt, Janou e Pièrrou troubèguen un brassat d'èrbo seco, al couènh del porje. Alabets, s'estaquèguen le founze del pantaloun and'uno redorto de sause e se founhèguen èrbo eichuto dins las camos, jous la camiso, pertout. Apèich, countentis de nou senti pos pus aquelho moulhuro qu's trabessabo, s'arrestèbuen, jous ' tet, en escoutan se l' ramat debalhabo, pel bosc abalh e se Bidalbo cridado toutjoun.

Les gousses s'èron arremicouladis sus un cabirou, à l'eichut. La prumièro gouelho que sourtic le nas al pèd d'un matas de fach, fec la Pigo. Tout'n se gaitan se besio beni l' gous, aquesto ni proufitabo and'abarra un tros de prat, à l'aurièro, prochi del bosc. Mè la siu esquelho abio dins le prat, elhos tabes, e, coumo n'ausion pos la couscourro, s'esplhandiguen juscos l' riu.

— Pus que crido tant, le i abarran, le prat? se diguèc Pièrrou. Ja s'ag meritaro!

— Dichen los fè, se respoundèc Janou. Las ne biraren, al cap d'un chic....

Ponpon durbio's èlhs, quelque cop e s'escoutabo las esquelho de tout le ramat que batanabon, aro, à descubèrt. Chin ba que las calio dicha fè, bèi? se pensabo elh. Fa trop maichant tems and'ag ana beire.

Aro, le ramat s'èro apausat. Las bèstios troubabon èrbo que tendrejabo, se couitabon de pèiche e ne debrembabon de se soucadi ande fê caire l'aigo que i ous pesabo dins la lhano e que i ous afredabo la 'squo.

Quand feguen sadoulhos, que la brespado benguèc escuresi un chic mès les penjourlins de brumo que passabon pels caps des frèiches, les dous pastous sourtiguèn de la bordo, nou n' pas eichutis mè escalfuradis pr' aquelh brassat d'èrbo que i ous gratabo la pèlh.

— Anem, se diguèc Pièrrou, Bidalbo nous crido. Aro, las i anan bira, las gouelhos!

## FOUNTANABIBO.

Dins La Fount de L'Abaichadou bous e parlat de toutos las founts ou fountetos qu'on pou dio trouba de Cramilhos al amount e de la part de Soustal, fountetos bèi tampados per la mès part e que las gents debrembaran, n'è plha pòu. Mè, quelques unis de bous autris me direts, ne soun segur: E de Foutanabibo, n'as pos parlat? Que la t'as debrembado? Nani, la m'è pos parlat? Que la t'as debrembado, mè bou'n boulio parla un autre cop, e be, sira bèi; Foutanabibo, b'ag sabèts, es uno fount ount l'aigo rajo à boulentat, sort à quelques passes del riu, à ma 's quèrro, à la nautou del prat del Falet. Quand se jita dins le riu, bous parli de tems, abant que nou fesso apescado, le riu èro doublhat. Aco bous bailho uno idègo de la siu forso, qu'èro grando.

Aquelh'aigo se perdio e toutis l'embejabon. Chi ne proufitabo?

Les dalhaires que fasion l'èrbo à la Prado, mancabon pos de s'i ana amourra quand abin set e las gents de la bilo se benion refresca su's sibis bords. Les proumenaires pujabon al plhanhiè, per la Prado' mount, en s'asoumbran dijous 's frèiches e, arribadis al prat del Falet, passabon le riu en sautan sus quelques rocs entrabessadis dins l'aigo. Apèich seguion le riu à ma 'squèrro ande l' tourna recoumpassa un chic pus tard, al dreit de la fount.

Achi, les estibants se sietabon sus l'èrbo, se l' prat n'èro pos encaro dalhat, ou sus l'bejiure e brespalhabon. L'aigo rajabo à boulentat, bous aguè dit, uno aigo fresco, lhaugèro e sense cap de lhourdum dedens. Chi ba que le bilatge no l'ajèssò pos apescado, se dision toutis.

Chin ba? La fount èro lhènh e le bilatge n'èro pos riche. D'autris cops las gents s'en anabon pousa l'aigo al riu, à Pijol. Mè, quand troubèguèn que fasio lhènh aco, per las gents que demourabon à la plhaço, decidèguèn de fè beni l'aigo dins le bilatge. Alabets, se causiguèn la fount de Predet, que n'èro pos ta lhènh que la de Foutanabibo; È, coumo ' quello fount de Predet n'èro pos prou grando, abion decidat tabes de fè puja les tuèus jusco la fount dels Traucadous, al mièi del prat de Joulè. A toutos dos, aquellos dos founts bailhabon l'aigo al bilatge, mè l'estiu, quand fasio eichut las canèlhos nou bassebos que n'abion pos pus de lhèit e que s'en besion and' emplhena uno sanche, quand on las mousio.

E quello aigo, me direts, èro bouno? S'en mancabo plha. Ero pesanto à l'estoumac, troubo à jumberdasso, à l'engaumit.

à l'engaumit. Mè so qu'èro fort encaro, i troubabon de tout dedens. Quelque cop las canèlhos pichabon pos pus ou gaire. Las gents anabon gaita à l'endreit ount jant la foun èro apescado e achi troubabon un rat mort ou uno salimandro qu'abio bouchat le tuèu. Quelque cop tabes, aquellos bèstios èron regantados per las ganèlhos. Me brembi encaro, b'èro plha petit, d'un joun que sourtio de la 'scolo e qu'abio boulgut beure à la dourno ande's pots: abio bist al founze uno salimandro, touto bibo encaro, que me gaitabo!

B'ag besèts, las gents del bilatge abion fèit un foutut coumpte: le trebalh ande l'apesca i ous abio pos coustat plha car, mè l'aigo i ous agradabo pos.

Tems après, quelques omes del bilatge diguèguèn que calio fè beni l'aigo de la fount de Foutanabibo. Le regent, Moussu Truèl, ne parlabo à las gents en fèn la rasounado. Le Moua e toutis autris counselhès del bilatge ne parlèguèn al mèro. Finaloment le proujet fec adouptat e les trebalhs pousquèguèn coumensa. Cresi plha qu'èron just abant la guèrro de 14.

Las gents feguen la tranchado dins les camps ande fê passa les tuès. Mè le trebalh de pauso de la canalisiou fec counfiat à un maçou de Capoulech qu'èro cap agat à la journado. Aqueste, quand ajèc entemenat le chantiè, se bouluèc fê aumenta. Se disio, dins le siu rasounoment:

— Be caldra que me bailhen un chic mès, degus pus nou sap chaupica le ciment coumo ieu, pr'aci-n amount!

Mè, bè- te fê foutre, le Moua qu'abio bist se chin calio fê, qu'èro elh que surbelhabo les trebalhs, diguèc que pus que boulio fê cansous, n'abio qu'a las ana canta endacon mès.

— Ja's boutarè en plhaço, ieu, e ja birè pus bite qu'elh, encaro!

Le Moua, douncos, se prenguèc la trusèlho e tout anèc plha, mè quelques jouns aprèts, un macadis s'i boutèc à la ma dreito e calguèc atura le trebalh. Quand fec garit, l'i tournèc bouta e un boun maiti tout fec prèst. Las canèlhos de las founts rajèguen à boulentat. Las gents s'alegrabo de beure uno aigo qu'èro la milhouno del pais.

Ero sustout l'estiu que toutis s'en abisabon. Les jouns de fê l'èrbo ou de battre la courtado, al lhoc de se beure uno aigo que gairebe fasio fasti, qu'abio goust à fango ou à babots, se regalabon à boulentat d'aigo fresco, bouno, bouno, que n'èro un plhasé.

— Bous autris, al mens, la bous abèts plha causido se dision tout'n se fregan les pots ande l' couènh del moucadou.

E les que benion del Pais-Bas, toutis aganidis de calou, toutis malautejaires de s'èstre trop anujadis lhènh del bilatge, talhèu qu'abion ausit le bruch de la canèlho e qu'abion tastat l'aigo, on besio les lhouris èlhs que lusion e lhèu se troubabon refèitis.

Le tems passèc. Las gents abion debrembat le goust de l'aigo de Predet e s'èron abituadis à la de Fountainabibo, quand, tout d'un pic e la mès part del tems aprèts uno lhabassado, s'abisèguen que i abio lhourdum dins las boutelhos, quand on benio de las emplhena à la fount e qu'on s'i miralhabo dedens.

N-h-i abio pos gaire, à peno à peno, mè i abio qualqueres. Les bièlhis dision tabes que le goust abio cambiat e que n'èro jes ta fresco que d'autris cops. Quelques unis dision: — B'èts qu'abèts cambiat! Mè les autris soucadission le cap e parlabon d'autro causo.

La fount se demourabo coumo èro, degus nou i poudio fê res, res à fèt. Bous parli, d'uno doutzeno d'ans. Le bilatge s'èro despublhat alabets, las gents s'en èron anadis à la bilo, un à un e nou n' demourabo pos gaire ande parla d'elho.

Un joun d'estiu, biguen arriba de pr'achi n-abalh qualcus que sercabo un poulit endreit ande passa las bacansos. L'ome s'aturèc à Nourjat, troubèc l'endreit al siu goust e diguèc que tournaro. L'an d'aprèts, coumo de fèt, tournèc, crumpèc uno maisou e chic à chic, fec coumo s'èro nescut pr'achi-n-amount.

L'ome, Moussu Nord que l'apelhabon, èro toutjoun à se passeja dins les bosques, dins la bedo, su's plhanèlhs e su's tussals. Le besion pertout, cerca camparols ou fourruga dins las rocos coumo s'abio perdu qualqueres. La brespado, quand la nèit s'anabo tampa e que s'en tournabo à sibo, abio toutjoun uno causo noubèlh à fê beire à las gents: uno flhou raro e mirgalhado de poulidos coulous qu'abio troubat al bort de l'agal, el soul ne couneguio le noum: un roc tarabiscoutat que dibio èstre plhe de meno de fèr ou mèmò de couire. Ero le moument per elh de parla de las momuntanhos que se quillhabon a dessus del bilatge e de dire se chin sèron fèitos tems passat, à la neichenço del moun. Apèich i ous parlabo del trebalh, de so que fasion, de so que boulion fê e i ous bailhabo counselhs que s'escoutabon pels Sarrats amount, là l'ento de s'en ana soupa.

— Bè ne sap causos, se disio Lèon, ja se bets qu'a l'hejit dins les lhibres!

— Tio bè, à ieu me pinto se respoundio André, quand me dèicho me senlho que soun coumo embaranat. Que l'escrasès!

Mès elh èro toutjoun achi, que benio, que birabo ' mount, que berabo 'balh e qu'abio toutjoun qualqueres à dire à la un, à l'autre, sus so qu'abio bist en trastejan dins les bosques.

Un joun, à forso, pensèc bouta la rebouluciou dins le bilatge; Sabèts pos so qu'è troubat bèi? Le Rèc que debalho de Gamèl e que passo al dessus del prat de Plènplèn à las Caussinos, e be aquelh rèc, le beirets pos pus pel cami abalh: s'es perdut dins le cami ount drgus pus nou passo! E Moussu Nord countinuèc:

Obe, aco qu'es atal, l'aigo que nou s'ne ba fes mès cap al riu, mè dins la tèrro. Un trauc s'es dubèrt e l'aigo s'i embarro dedens; Ount s'en ba? Nou n' sè! Mè, b'ag cal sapiè; Bau fè beni ents de pr'achi-n-abalh que debalharan pel trauc e apèich boutaren uno poutingo dins l'aigo ande sabe se tourno sourti en qualque endreit.

Quand l'auren mestalhado dins le rèc, ja bous abisarè e me saurets dire se besèts la coulou ensa ou enlha.

Coumo de fèt, uno semmano aprèts arribèc al bilatge uno coullassado de gents, toutis bestidis de caoutchou, ande lhunetos su's èlhs e cascos de fèr sus l' cap.

— A mamaï, se dision toutis, e que bolen fè? Pourbu que fasson pos res de trabès!

— Aro i es, se diguèc Moussu Nord l'endouma maiti, durbèts plha les èlhs, abèn boutat la coulou dins l'aigo de las Caussinos;

Mè de coulou, degus noun besio cap en lhoc. La mainado, qualque cop, fasio uno courrido cap al riu, mè l'aigo s'escoulabo, en fèn la siu cansou, touto plharo, touto bibento. A las canèlhos de las founts, res ta pauc. Las gents s'entourougabon, toutis rebiscouladis e qualque trapelhur ja disio que l'aigo s'en dibio 'na dins l'infèr.

Moussu Nord e les sibis adujants sabion pos mès so que s'en pensa. La nèit s'anabo tampa. Doutze ouros deja qu'abion treboulat l'aigo de las Caussinos e degus nou abio bist sourti res en lhoc.

A la frescuro, les estels coumensabon à lhuse de la part de Mountagut, Jano de Tanguet que pousabo la dourno à la fount de la plhaço bic l'aigo que coulabo touto bluno; I è garo, se pensèc elho, mè que beses deja de trabès. Bal pos res de se fè bièlhis! La Plènplèno, qu'escurabo l' casset, se boutèc à crida quand bic aco:

— La coulou, la coulou de Moussu Nord. Jito got bè, t'en ag portes pos, aquelho poutingo. Nous emousounaran à toutis!

J'èro bertat, l'aigo coulabo blu. Moussu Nord qu'arribabo sus aquellos entrefèitos i coumprenio pos mès qu'abans. Chin ba, se diguèc elh, que l'aigo ajo mes tant de tems fè la maitat d'uno lhègo?

Achi l'abèts, l'esplicaciou, quand las picos que se dresson debant nous autris puntejèguen, tems a, i ajèc un grand boulegadis, qualque tems aprèts, que benguèc fè un rupadis dins le sol. Le pais se pensèc frousoulha, mè resistèc. Pourtant, i ajèc dos crebassos que s'en ban, toutos dos, cap à la cri e qu'on se pod enmajena; La uno dèu passa pel la Roco'mount, cap à la bartoulho del Cros es touto traucado. N'abèts qu'a puja al camp del Clic que se trobo al Talh, beirets un trauc, dijous uno ginèsto, ount jant les baquiès jtabon rocs ande passa l' tems e s'escoutabon le bruch que fasion en tuman las lharparros abalh.

L'autro, dèu coumensa debès le Tremoulet, dèu passa per las Caussinos e s'en ba mouri de la part del colh de la Lheno.

Entrans aquellos dos crebassos i dèu abe un lac souterrèn, al founze de la coumo, dijous les prats de la Prado, ount l'aigo de la fount de Fountainabibo se te al fresc, abant de raja. L'aigo del rèc de Gamèl a traucat le cami, chic à chic a troubat uno crebasso e s'es de plhèjo, quand l'aigo carrejo lhourdum, le rèc ba treboula tout le lac. La proba n'es que d'autris cops, quand le rèc de Gamèl s'en benio dins le riu, l'aigo de Fountainabibo èro toutjoun neto. Anam gaita d'aharji aquelh trauc delas Caussenos e beiren juscós ount pouiren debalha. Mè las gents n'ag ausiguen pos coumo'co; Aquelho musico i ous agradèc pos. La mèmo nèit tenguèguen counselh.

— Que nous bolen emousouna, se diguèn un; Anam pos poude abeura l' bestia de ouèit jouns.

— Se debalhon dins le trauc, faran sauta qualque roc e l'aigo de Foutanabibo s'en bira raja pu abalh debès Trascou. La bous birets mouse, alabets.

Finaloment, le mèro fec puja dous ou tres sacous de ciment pel mioul de Mouret e le maçou tampècle trauc per ount passabo l'aigo del rèc ande s'en ana dins l'esquerje; Le Rèc de Gamèl s'en tournèc dins le riu, Moussu Nord abandonèc l'idègo de debalha dins l'escur e las gents alendèguen.



Mè l'aigo es testudo coumo 'no mioulo. Un an aprèts, s'ajèc rousegat le ciment, trauquèc le sol e s'en tournèc pel mèmo cami; Pujats-i, un joun, s'abèts lhese, la beirets que se founho entrans dous rocs mè nou i demandets pos se ount ba: bous respoundra pos.

E Moussu Nord, me direts? E be, Mossu Nord a pöu de se facha ande las gents e nou debalho pos pus que nou ag bolenpos. Mè nou bous i troumpets pos, a le tems. Ja fourrugo un un chic pertout e un boun maiti ja troubara uno tuto dijous un matas de bouich que l'menara tout dreit cap à la mar tranquillo que dèicho escapa so qu'a de trop d'aigo fresco.

Aquelhos istouèros de traucs e de rècs me fan pensa à uno outro que Toni nous disio suen. Chi sap se l'trauc d'ouint bous bau parla nou fa pos partido d'aquelho famuso crebasso que passo per las Caussenos amount. Creso que se dèu trouba pr'alha, debès le rèc de Gamèl ou l'agal de Bidaloung. Le noum de l'endreit m'es passat de l'idègo mè ja sabi qu'èro d'aquelho part.

Dèichi ma paraulo à Toni:

— Un joun qu'èron anadis garda las bacos del coustat de (metan de Bidaloung) nous anèguen amusa, uno 'stouno que las bacos anabon plha, dins labedo en sièguen l'agal. Eron am mens cinq o sièis que courrion atal e tout-d'un -pic, Janou troubèc uno tuto dins un rucatèlh.

— Aco es la tuto del lhoup, se diguèc Pièrrou de la Muleto.

— La tuto del lhoup, de diguèc Jan del Toc, e se le lhoup es dedens?

— Qu'as pöu del lhoup, se diguèc un fanfaroun, Casimi de la Torto, le tioul ja te pano la camiso!

— Pus qu'ès couratjut, se i diguègui ieu, bas passa debant e te deguiren. Ja 's estreit ande i dentra, te bas despulha e quand auras passat le cap so qu'as de pus gros, tout so autre ja dentrara. Mè couito te, autroment se l'lhoup es deforo, pod arriba d'un moument à l'autre e te trouba dedens. Alabets ja nou sabi plha se chin t'ag biraras!

Casemi n'abio jes embejos de s'i embarra. Mè touti's autris se foution d'elh:

Qu'es tu, le couratjut? Ja tremolos deja!

Alabets Casemi se despulhèc, passèc le cap dins la tuto, mè, quand se troubèc dins l'escur, ajèc pöu e sulpic, boulguèc fè repèd.

Tio bè, le trauc, èro taloment estreit que pousquèc pos passa las aurelhos.

Qualques unis se boutèguen a fè: ou.... ou....le lhoup, le lhoup, e Casemi se desturmenabo, espantat, mè res à fè, res nou boulio passa;

— T'anan dicha soul un chic, anan cerca le Pujat que gardo las bacos a's Cardets, belhèu elh t'en sourtira.

E alabets nous anèguen amaga un chic pus abalh, countentis de bailha uno bouno lhiçou à-n-aquelh fadurlo. Apèich, Pièrrou de la Muleto se prneguèc un roc tout lhis dins l'agal, tout fret, tout lhusent e tournèguen puja toutis amasso al pèd del trauc.

Quand arribèguen, Casemi abio toutjoun le cap dins la tuto. Pièrrou s'aprouchèc, tout siau, e boutèc le roc tut molh tout fret, sus la quèicho del presounhiè. Aqueste se boutèc à crida, s'abio pensat quèro le lhoup que l'flhainabo e foutèc un saut. Taloment tirèc que las aurelhos i sannèguen e que l' cap se sourtic de la roco. Quand fec dreit, nostre moustelh s'en fujic per l'agal abalh.

Mè aco nou l' garic pos per autant. Al bilatge, jadiguèc suen qu'èro dentrat tout soul dins la tuto, que i abio troubat le lhoup, qu'aqueste l'abio flhainat sus la quèicho e apèich s'en èro fujit dins la bedo, tout plhe d'espant!

## LE NOURIGALH DE NORINO.

Le porc à Nourjat, èro qualques de counsequent: le que nou n' tenio pos èro qualcus de plha malurous.

On le se croumpabo, tout petit, quand èro enca nourigalh, à peno se prenio le carretou, on s'arremassabo qualques unis ande l'se causi de la mèmo trejado. Les pourcèlhs èro embarradis dins le carretou, aprèts les abe mercadis and'uno sanguino e on les se partatjabo, talhèu randudis, en les tiran per las aurelhos, so que les fasio gounida.

A parti d'aquelh joun, le pourcèlh fasio partido de maisou. Al coumensont, coumo benio d'èstre despoupat e que nou manjabo pos de tout, on i bailhabo sustout, trescops per joun, uno grasalado de lheitou aremountado and'un arpat de bren e quelques patanos and' la pèlh esplhafados e barrejados ande las mas.

Talhèu que s'èro enrudit, qu'abio pres le plheg d'èstre soul, le pourcèlh n'èro pos mès bailha causos que l'auron fèit engreicha abant l'ouro, mès pairoulados de caulets, de joutios, de naps que fasion dins uno oulo e d'ount tirabon jusco tant que n-h-i abio pos pus.

La primo, talhèu que s'atarrenhabo, la mainado que sourtio de la 'scolo se manjabo un croustet e alhargabo les porcs per Campanho ' balh. Toutis barrejadis, les menabon debès la Rauna ou le riu d'Atsiat; Achi, les porcs fousigabon ou peichion la gerbo, so que i ous fasio be; La canhièro, del tems que l' bestia s'alegrabo al bort dels prats, s'en anabo per las ribos enlha and'amassa las autrigos que coumensabon a punteja. Un panhiè à uno ma, uno camo de debas de lhano à uno outro, la mainado se fasio un biatge d'aquelhos camos berdousencos ande las fè coïre.

Aco i ous fa bouta cansalado se dision les bièlhis.

Quand la nèit s'anabo tampa, les efants tournabon bira'mount les porcs. Aquestis s'ag fasion pos dire dous cops: magris, lhaugèris, j'abion lhèu fèit de fè uno courrido ande s'ana eicharluta so qu'on boutabo dins le nauc. L'estiu, la nourituro èro encaro pus lhèu prèsto. Un chic d'aigo de baichèlho, un arpat de bren, dos fêlhos de joutios e tout èro dit. Les porcs granutabon dins las ièros, abant la nèit, quand le bentadou abio acabat de benta las courtados del joun e que tout le gra doulent èro barrejat ande las bentos.

Talhèu que la tardou arribabo, alabets ja cambiabo. Se l' porc abio passat talent, quand èro joubè, aro nou n' passabo jes mès. L'aigo plharo se besio pos mès dins le nauc ount jant les pairoulats de farnat e las escudèlhos de migros ou de sibado s'abetzabon tres cops per joun. Les porcs, alabets, nou fasion que chapa e durmi. Tabes, ja creichion à bisto d'èlh e le lhard se fasio espes. Apèich, debès cap d'an, las bèstios boulion pos del bourdic e se boulion pos mès acaba le farnat per ta bou que fesso. Un cop qu'abion brescat le migros ou le bren, les besiotis que s'en tournabon sus la palho en arroussegan la panso. L'ouro de las roumanos e dels gabinets èro arribado: le porc anabo tuat pusque boulio pos mès proufita;

Bous boli pos parla bèi de la fèsto que s'en seguio, mès de so qu'arribèc à Norino l'annado que se bouluèc tua un nourigalh.

Aquelho annado, douncos, Norino abio croumpat un nourigalh plha en retard. Desempèich qu'abio perdit le siu ome, ja n'abio prou and'elho pusque èro touto soulo ande l' se manja.

Quand l'ajèc engreichat, Norino se pensèc que calio proufita dela lhuno, qu'èro bouno, ande l'acoura e se bouluèc arremassa les parents e les besis. Mès la un èro acupat aci e l'autre alha. Finaloment Norino decidèc que se faro le dèso -ouèit de Jambìè. Quand ajèc dit al cardaire qu'èro de la fèsto elh tabes, aqueste nou boulio beni:

- I a pos le foc, se i disio, be t'auros pouscut causi un autre joun!
- I è majeno, dijaus es la bèlho-sor que l' se bol tua.

Apèich, me menaro trop lhènh. Me caldro demoura l'autro lhuno!

- As- te gaitat le calandriè? Be sabes qu'es la Sent Antoni?
- Que boulets que i fasso, aco? Noume derrenge jes, garats!

Le joun coumbengut fec un joun de tourrado. Les camis èron duris e les esplhops de las gents qu'èron coubidadis rasounabon sus la lhampo, dins le besinat; Tout'n se bufan als dîgts, cad'un dentrabon dins la cousino ount jant las cousinhièros boutabon un foc batalhè. Norino bailhabo un beire de cafè mestalhat and'un didalat d'aigourdent als que ne boulion:

- Tenèts, ja bous arremountara. Bebèts bous oc.
- Bal mès èstre aci qu'à la 'spèro de la lhèbre, se diguèc unen s'arremicoulan de la part del cantou.
- I è paurot, ja bous cresi, se respoundèc Norino. La sanche èro lhampado aqueste maiti. J'ag bigui, anèit passado, que faro fred. B'èro rouge de la part del cantou.
- I è paurot, ja bous cresi, se respoundèc Norino. La sanche èro lhampado aqueste maiti. J'ag bigui, anèit passado, que faro fred. B'èro rouge de la part de Bassiès. Auren fitos als dîgts and'ana al riu, tantos.

Un à un, las gents arribabon. Las fennos se sourtion le capetou que s'abion boutat sus la cofo e sulpic, s'acuferabon a pèd del foc, lhebabon un tampadou ande beire se i abio prou braso jous l' toupì, tastabon uno salso ande sabe se i abio prou sal ou desflhescabon uno doutzeno d'èus dins un saladiè.

— Anem, i cal ana se diguèc le cardaire. E i toutis?

— Tenèts la gabineto, diguèc Norino, l'anats acoura bous que bous i entendèts.

— Se te fa pos res, fè got fè per un autre. Me saura pos mal. E perdut le cop de ma. Me farè bièlh, d'aro l'enlha!

— Le bau acoura, ieu, se diguèc Touni, un calhastras que benio de s'arretira del serbici. Ja m'abio gaitat se chin fasio le miu ounplhe!

Deja le bourdic èro dubèrt e l' porc, trop fart, se boulio pos souloment bouluda, enca que Norino l'ajèssò pos fèit dinnalha, aquelh maiti. Les omes le feguen lheba, à cops de granhièros de ginèstos e le butàguen cap a nauc, birat de patos amount sus dos estèlhos de fach, al mièi de la ièro. Elh se dichabo jè, tout adurmit enca, en renan qualque cop, tout siau, coumo s'abio boulgut dire que se boulio pos ana passeja ande la frescuro que fasio.

A un moument dounat, quand le porc fec sarrat de prochi, les omes l'arrapèguen pe's pèds e le boutèguen de plhen pessus l' nauc. Alabets la bèstio se despertèc, se boutèc à gounida, à trepeja. Mè la pounho dels omes le tenio sarrat sus l'nauc e Touni deja cercabo l'endreit que cal à la gargamèho ande i plhanta la gabineto. Mè le gabinet dibèc passa arrans la beno sense la coupa e le porc, aprèts abe gounidat un chic, se mouric e benguèc retde. Dins la grasalo que Norino tenio dijous l' cap del porc, à peno s'on besio dous ou tres beires de sanc, al founze. Toni fousigabo ande la punto de la gabineto, mè le porc èro mort e i abio pos res à fè.

— I è paurot, se diguèc Norino, chin t'ès arrennat?

— Ja t'ag disio, se marmusèc le cardaire en se senhan, à l'autre cap del nauc. Bèi, le calio pos acoura!

— Aco es ou nou es, se diguèc Pistoul que badabo, a pèd del pourtal.

— Se te fa pos res, fè got fè per un autre. Me saura po mal. E perdut le cop de ma. Mè farè bièlh, d'aro l'enlha!

— Le bau acoura, ieu, se diguèc Touni, calhastras que benio de s'arretira del derbici. Ja m'abio gaitat se chin fasio le miu ounplhe!

Deja le bourdic èro dubèrt e l' porc, trop fart, se boulio pos souloment bouluda, enca que Norino l'ajèssò pos fèit dinnalha, aquelh maiti. Les omes le feguen lheba, à cops de granhièros de ginèstos e le butàguen cap a nauc, birat de patos amount sus dos estèlhos de fach, al mièi de la ièro. Elh se dichabo fè, tout adurmit enca, en renan qualque cop, tout siau, coumo s'abio boulgut dire que se boulio pos ana passeja ande la frescuro que fasio.

A un moument dounat, quand le porc fec sarrat de prochi, les omes l'arrpèguen pe's pèds e le boutèguen de plhen pes sus l'nauc. Alabets la bèstio se despertèc se boutèc à gounida, à trepeja. Mè la pounho dels omes le tenio sarrat sus l' nauc e Toui deja cercabo l'endreit que cal à la gargamèlho ande i plhanta la gabineto. Mè le gabinet dibèc passa arrans la beno sense la coupa e le porc, aprèts abe gounidat un chic, se mouric e benguèc retde. Dins la grasalo que Norino tenio dijous l' cap del founze. Toni fousegabo ande la punto de la gabieto, mè le porc èro mort e i abio pos res à fè.

— I è paurot, se diguèc Norino, chin t'ès arrennat?

— Ja t'ag disio, se marmusèc le cardaire en se senhan, à l'autre cap del nauc. Bèi le calio pos acoura!

— Aco es ou nou es, se diguèc Pistoul que badabo, al pèd del pourtal.

— E aro, que n'anan fè? se diguèc Norino qu'abio apausat la grasalo sus uno cadiero.

— Ag è bist un autre cop, se diguèc Tanguet que passabo e que s'èro aturat, elh tabes. Eron chè l' Moulinhiè.

Alabets, se diguègui ieu, n'abèn pos pus qu'à l' pela. Ande fè' s tripous, boun birets croumpa sanc chè Surro.

— As rasou, fasèts passa aigo, se diguèc un.

Le nauc fec cap birat, sulpic, e las pairoulados d'aigo boulhento s'abetzèguen sus l' porc, en fèn uno fumatièro que pujabo jusco la crinal del tet. Le pel sautabo e las gents l'arrincabon à cops de culhès ou à plhen arpat. Quand fec acabat de pela, le porc fec pujat al cap del nauc ande cadenos; lhèu le pouiron penja pe's pèds de darrè à las trabèssos del soutoulh.

— Dechats-le achi, se diguèc Norino, se ba engouta. Del tems, anan prene la gouto; Ja n'abèn besoun.

Les omes dentrèguen un autre cop, arrans le foc, ount jant las cousinhièros se demenabon. Mè n'èron pos encaro toutis sietadis que le cardaire, qu'èro tournat sourti, chi sap se cou, se boutèc à crida dins la ièro:

— Sent Antoni, Sent Antoni, que se passejo!

Alabets, toutis sourtiguèn, d'unocourrido, e que biguèn: le porc, tout pelat, tout blhanc coumo uno branco de fach gibrado, que se passejabo per la ièro amount, tout 'n fèn tramadèlhos e tout 'n cercan la porto del bourdic! Mè les omes ja l'abion pujat sus l' nauc un cop de mès.

— Chi bol la gabineto, se diguèc Norino, ta blhanc que la bèstio. Belhèu n'aura, sanc, aqueste cop.

Degus nou la boulio. Finaloment, à forso de se fè prega, Janou del Riu s'en carguèc e la sanc rajèc dins la grasalo.

Sent Antoni, le porc que se boulio pos acoura, pèich que se passejabo tout pelat dins la ièro, tout aco fasio charra las gents dins le bilatge: calqus ag abio emboumit pertout; Al riu, les omes tout'n lhaban las tripos dins l'aigo lhampado ne parlabon tout 'n patin de las fitos; Le cardaire, elh, se gausabo pos aproucha de l'aigo coumo se i fasio fasti, coumo s'abio pòu que l' riu nou l' s'en boulguèssou carreja;

Uno ourado pus tard, debant la napo touto que recurbeichio la taulo de la cousino, les omes abion deja debrembat touts aqueles pempilhos de la maitinado qe fasion rouda l' cap à Norino. Aquesto, de tems en tems, debalhabo al soutoulh, jita un cop d'èlh al porc, gaita s'èro toutjoun penjat als cabirous; se's gats i abastabon pos, de pel sol, and 'engarramelha le lhard ou se la porto èro plha baudelhado; Chi sap! be se calio mesfisa de tout; Apèich, contento de beire que tout anabo plha, s'ne tournabo à la cousino, escoutasse les omes que parlabon poulitico, que criticabon le mèro parceque palsemabo and' embouia la 'icharpo al Prefèt que i abio pos boulgut bailha so que calio ande durbi un cami.

Aco n'es pos noubèlh, se disio la fenno de l'adjuènt que fasio escalfura un plhat de ris entrans les andèrs, le gubèrnoment nous trobe se que ande paga la talho. Uno boumbo que i ous caldro!

Tout d'un pic, debès cinq ouros, Lèno qu'èro anado emplhena la boutelho al barricot, tournèc puja e sense tampa la porto qu'èro al cap de l'escalie, se boutèc a crida:

— Le porc..... le..... porc! Que s'en es tournat!

— I è, que desparlos, se diguèc le cardaire.

— Nani, nani, i a pos que la cordo, que penjo!

— Moun Dius, s'inquiètèc Norino, que i e fèit a Nostre Senhe, que me bèlgo tant de mal!

— A Nostre-Senhe, res, se respoundèc le cardaire. Mè à Sent Antoni, tio: que nou i as jes fèit plhasé.

— E sasion passa le tambou?

— Nani, nani las gents se boun riron, se diguèc le desquejaire. Ja l'bous tournaran be! Cal fè coumo se res nou èro.

Tard dins la nèit, coumo les tres fustets jiscabon del sol debès la Sèro del Roc, un gous chaupès dins le besinat. Degus nou boutèc le nas deforo ande la frescuro que fasio. Pourtant le Maitinhiè benio de la belhado e s'anabo coulca. Bic qualqueres que l'auro espantat se n'abio pos recouneguit sulpic le cardaire. Aqueste, uno lhanterno à la ma enca que i ajèssou la sereno, coundouseichio dous omes, le cap acachat, bhincadis jous uno cargo coumo la d'un ase. Nou sapièc pos se chèron.

Le maitinhiè moutèc pos, s'apartèc ande's dicha passa e apèihc se rebirèc: les dous omes pourtabon le porc de Norino que le cardaire abio troubat penjat jous l' siu engart, quand s'arretirèc ande s'ana coulca!

## L'OME.

L'Ome. Qu'es aco, l'Ome? se me direts. Mè les de Nourjat nou m'ag demandaran jes, risco pos res. Ja saben so que boli dire!

L'Ome es un roc tout quilhat al bort de l' cami de Milhaus, dins le bosc de las Garrafoulhèros. On le trobo aprèts abe despasat le caminot del Caroulet que se dêrp à ma'squèrro quelques passes enlha del Sol del Bosc.

Toutis les que soun nescudis à Nourjat e qu'an gardat bacos le couneguen. Dins le counte Omes e causos de d'autris cops bous e dit se chin les baquièrots, que passabon debant elh pel prumiè cop en anan garda las bacos à Milhaus per tout le joun, calio que i bailhèsson le brespalh. Si nou, l'Ome pou dio abe coulèro, jita un sort à las bacos, las fè e durbion la saqueto.

Bèi, me bous cal racounta l'istouèro d'aquelh Ome, qu'es bachi nou sap desempèich cantos annados e que countinio à garda que i ajo pos pus de baquiès ande l' nouiri.

Qu'a fèit aquelh Ome, que sio 'sta coundamnat per qu'es achi degus nou sap desempèich cantos annados e que countinuo à garda l' cami enca que i ajo pos pus de baquiès ande l' nouiri.

D'aprèts so qu'è ausit dire, diro' stat un pastou de las bordos de Soustal. Mè chi? Ero de la familho de l'Ournac, qu'abio la bordo sus la dressièro dels Bousigasses Plhanhièris? Ou dels Janirets qu'abion la lhouro, bèi despllhado, un chic pus abalh enca, abant la Bartoulho del Cros? Ou pulhèu del Pradenc, ou de Casso, que s'èron acampadis debès le mièi de la bartoulho?

Ou mèmò de Toni, pus prochi del bosc, à touca les prats de l'Adrapo? Siro pos estouent que nou fes d'aquelho bordo del Rèu que gardabo le bosc de las Barthos ou enca de Franc, le darrè alha naut, dins les prats de Nauseno.

Nou n' sè, garats! Degus n'a pos gardat le siu noum. L' Ome! Es atal que l'couneguen, es atal que se brembon d'elh e de la camo de gracio que l'a plhantat, achi al bort del cami de Milhaus, and'espanta les banquiès.

Aro, ja's à pus près segur que l' siu soubeni se ba nega dins las garrafoulhèros que creichen als sibis entours. Degus pus nou passo pr'achi, pus de bacos nou s'i biron las mouscos nou se bèrbon la saqueto ande l'amanhaga.

Desempèich le joun que i baillègui la maitat del miu brespalh, le prumiè cop que passègui debant elh, quantis cops nou l' mè gaitat, nou è bist les rocs que degus nou se prenio, sense i trouba las roudèlhos de salsisot, les croustets de pa, les talhs de matofam ou las barros de chocola que s'en ababon nou n'sè ount...

Quand le me gaitabo d'un tros lhènh, m'èro arribat del beire bouluda, s'amassa l' bastou e la capeto, fiula le siu gous, e apèich s'en ana a trabès le bosc en fèn camados ta lhongos que me senlhabon sense fi...

Me fregabo les èlhs, estabousit. Mè nou, j'èro toutjoun achi, al pèd d'un fach, e la cresenço de la tarrilhho puniciou se fasio pus grandò dins la miu idègo: l'Ome n'abio bouluda, sense estrementi, sense que jamès nou pousquèsso bira ' mount, bira' balh, coumo l'entendro, ou se repaira dins un autre moun coumo toutis les autris pastous, de Soustal qu'abion gardat un escabot abant elh, and' elh, aprèts elh!

I è b'ane. S'abio fèit qualqueres de trabès, be calio que fes penitensò. Mè qu'abio fèit, douncos, aquelh pastou? Uno gouelho, uno poulido bourrègo, l'embreichèc, le fec sourti del cami dreit. Aco arribèc uno brespado de la tardou que birèc dins le brougal del Caroulet. Les ramats èron toutis debalhadis de la mountanho e peichion las darrèros èrbos que las bacos abion dichat dins las peichendos abant que la nèu nou benguèsso abriga tout.

L'Ome prenguèc le caminot del Caroulet ande s'apara que las gouelhos nou s'en anèsson dins Lhasquir. Ero'chi, apuat sus l' bastou, e se gaitabo passa l' bestia. Las esquelhos de las pus degourdidòs s'en menabon l'escabot cap à la bedo del Roc. Tout d'un pic, bic uno gouelho que n'èro pos de las sibos: uno poulido bourrègo, las cornos plha catzados, l'èlh aberit, las ancòs plha filhoucados, qu'abio uno crouts de paego sus la ' squeno.

Tè, se pensèc elh, achi n-h-i a uno que se sira perdudo, quand le ramat es debalhat e la tourrado l'aura fèito baicha. L'Ome la se gaitabo de la troubabo poulido. Counegui pos aquelho mèrco? Nou dèu pos èstre de pr'achi a-n-amount. Belhèu es de qualcus de Gestières? I ous ag farè passa pel pourtur...

Tout'n caminan, l'Ome se boutèc la ma dins le salinhiè e la gouelho, sulpic manhago, benguèc cap à- n-elh e i lhèpèc la ma plheno de sal triso, sense pöu. Apèich, fec un croustet. Le pastou le s'abio gardat ande bailha à la Quouèlo, que benio d'anelha. La bourrègo le se rouseguèc, sus l' jas, tout'n se gaitan l'Ome, les èlhs plhenis de contentoment. Le pastou, alabets, i boutèc la ma sus la ' squeno: la gouelho se pourtabo plha. Aquesto tio, es carano, se diguèc l'Ome tout'n la palpan, ja m'arremounmatge que nou sio pos mibo.

L'endouma, quand l'Ome tournèc alharga, la bourrègo se boutèc debant e le seguic and'ana à la birado. Qu'èro manhago!

S'abio' gut uno esquelho, ou solument un petit esquelhou, toutes las autres l'auro'n seguido. E l'Ome, tout le joun, s'enmajenèc que degus nou la bendro reclama e que se demouraro dins le siu ramat.... La brespado, quand l'escabot se tournèc trouba dins la ièro de la bordo, l'Ome arrapèc las talhansos e coupèc la pego que fasio la crouts sus las ancos de la bourrègo.

Cado pic qu'alhargabo, ja i senlhabo que la lhano tournabo negreja à l'endreit ount jant abio passat l'utis e l'Ome, sulpic tournabo escatza la lhano, encaro pus ras, à tal punt que, quelques jouns pus tart, n'èro pos mès uno crouts de pego que la bèstio pourtabo sus la 'squeno, ande la merca, mè uno crouts fèito de cops de talhansos, so qu'èro gairebe parèlh.

L'Ome n'èro bengut tout boch. Al lhoc de bira de la mèmo part que les autres pastous de Soustal, abio pres le plhég de s'en ana à autre endreit de pöu que qualcus nou s'abise qu'abio uno gouelho ande la s'queno touto talhansejado.

Degus nou sabio pos mè so que s'en pensa. Le maiti, mèmo les jouns que i abio gelado, las gents le besion qu'abio deja alhargat e, al lhoc de dicha l'escabot un chic à la soulilhado and' ag abe adoussit le butabo dins le bosc coumo s'abio' gut le foc al darrè.

La nèit, à l'ouero d'embarra, rassoulhejabo pos mès dins la ièro ande bouta bitrol als pèds de las bèstios rancos ou and'estaca les flhocs despallhadis pels espinasses.

L'Ome se couitabo d'embarra, rassoulhejabo pos pès dins la ièro ande bouta bitrol als pèds de las bèstios rancos ou and'estaca les flhocs despallhadis pels espinasses.

L'Ome se couitabo d'embarra e las gents abion remercat que, al lhoc de baudelha la porto coumo fasio al debant, bailhabo dous tours à la sarralho.

Tabes se boutèguen à charra quand le besion tout soul darrè l'escabot. S'en dèu ana de la cabosso, de diguèc un, e les autres le boulguèguen pos countrodire.

La causo arribèc quelques jouns abant Martrou. L'Ome abio birat dins le bosc de las Garrafoulhèros, ande s'en ana, cap à la brespado, debès les prats de Nauseno. S'èro demourat sus l' cami de Milhaus ande fè baicha las que l' bouldron sauta. Tout d'un pic, le pastou bic beni cap à-n-elh, uno fenno que senlhabo èstre uno pastouro. Tout'n caminan, se gaitabo l'escabot tot esparricat pel bosc abalh. Aco n'agradèc pos plha al nostre pastou: ne fec tout embrounzinat.

Adissiat, l'Ome, se diguèc la pastouro. N'aurots pos bist uno gouelho mercado and'uno crouts de pegos sus la 'squeno? S'es perdudo sus la mountanho!

— I è majenat. N'è pos beist cap, ni bibo ni morto!

La pastouro i respoundèc pos sulpic. Les sibis èlhs fourrugabon pertout à trabès les matasses e l'Ome la debidatjabo ande sabe dount poudio èstre. Mè nou senlhabo pos gaire à cap de fenno de pr'achi -n-amount.

— E aquelho, alha, que se manjo les mouichairous, dejous l' matas de fach, cou la tusquirats deja? Que passats frèito de lhano? N'abèts jes bergounho de la tousquira abant l'ibèr?

— Aque'lho? Nou m'en parlets pos! A' rrapat la rounho. Pèrd la lhano, aro mateich.

— La rounho? I è que badinats! Be la besi plha galhardo per malauteja. Menhant, la bau beire.

La fenno s'abio deja durbit la saqueto e ne sourtic un croustet. La bourrègo bic le cop e deja benio, d'uno courrido, ande l' se rousega.

— Malur sus bous! se diguèc la pastouro. Aco es la bourrègo que cèrqui. La m'abèts panado. La me pagarets!

La fenno se rebirèc, pel cami amount e s'en anèc, la gouelho sus sibis talous. L'Ome sèro apuat à un fach, al bort del cami e la se gaitabo que s'en anabo à Milhaus sense se rebira. Roucatèlhs de brumo sourtiguen del plhot de Coumo -Croso e abriguèguen touto la bedo. Tout s'escuresic. Les que gardabon gouelhos, le mèmo joun, als bousegasses del Ticol, biguen un dalfi qu'abrandèc las Garrafoulhèros. La lhabassado que s'en segiu manquèc de nega toutis les camps de Soustal.

La brespado, le pastou se randèc pos e le siu escabot se durmic deforo. Las gents pujèguen, l'endouma maiti, ande l'ana cerca. Nou m'estouno pos, se diguèc un, es bengut boch. Dibèc pos beire que la nèit casio e se sira perdut dins la bedo del Roc

Les que passèguen pel cami de Milhaus troubèguen al pèd d'un fach, qu'abio las brancos toutos rumados per la prigoulado, la capeto e l' bastou del pastou. Arrans à touca l' cami, un roc èro plhantat, un roc que senlhabo un ome, un roc que degus n'abio pas jamè bist à-n-aquelh endroit. Las gents se senhèguen, s'amassèguen la capeto e l'bastou e s'en senhèguen, e s'en tournèguen.

Desempèich, l'Ome es plhantat achi, al bort del cami, per touto la bido e les baquièrots que soun pujadis à Milhaus, cado, estiu, n'an pos jamès debrembat de i bailha un chic de boubou e de pa ande l'amanhaga!

Desempèich aquelh joun, las gents de Nourjats an agut l'espant cado pic qu'an bist les roucatèlhs de brumo sourti del plhot de Coumo-Croso les jouns de trounics.

## L'OUTS QUE JITABO ROCS.

Aco se passèc al tems encro prochi ount les ramats abion cadun lhour orri sus las mountanhos que s'estenden del coustat de l'Andorro. Disèn que dibio èstre als entours de la fi de la grandò guèrro. Al joun de bèi, las jassos soun abandonados, les escabots se soun fèitis taloment raris.

Uno brespado dels prumièris jouns de Setembre d'aquelh an, las gents del petit bilatge nisat al pèd de la bedo feguen plha estounadis de beire, sus la sèrro tout prochi, le ramat qu'auro deugut èstre alabets de la part douncos, al mens, jusco la fi del mes.

— I a qualques de coupat, se diguèc le mèro, i bua embouia le champètro. Belhèu le pastou s'a birat le pèd e le ramat a tirat al flhèich.

L'endouma maiti, gents biguen debalha le gardo per la Tèrro-Negro abalh e anèguen al riu, al siu rencountre. Dèichi la paraulo al champètro que nos tournèc dire so que l' pastou del ramat i abio countat.

— Desempèich dilhus passi le carcant. Dins aquelho brespado, se te bremqbo, le tems èro bengut maichant. La plhèjo basso s'èro barrado.

Ero le mal tems que derrengabo las bèstios? Nou n' sabi res. Toutjoun es que, de tems en tems, le ramat qu'èro à la birado se m'arremassabo, and'uno courrido, coumo se i abio fèit passa l' gous. Qualques le tarabustejabo, mè que?

Alabets, decidègui d'ana aphieta un chic d'ouro à la jasso del as Coulhatos. Quand fegui randut, èro goutent coumo'no soupo e n'abio pos que la lhengo d'eichuto! Mèrcegui mèd d'uno doutzeno d'alumetos and'alhuca un fagot d'aberdalhs e pèich me despulhègui ande me fè seca la fardo à la prumièro flhamado. Coumo boutado dos patanos à coire dins las cendres ja bigui Farou que repoutegabo al cantou, le pel erissat.

Sus la plheto, als entours de la cabano, las gouelhos toutos arrucados se sarrabon las unos countros las autres ande s'escalfura e qualche cop se soucadission ande fè caire l'aigo que s'emprenhabo dins la lhano. S'èro uno bèstio munido d'uno esquelho que se soucadssio, à peno s'ausio le bruch del batalh, amourtat qu'èro pel la brumo espesso qu'acababo de se barra e la plhèjo que casio toutjoun. Tout d'un pic, n'ausigui pos qu'uno brandido d'esquelos e d'espelous.

Coumo sourtio l' nas à la porto de la cabano ajègui just le tems de beire l' tioul de la darrèro bèstio que s'enfujio per la Sèrro abalh cap al bosc de fach.

— Per mou fe, se diguègui ieu, qualcus a embreichat le ramat!

Me preni le bastou, la capeto e seguit del gous me pèrdi dins la brumo ieu tabes. Al cap d'uno bouno mièjourado troubègui las gouelhos toutos founhados dins les matasses de fach. Mè, que las ne poudio jes sourti! Se dichabon baselha pulhèu que de fè'n pas. A forso de trucs sus las cornos e de las fè moutzega pel gous, reussigui à las tira del bosc. Mè chuo galèro ande las bira' mount cap à la plheto, demèst les matasses de brougo e d'aberdalhs que rajabon d'aigo!

Anabo èstre à la cabano, la brumo s'esparricabo un chic e, a trabès les fumarèlhs besio gairebe touto la jasso quand, tout d'un pic, las gouelhos qu'èron debant s'aturèguen e se boutèguen à truca pel sol and's pèds de debant. Apèich tout le ramat me passo entrans las camos e s'enfuch un autre cop dins le bosc.

Ero tout plhantat coumo'n Jan-Broc al mièi de la plheto quand le Farou se boutèc à chaupa. A trabès les fumarèlhs que trabessabon la jasso bigui alabets un' oumbro que senlhabo à un ome fort, à un ome fort, grand e gros. Aquel senlhèc grand. I courri aprèts, le cridi:

— Chès tu. Que fas achi? Fè te counegue, menhant, un chic!

Mè res à fè, l'ome se perdèc dins la brumo que se tournabo barra. Me fau amount, del coustat que s'en èro anat. Le cridi encaro, mè n'ausio pos res que la plhèjo que casio sus la capeto.

Tout d'un pic, qu'entendi? Un roc que benio de caire als mibis pèds. Me fregui les èlhs, le bau amassa: èro bertat, èro uno pèiro de dos ou tres lhiouros al mens, touto plhanhièro. Douncos, le bent l'abio pos fèito rouda jusco, ieu, qualcus la m'abio arrounsado. Mè chi?

Cridi encaro:

— Fenhant, fè te beire, al lhoc de tira rocs. Ount ès? Ben'aci, se gausos!

Mè res nou respoundèc. Alabets, me bau embarra dins la cabano ande m'arresta e demoura l' joun abant d'ana tourna cerca l' ramat. Podes creire que le joun fec lhounc à beni. Be sabes se chin se passon las nèits ount on es sougantis del cap als pèds, que las rasics de genibres toutos goutentos nou bolen pos crema e nou fan que jumatièro dijous la gerbo. La nèit, la passègui à buffa sus tisous e à m'escouta s'ausio, demèst le bent que me rebrousseja le fum sus èlhs e la plhèjo que casio sus fumatièro dijous la gerbo. del tet, le bruch d'un esquelhou, d'uno esquelho ou le pesant d'aquelh ome qu'abio bist courre coumo'n poulhi sus l' gispet del cap de la jasso.

E qu'auros fèit à ma plhaço? Te siros batut countro la brumo basso que t'emboustissado dins uno moulhuro del diablhe? Ou te siros anat esquerja sus un roucatèlh s'i besio coum'n gat?

L'endouma, le tems s'èro adoubat. La brumo se desarrapabo à chic dels roucatèlhs e le soulelh eichugabo las èrbos e les matasses.

Las gouelhos sourtiguen del bosc uno à uno e se boutèguen à la birado toutos soulous Las dichègui fè, ande las poude coussira e sabé se i èron toutos. Alabet m'abisègui que mancabo l' marra, un poulit marra que dibio abé tems. Las cornos plha retourtilhados, uno bèstio carano, fasio pöu al Farou que nou l' poudio pos jamès rebira. Belhèu s'èro demourat and'un petit escabot que dibio manca al ramat? Touto la maitinado fegui pos trasteja ensa enlha ande gaita se besio lhuse qualques. Mè èro plha mal aisit parce que l' ramat, espaurucat coumo la brèspo, fasio pos que courre e cambia de birado pic e moument.

A mièjo maitinado, coumo passabo al pèd d'un tartié que trobi debant ieu? Uno pelh de gouelho, touto fresco, plha pelado e un chic pus lhènh, le cap e las cornos del marra. Alabets, ja coumprenuègui l'espant del ramat: l'ome abio boulgut teni cap à la bèstio salbatjo ande s'apara à las gouelhos e l'abio demourado al lhoc de s'enfuge. L'outs ajèc lhèu fèit de i sauta dessus e del se manja. Quand boulguèc beni ensaja de s'en chapa' n autre e que m'i boutègui en trabès, me tirèc un roc de despièit!

Se nou reussic pos aquelho nèit, auro ensajat un'autro estouno. Tabes, à mièit-joun, decidègui de debalha l' ramat e, à l'ento de l'angelus, arribègui à la Sèro de l' Roc. Ja pensi que l'outs se sira demourat pr'achi-amount. Las gents, tout'n dounan rasou al pastou d'abé dichat la plhaço à l'outs, se foutèguen d'elh à perpau de la pèiro que i abio arrounsat. E le pastou nou fec pos content quand sapièc que degus nou fasio cabalh d'aço qu'abio bist e ausit.

Tems aprèts, le pastou èro mort, lhejigui sus un lhibre que l'outs disio pos res à l'ome mè qu'èro benjatiu e que i arribabo de tira rocs se qualcus le boulio empacha de jè so que boulio.

Alabets, tournègui pensa à so qu'èro arribat al pastou de las Coulhatos, uno bèit de Setembre 19..... e le crejègui.

## LA FIEIRO DEL PICART.



Jano del Faure es beuso desempèich dous ans: te pos mès de bacos. Le siu gous, Picart, es plha balent e i serbeich de coumpanho, mè aco es tout so que fa. Coumo Jano n'es pos plha richo a decimat, le joun de la fièiro del mes de Setembre, de se bendre l' gous. And' aço qu'estalbiara, pouira nouiri uno galhino de mès e se recatda qualques èus.

Jano s'es aturado al marcat dels bedèlhs e a estacat Picart à la rodo d'uno carreto. Un gascou le se gaito e Picart se bouto à coueteja de plhasé quand l'ome i passo la ma sus la 'squeno.

— A l'aire amistous, la fenno.

— O pr'aco oui, en le poutounejan e en i bailhan cambajou. Es bertat, crèbo d'embejo de trebalha, l'ome....

— Aco ba plha, la fenno.

— Bous ag boli dire coumo es: de cops es un chic sourt.... Quand le cridi, be pos toutjoun.

— O, aco fa pos grand causo, la fenno. De bou ausira pos, i ag boutarè per escriut....

— A so que i a, es que manjo de tout.... De bou quand i a de bou, de doulent quand i a pos res de bou...

— Alabets, a bouno bisto, la fenno. Bou'n fasats pos, quand aura pos talent le biré fè beure al riu....Quant ne boulèts?

— I e garats, l'ome, me fa pos nauso, la brabo bestioto.

Cinq cent francs!

Aco ba plha, la fenno, le m'en bau mena....

## L'ENCANTADO DE GUZET.

Ané, la plèjo s'amatio....

Le soulet mostro sus la crio

La berrugo del sul nas d'un reboumbèi.

Galto, on diro que l'encantado,

A cernilhat pertout jados à plen curbèi.

CELESTIN MAFFRE (RAMOUN E BELHOU).

Janou de Bitorèn (aqueilh Bitorèn qu'abio dichat uno camo à la guerro de dèsgouèit) gardabo las bacos, uno brespado d'agoust, dins un bousigas del Fouilletch.

Le tems n'èro pos plha soulide: un penjourlin de brumo abio emboustissat la pico de la Mèdo debès las dos ouros e, uno ento pus tart, la brumo basso s'èro barrado juscos las escalos de Bazet. Tabes, Janou abio decimat de nou n' pas ana dalha coumo boulio fè, mè d'alharga las bacos d'ouro e de se repaira en las gardan.

Janou èro'n ome dins le l'atge. I abio qualques ans qu'èro tournat del serbici. Auro pouscut, coumo toutis les sibis camarados de la classo, demanda al deputat de i fè abé uno plhaço de douanhiè ou de jandarmo. Mè, bè te fè foutre, aimabo trop le siu pais e s'en risio quand sa maire i disio que nou se maridaro pos jamès parce que las filhos de bèi se boulion pos mès demoura à la mountanho.

— Fa pos res aco, i respoundio Janou, be ni troubaré uno, un foun, en trastejan dins les bosques!

Tout siau, en mès espes alhisado en plhèjo, le rousal casio de mès en mès espes e Janou se pensabo que las bacos n'auron pos embejos de s'en ana dins les matasses and' amourgalha. Tabes, s'anèc coulca sus la capeto, jous un gros fach al bort del cami que meno à Bazet.

I abio deja un chic qu'èro à l'arrèt quand bic arriba, alha, al rebiret del prat de Souquet, uno causo que l' fec l'heba tout dreit, la 'squeno apuado al tronc del fach. Uno fenno, uno filho belhèu, benio cap à-n-elh, siautasoment mè le pas segur, les pelses coulou d'espigt de blhat repicoutat, regussadis sus l' cap and'un ribant e toutis rousaludis, les èlhs blunis coumo le cèl quand fa plha soulelhado.

Nostro encounegudo anabo passa arrans del goujat que se fasio de mès en mès petit taloment abio crento. La filho se rebirèc tout d'un pic e, d'uno bouts plharo en esclampétant de rire:

— O, qu'aïmi aqueste pais, pertout n'es qu'aigo e frescou!

Janou abio fèit un pas en debant, les èlhs plhenis de gauch, la crento aro forobandido. La siu lhengo abio tournat trouba l'escup. Urous d'ausi uno estrangèro dire be del siu pais, i respoundèc:

— Aici, es la fèsto de l'aigo. Mè aco pos res encaro. Se pujats pus amount, alabets o, sirets estoubousido. Talhèu qu'aurets despassat las escalos de Bazet, nou troubarets pos que founts que pichon, rècs qu'asaigon ou agals que brounhen.

S'abèts bouno camo e se bous acaminats cap à Guzet, alabets troubarets un estanh que cambio de coulou cado pic que l' tems cambio raubo.

— O, que dèu èstre poulit! E fourmegos dins las camos.

— Demourats. Se n'abèts pos prou bist, poudèts toutjoun puja al Mountrouch. Achi, pel caminot de las gouelhos, aurets trebalh ande demanda perdou à toutos las aigo que rajo del roucatèlh. Mè chin ba que siots achi? N'abèts jes pòu del mal tems? B'èts pos de pr'acjo -n-amount?

— O que nani. Pos pòu de cansa; Soun arribado de jasiè. Beni de P..... e me soun bengudo repairea dins le bostre pais. Figurats bous que me soun engalhado dins le cami estreit, qu'es alha al bort de la routo boubèlho, creichen à bos-me mès.

Achi, me soun boutado à alenda un chic al pèd d'uno bordo amagado darrès un frèiche. Dous dalhaires que s'en anabon brespalha, la saqueto als caps de' s digts m'an cridat: Fèts-bous ensa, n'ajats pos pòu, ja poudèts passa!

Mè ieu nou gausabo pos passa de pòu de peniqueja l'èrbo que les dalhaires anabon coupa. Alabets m'an dichat passeja dins le prat ount l'èrbo, coupado de tantos, embaumabo. Soun demourado achi, un pauc à sauta 's rengs tout'n alendan aquelho audou fèito de calou e de tèrro molho;

Es curious coumo la flhaino de l'èrbo pèjo lhènh dins le nostre cos, n'ag troubat je?

— Que si, è'gut la mèmo idègo. Bous boli dire mès qu'acç pusque besi que bous fa plhase. La flhaino que pèjo de l'èrbo qu'es pel sol n'es pos la mèmo sibant que le dalhaire be de coupa jumberdasso ou triboulet, juns ou breganèlhos, farouch ou ausèrdo. Res qu'à la flhaino, on pod debina le prat ount jant on se trobo.

— Soun plha contento de bous abe troubat. Digats-me, bous que couneguèts la mountanho, se me menabots à-n-aquelh estanh que dibèts aima parecque è bist que' s bostris èlhs lhusion quand me n'abèts parlat. Apèich, se tourni trouba sus l' cami un roc tout rouge coumo un qu'è troubat tantos m'en direts le noum, coumo tabes se chin s'apèlho aquelh ausèlh que cridabo dins la brumo: — Pi..... ou.... ou e que n'è pos pouscut beire boula.

Janou se palpabo, embahit de so que fè. I faro plhase d'ana and'aquelho filho que coumpren tant las poulidos causos de la mountaho. Mè que sira se las bacos s'en ban routa 'l prat de Souquet que n'es pos encaro dalhat ou se la Pardolo tiro al flhèich and'ana amaira? E se la Courbo e la Ramé se tumon, elhos qu'an toutjoun la tumèro, belhèu s'escourneran!

La filho dèu abé endebinat las idègos que passon dins le cap de Janou: les dibis èlhs blunis se fan pus doussis, pus pregaires e, talhèu qu'a bist que l' goujat se ba dicha fè, les sibis pots se soun regussadis e an dichat beire dos rengados de denses coumo la nèu.

Anem, Janou a perdu: tant pis per las tumairos, que le foc del cèl las escrase! Uno forso encounegudo le buto cap à Guset, s'arremasso la capeto, le bastou d'abelhanhiè e dits à la filho:

— I anan puja, pusqu'ag boulèts. Mè be sabets que plhaura abant la nèit? La sal es plha molho dins le salinhiè!

— O, me fa pos res à ieu. Se plhau, dicharè las finèstros dubèrtos dins la crambo e douma maiti tout sira sec.

Janou fec passa la filho debant, dins le caminot que mèjo cap à la bedo. Es un plhase per elh de beire que camino d'un pas ta segur e se demando quelque cop se nou siro pos de pr'aci -n-amout. Mè nou, fargado coumo fec estreit e que de la bilo coumo dits..... Quand le cami se fec estreit e que le bort fec plhe d'èrbo molho ou de falgas rousaludis, Janou alabets passèc debant e, ande l' bastou, soucadic l'aigo qu'auro amoulhegat las camos de la siu coumpanho.

Tout le cami, la filho nou que charra. Tout l'estounabo e Janou abio trebalh ande l'empacha de s'adounoulha cado cop que troubado qualqueres que i agradabo: falgas que creichion al ras del sol, fêlhos toutos negros e frisados ou, al countrari, que pujabon en lhongos camos douços e berdos coumo se boulion ana cerca le soulelh per dessus les abets; moussos de toutos las coulous e de toutos las calitats qu'emboustissabon las soucos dels faches coumo se's boulion para del fret; moussos encaro toutos argentados, arrapados à las abetalhos dels biêlhis abets, las unos lhongos coumo pelses de fenno, las autres aplhanhieridos sus la branco, les borts dessinadis ta fi que nostro encounegudo nou se fatigabo pos de i passa la ma dessus, tout siau.

Quand la brumo se debanabo entrans les aibres, al ras del sol, la filho jitabo un cric and'atura Janou e i demandabo se n'èro pos l'encantaire de la bedo qu'esparricabo un fum, que se siro fêit e desfêit a boulentat, and' amaga als èlhs dels estrangès tout so que i a de poulit dins la bedo, per jelousio.

Janou e la filho sourtiguen del bosc coumo a regrèt, mè aqeste nou durèc pos. Le plhanèlh de Suiloou èro jous lhouris pèds e, quand la brumo se desarrapabo un chic de beire les countours dels tussals toutis repoutidis que prenion, demmèst les jumarèlhs, uno formo plheno de mistèris, als entours de las plhetos rasplhados pel bestia.

So que la filho troubabo de pus estraordinari èro le rousal de la brumo basso: à la bilo, i abio plha la rousalado de la nèit que casio sus las fêlhos terrousos dels aibres de las carrièros, mè aco n'èro pos res arrans so que besio. Toutos las èrbos lhongos, las dansairetos sustout, èron curbidos de rousal que las blhincado jusco l' sol e, se on las se gaitabo per dijous, a uno debalhado, on besio coumo'no telo d'argent prenio uno coulou pus tendro que tirabo sus l' maube, la coulou de las fêlhos bistos per dijous que trabessabo le cristal de la rousalado. La filho n'aturabo pos de passeja les sibis digt sus als èrbos que dichabon caire le rousal dins le plhot de la ma e se redressabon apèich, pus lhaugèros, pus aberidos, coumo s'abion troubat uno rasou de mès de creiche e de flhouri.

— Tastats, se didio la filho en bailhan and'uno grandò simplicitat la siu ma touto plheno de rousal a Janou, tastats. Es curious coumo l'aigo a pres le goust de l'èrbo que l'a poutado!

E Janou tastabo, las camos coupados de tant de douçou que benio de l'encounegudo. A! coumo las tumairos èron lhènh aro, s'en poudion ana routa l' prat le Souquet se boulion, ja s'en foutio.

Pujant toutjoun? demandabo Janou à la filho que s'aturabo qualche cop and'alenda. Mès elho se couitabo de dire Belmam de pöu que Janou crejès que s'aturabo parceque l'embejo d'ana pus amout s'èro amourtado.

Alabets tournèguen dentra dins le bosc, abant l'estanh. Les faches que plhourabon goutos de rousal, se quilhabon pus fièris encaro sus un palhas d'embrum; la brumo se barrabo de mès en mès, uno petito plharou poutant demourabo. Aro, i ous senlhabo qu'anabon arriba.

L'estanh n'èro pos lhènh: deja, à ma dreito on ausio le bruch de l'aigo que rajabo pe's roucatèlhs abalh. L'agal, bibo, plharo, bartabelhejabo à l'estanh, un chic malcarut d'anujè, e i marmusabo tout siau qu'elhis dous s'aprouchabon.

Encaro quelques passes, quelques rocs rescoumpassadis e lhèu Janou prneguèc la ma de la filho:

— Digats pos res e tampats les èlhs, benèts ande ieu. Anem, es acabat, les poudèts durbi?..

La filho s'èro aturado, estabousido. Als pèds, l'estanh senlhabo adurmit, tout redoun, tout entourat de berduro. Uno franjo de faches, dins le founze, esquerjadis sus un timbal, i fasion coumo'no courono que se miralhabo dins l'aigo, apausado de capzes abalh. Al mièi d'aquelh esquerje, un rèc d'aigo que blhanquejabo pus fort que les fumarèlhs de brumo basso debalhabço en cascarelhejan e se benio jita dins le lac. Aquelh rèc se besio tabe dins l'aigo de l'estanh coumo'n pendou del rèc bertadiè. L'aigo èro d'uno coulou que se poudio pos dire; la pus tart se coutrodisio e troubado qu'èro, belhèu, dela mèmo coulou que la brumo negro que passabo dins le cèl, à-n-aquelh mèmo moument, al dessus de la brumo basso. Janou n elh, disio que, se le soulelh s'èro fêit beire l'estanh siro de la coulou dels sibis èlhs. La filho le se gaitèc e le goujat, un cop de mès, bic las denses lhusentos de l'encounegudo.

Apèich, la filho boulguèc touca l'aigo ande las mas. Janou deja la cridabo ande fè l' tour de l'estanh e, en caminan, i disio que, les jouns de soulelh, auro pouscut trabessa en nadan. De l'autro part, à l'endreit ount l'aigo que dabalhabo de la mountanho se perdio dins l'estanh, achi esprès ande reprene pèd.

En fèn le tour del lac, la filho boulio counegue le noum de toutos las plhantos que creichion sus sibis borts: uno sustout, desflhourido desempèich tems, l'aberdalh, la fasio soumia.

— Tournarè l'an que be al mes de Julh, ande beire la siu flhou que dèu èstre carano!

La brougo ande flhous que selhon autant de couscourros e la regalècio que jito estelos roujos blhancos als borts dels rocs l'aturabon, tabes, e, Janou, tout urous, derrasigabo uno rasic de regalècio ande la i fè tasta. Mè le countentement le pus oort féc quand Janou ajèc troubat, arrans l'agal, uno abajous, la soulo i senlhabo parce que las abajounhièros n'abion pos gaire flhourit à causo de la tourrado del mes d'Abrièl.

— Que se manjo aco? Me boulèts pos empousouna! disio la filho. Mè quand ajèc tastat se couitèc lhèu de ne cerca d'autris e Janou sabio pos mès ount se bouta, elh que ne troubabo pos pus, quand la besio beni cap à-n-elh, las mas plhenos d'abajous molhis de rousal.

— Dounats-me la ma, les bous anats manja, les bous bailhi. Bous dèbi aco, nou? Ieu, tournarè un d'aquestis jouns que i aura soulelh ande ne cerca.

Janou parabo las sibos dos mas, toutos juntasos e la filho i boutabo la siu petito ma dedens, touto plheno de bolos negros, las abetzabo e pèich, en esclampetan de rire, tampabo las mas del goujat e s'enjujio, plha bite, ande ne cerca d'autros.

Tout a uno fi. La brespado se fasio tardibo: l'ento de dentra èro achi. Alabets decidèguen de se sieta un moument, al pèd de l'abet que gardo le bort de l'estanh, sus un tussal. Janou estendèc la capeto pel sol e toutis dous se siètèguen, biradis cap al lac, ande l' se gaita encaro un chic abans de debalha. La cascado se lançabo toutjoun de la cri e s'i miralhabo ande fièreso; L'aire èro plhe d'audous de tèrro e d'embrun amoulhegat. La plhèjo benio dire à l'estanh las istouèros del cèl. Que de counfidensos!

— Me fa plha peno de m'en tourna, se diguèc la filho. E bous? Mè, fa pos res, gardarè un boun soubeni de tout e de bous tabes.

— Mè be tournarets, l'an que bé?

— E, ch'ag sap so que farè l'an que bé! On nou pod pos pensa ta lhènh.

— Be m'escriurets, al mens?

— Bous escriure? Ande bous pos mès bertats e niou bolen pos dire grand'causo.

— O que nani, quand disi dire qualqueres, les mots an uno grando balou e, se n'ag cresi pos, me calhi, i respoundèc Janou... Anem, s'en cal ana, diguèc l' goujat à la filho que senlabo arrapado sus la capeto.

A- n-aquelh moument, la brumo se durbic un chic e uo plharou s'esparriguèc sus l'aigo negro de l'estanh. Deja on coumensabo de beire les roucatèlhs ount passo le cmai que meno al Mountrouch e, al cap d'un tussal, on besio un petit escabot de gouelhos, tacos blhancos sus laberdou del gispet.

La filho alabets truquèc de as dos mas e parlèc de i puja ande las beire de pus prochi. Janou la retenguèc e, debant l'oumbro de regrèt que besio dins les sibis èlhs, se pousquèc pos empacha de i passa la ma sus la maichèlho, tout siau, ande la counsoula:

— I biren uno outro estouno qu'auren lhese.

Alabets, la filo dichèc caire tout siau le siu cap sus la 'spalho de Janou. L'estanh se miralhabo, aro, dins les èlhs de l'encounegudo ount las pensados de Janou se negabon.

Les lhouris pots se touquèguen, le cap del goujat se boutèc à rouda e Janou, alhoungat sus la capeto, al pèd de l'abet, s'adurmic coumo s'èro ' stat le siu darrè son.

Chi sira se quant de tems la son a tengut Janou al pèd de l'estanh? La filho belhèu nous ag pouiro dire. Mè, ount es? Qu'es debengudo? Janou se palpo, se pecigo las mas, b'es despertat al mens! B'es plha sougant, que i es arribat? D'ount bé que se trobo achi, al bort del lac. E las bacos, ount soun?

Le soubeni del poutou tourno beni. Ount es aquelho filo als pelses de blhat repicoutat? E de la crida: Oè.... Mè res nou respound que le retrounadis del roucatèlh e le rire de l'auselhas de la nèit que crido la siu coumpanho: — Ou....ou... ou...ou...

Janou se lhèbo e gaito sus l' cami se trobo las pèdjos de la filho, mè la plhèjo a tout negat. Res nou demoro d'elho ta bibento tantos, res que le sou de la siu bouts que rasouno encaro à las aurelhos de Janou: — Tastats.....tastats....

Se tournabo jè l'tour de l'estanh, belhèu beiro qualqueres. Chun'ouro dèu èstre? Nou n' sè! And' aquelho brumo se pod pos dire. Un bruch, alha dins les matasses de fach toutis prochis, i fa lheba l' cap. S'èro l'

encantaire de l'endreit que be abeura las mandros e les taichous? Mè nou, es le rousal que cats de las fêlhos del fach.

Le fred embaeich Janou qu'es tout goutent. Cal que s'en tourne.

Aco l'escalfurara. Las ombros de la nèit mestalhados ande la brumo basso peson sus las espalhos. Pourbu que trobe le cami. Suilouu, Bazet soun rescoumpassadis. Aro le prat del Fouilletch es achi: mè las bacos i soun pos mès. Belhèu soun a maisou....

Coumo ba passa sus l' pount de fèr que rescoumasso le Garbet, quelques ombros benen cap à-n-elh:  
— Qu'es tu Janou? E d'ount benes? Qu'estouloumiabos? T'anabon cerca!  
— E tio, se soun abaichados. La Pardolo es engudo d'ouero and'amaira. Las autres, le champètro las a troubados dins l'auserda de Toumasset à Camp-Beza. N-h-i a uno qu'es uflhado. Les tibis i bailhon la teriaco chè l'adjouènt ount le gardo las a menados. Ti cal randre.

Tems aprèts aquelho brespado, Janou s'en es anat dalha al prat dela Hillo, mè n'a pos grand balams ande trebalha. Uno pensado, toutjoun la mèmo, le rousègo. Ma mèmo bouts encantadouro, le mèmo rire plhar rasounon à las sius aurelhos: — Es curious coumo l'audou de l'èrbo coupado pèjo lhènh dins le nostre cos. Ag troubats-jes?

Alabets, Janou i pod pès teni, jito l'dalh al founze del prat, se coulco le bentre sus un reng, le nas founhat dins l'èrbo e alendo tant que pot la flhaino que pèjo del triboulet que bé coupa e que s'acoro per la cantulho.

Quand es pintat per l'audou que pèjo del sol, Janou tampo's èlhs e se tourno rememouria le joun ount gardabo las bacos dins un bousigas del Fouilletch, uno brespado de brumo basso. A! per mou fe! jamès desempèich aquelho brespado, n'a pos ausit parla de la filho als èlhs blunis e elh tapauc n'a pos parlat à degus. Pourtant, aco es segur, n'a pos soumiat e la filho, l'a bisto camina arrans elh, d'un pas lhaugè,trop lhaugè mèmo per qualcus de la bilo. Per elh, chic à chic, l'idègo i es bengudo que poudio èsse uno encantado dels bosques de Guzet, que s'anujabo e qu'abio boulgut fè courre un paure baquiè del Fouilletch.

Janou espèro que la tournara beire, un joun. Quand siren al mes de Julh, que les aberdalhs siranflhouridis, s'en bira, uno brespado de soulelh, al bort de l'estanh. La filho i a plha dit que bouldro beire aquelho flhou d'uno coulo ta tendro que se pod pos dire e que senlho beni d'un autre moun.

Se nou la trobo pos, pujara al Mountrouch coupa un brassat dels pus poulidis aberdalhs e les jitara à cops d'arpats dins le lac: l'encantado sira urouso, se be à passa, de sabe que le paure Janou l'a pos jamès debrembado!

**© CIEL d'Oc – Décembre 2005**